


GOVERNMENT OF INDIA
ARCHÆOLOGICAL SURVEY OF INDIA
ARCHÆOLOGICAL
LIBRARY

ACCESSION NO. 30324

CALL No. 913.05/Sar/Maj

D.G.A. 79



সারনাথ বিবরণ ।

শ্রীভবতোষ মজুমদার প্রণীত ।

30524




কলিকাতা মিউজিয়ামের প্রত্নতত্ত্ববিভাগের অধ্যক্ষ রায়বাহাদুর
শ্রীযুক্ত রমাপ্রসাদ চন্দ কর্তৃক লিখিত ভূমিকা সহ ।

913.05

Soar / May

কলিকাতা : গভর্ণমেন্ট অফ ইণ্ডিয়া

সেন্ট্রাল পাবলিকেশন্স ব্লক



CENTRAL ARCHITECTOLOGICAL

LIBRARY NEW DELHI

Acc. No. 3032.4

Date. 18.2.57

Call No. 913.05

~~Sar / I.D.A. / Maj~~
Sar / Maj

যিনি

আজ চব্বিশ বৎসর কাল

ভারতীয় প্রত্নতত্ত্ব বিভাগের অধ্যক্ষরূপে ভারতের প্রাচীন

কীর্তিনিদর্শনসমূহ ধ্বংসমুখ হইতে রক্ষা করিয়া

অতীতের গৌরবময় কাহিনীর

পুনঃপ্রতিষ্ঠা করিয়াছেন

সেই

শ্রদ্ধাস্পদ

শ্রীযুক্ত সার জন মার্শেল, কেটি, সি-আই-ই, এম-এ,


লিট্-ডি, পি-এচ্-ডি, এফ্-এস্-এ, অনারারি

এ-আর্-আই-বি-এ,

মহোদয়ের করকমলে

ভক্তি ও কৃতজ্ঞতার নিদর্শনস্বরূপ এই ক্ষুদ্র পুস্তকখানি

অর্পিত হইল।



গ্রন্থকাণ্ডে নবেদন ।

১৯১৮ খৃষ্টাব্দে বাঙ্গালী দর্শকগণের সৌকর্য্যার্থে রায় বাহাদুর শ্রীযুক্ত দয়্যারাম সাহনীর কৃত সারনাথ গাইডের একটা বাঙ্গালা সংস্করণ সঙ্কলন করিবার অনুমতি প্রাপ্ত হইয়াছিলাম । তখন উক্ত পুস্তকের একটা অনুবাদ মাত্র প্রকাশ করিব এইরূপ কল্পনা ছিল । কিন্তু কার্য্যে হস্তক্ষেপ করিয়া দেখিলাম সারনাথের ধারাবাহিক ইতিবৃত্ত ও শিল্পকলার বিবরণ উপলক্ষ করিয়া কয়েকটা পরিচ্ছেদ সন্নিবেশিত করিয়া না দিলে উহা সাধারণের পক্ষে অসম্পূর্ণ মনে হইতে পারে । তদনুসারে কতিপয় অতিরিক্ত পরিচ্ছেদ সংযোজিত হইয়াছে । তৃতীয় পরিচ্ছেদটি সম্পূর্ণভাবে এবং চতুর্থ পরিচ্ছেদটি অংশতঃ সাহনীর মহাশয়ের পুস্তকের উপর নির্ভর করিয়া লিখিত হইল । প্রত্নতত্ত্ববিভাগের সর্বাধ্যক্ষ সার জন মার্শেল মহোদয় এই গ্রন্থ প্রকাশে অনুমতি দিয়া আমার ঋণপাশে আবদ্ধ করিয়াছেন । পঞ্চম পরিচ্ছেদে মৌর্য্য, গুপ্ত ও গুপ্ত যুগের শিল্পের যে বর্ণনা প্রদত্ত হইয়াছে তাহার জ্ঞান আমি সর্ব্বতোভাবে তাঁহার নিকট ঋণী । স্বর্গগত ডাক্তার স্পুনারের স্মৃতির সহিত আমার গ্রন্থ রচনার প্রচেষ্টা বিশেষ ভাবে জড়িত । তাঁহারই অনুমতি ক্রমে আমি কিছুকাল কাশীতে থাকিয়া সারনাথের যাবতীয় প্রত্নবস্তুর সহিত পরিচিত হইবার সুযোগ প্রাপ্ত হইয়াছিলাম । শ্রীযুক্ত রাখাল দাস বন্দ্যোপাধ্যায়

মহাশয় আমাকে নানা উপদেশ দিয়া সাহায্য করিয়াছেন। রায় বাহাদুর শ্রীযুক্ত রমাপ্রসাদ চন্দ মহাশয় আমার পাণ্ডুলিপি স্থানে স্থানে সংশোধিত করিয়া এবং একটি ভূমিকা সংযোজিত করিয়া দিয়া গ্রন্থের মূল্য বর্দ্ধিত করিয়াছেন। রায় বাহাদুর শ্রীযুক্ত দয়্যারাম সাহনী মহাশয় এই গ্রন্থে ব্যবহারের জন্য একটি অত্যাবশ্যক মানচিত্র প্রস্তুত করাইয়া দিয়াছেন। এই সকল মহাত্মার নিকট আমি আন্তরিক কৃতজ্ঞতা জ্ঞাপন করিতেছি।

দায়নাথের ইতিবৃত্ত উপযুক্ত রূপে আলোচনা করিতে হইলে একখানি বৃহৎ গ্রন্থের প্রয়োজন। অতি সংক্ষিপ্ত বিবরণও অনেকের নিকট অগ্রিয় হইবার সম্ভাবনা। এই কারণে দুইটি চরম পন্থাই পরিহার্য্য বিবেচনা করিয়া আমি মধ্যপথ অবলম্বন করিয়াছি। এক্ষণে এই পুস্তকে যদি দর্শকগণের স্বল্পমাত্রও উপকার সাধিত হয় তাহা হইলেই আমার চেষ্টা সফল জ্ঞান করিব। এবিষয়ে ষাঁহারা আরও অধিক অনুসন্ধান করিতে চাহেন তাঁহারা রায় বাহাদুর শ্রীযুক্ত দয়্যারাম সাহনী কৃত Catalogue of the Museum of Archaeology at Sarnath গ্রন্থে নিবদ্ধ গ্রন্থতালিকায় এতদ্বিম্বক অত্যাৱশ্যক গ্রন্থাবলীর নাম প্রাপ্ত হইবেন।

শিমলা, শ্রীভবতোষ মজুমদার।

১লা সেপ্টেম্বর ১৯২৪।

বিষয় সূচী ।

পৃষ্ঠা ।

৫ মিকা

১০

প্রথম অধ্যায়—ধর্মচক্র প্রবর্তন :

গৌতম বুদ্ধের সংক্ষিপ্ত জীবনী	১
ঋষিপতন বা মৃগদাব—বর্তমান সারনাথ	৭
বুদ্ধদেবের সারনাথে আগমন ও ধর্ম প্রচার	১১
বৌদ্ধ তীর্থরূপে সারনাথ	১৪

দ্বিতীয় অধ্যায়—ইতিহাস :

মৌর্য যুগের নিদর্শন—অশোক স্তম্ভ	১৬
ধর্মরাজিকা স্তম্ভ	১৭
অশোক নির্মিত বৌদ্ধকা	১৮
গুপ্ত যুগের নিদর্শন	১৮
কুম্ভা যুগের নিদর্শন—বোধিসত্ত্বমূর্তি, ছত্র ও দণ্ড	২০
গুপ্ত যুগে সারনাথ	২২
গুপ্ত যুগের নিদর্শন—কুম্ভা গুপ্ত ও বৃদ্ধগুপ্তের রাজ্যকালের বুদ্ধমূর্তি	২৩
ষষ্ঠ ও সপ্তম শতাব্দীতে সারনাথ—যোথরী ও বর্দ্ধন বংশের রাজ্যকাল—	
হরেন্দ্র সেনের সারনাথ বর্ণন	২৫
কাশ্মীররাজ যশোবর্মা, আরুণ ও প্রতীহার রাজবংশ	২৮
পাল রাজত্বের নিদর্শন	২৯
কলচুরিরাজ কর্ণদেবের ১০৫৮ খৃষ্টাব্দের শিলালিপি	৩১
গহড়িয়াল রাজত্বের সারনাথ—কুম্ভা দেবী প্রতিষ্ঠিত বৌদ্ধ বিহার ;	
মুসলমান আক্রমণ ও লুণ্ঠন	৩২
জগৎসিংহের ধ্বংস	৩২

মেকেল্লার খনন	৩৩
কানিংহামের খনন	৩৩
কিটোর খনন	৩৪
টমাস ও হলের খনন	৩৫
ওরটেলের খনন	৩৫
অতৃত্ত্ব বিভাগের খনন	৩৬

তৃতীয় অধ্যায়—ধ্বংসাবশেষ ।

চৌখণ্ডী স্তূপ	৩৯
মুগদায	৪১
সারনাথের দক্ষিণভাগ	৪১
৬নং সজ্জারাম (কিটো সাহেবের সজ্জারাম)	৪২
৭নং সজ্জারাম	৪৬
ধর্ম্মরাজিকা স্তূপ	৪৭
প্রধান মন্দির	৫০
অশোক স্তম্ভ	৬১
অশোক স্তম্ভের পশ্চিমদিকের অংশ	৬৬
৫০ নং মন্দির	৬৯
উত্তর দিকের অংশ	৭০
রাণী কুমরদেবীর ধর্ম্মচক্রজিনবহার	৭১
হড়ঙ্গ যুক্ত মন্দির	৭৫
দ্বিতীয় সজ্জারাম	৭৮
তৃতীয় সজ্জারাম	৭৯
চতুর্থ সজ্জারাম	৮২
ধামেক স্তূপ	৮৪
পঞ্চম সজ্জারাম	৮৭
জৈন মন্দির	৮৭

চতুর্থ অধ্যায়—মিউজিয়ম।

মণ্ডপে রক্ষিত জৈন ও ব্রাহ্মণ্য মূর্তি	৮৮
সারনাথ মিউজিয়ম	৯৩
পোড়ামাটি, ইষ্টক ও মৃৎপাত্রাদির নিদর্শন	৯৩
অশোক স্তম্ভশীর্ষ	৯৫
কুষাণযুগের বৌদ্ধমূর্তি	৯৭
গুপ্তযুগের বৌদ্ধমূর্তি	১০১
মধ্যযুগের শিবমূর্তি	১০৩
বৌদ্ধ দেবদেবীর মূর্তি পরিচয়	১০৩
অষ্টমহাস্থানের চিত্র	১২১
ক্ষান্তিবাদী জাতক	১৩০

পঞ্চম অধ্যায়—শিল্প।

মৌর্যশিল্প	১৩৪
গুপ্তশিল্প	১৩৮
মথুরার প্রাচীন শিল্প	১৪০
গুপ্তশিল্প	১৪২
গুপ্ত যুগের অধঃপতন কালীন শিল্প	১৪৫
গুপ্তসময়ের বৌদ্ধমূর্তি	১৪৫
মধ্যযুগের শিল্প	১৪৭

পরিশিষ্ট।

রাজা কর্ণদেবের লিপি	১৫১
কুমরদেবীর সারনাথ প্রশস্তি	১৫৪

চিত্রসূচী ।

- ১। সারনাথের ধ্বংসাবশেষের মনোচিত্র
- ২। চৌখণ্ডী স্তূপ
- ৩। অশোকের অনুশাসন
- ৪। ধামেক স্তূপ
- ৫। অশোকস্তম্ভশীর্ষ
- ৬ ক-খ। গুপ্ত যুগের স্তম্ভশীর্ষ
- ৭। কপিলেশ্বর মন্দিরের বোধিসত্ত্ব মূর্তি
- ৮ ক। বুদ্ধের ধর্মচক্রপ্রবর্তক মূর্তি
- ৮ খ। শিবমূর্তি
- ৯। ধামেক স্তূপের কারুকর্ম
- ১০। অষ্টমহাস্থান

ভূমিকা ।

ধর্মচক্র ।

বৌদ্ধগণের চারিটি মহাতীর্থ, গৌতমবুদ্ধের জন্মস্থান কপিল বস্তু ; সম্বোধি লাভের স্থান উরুবিল্ব (বোধগয়া) ; প্রথম ধর্ম ব্যাখ্যার স্থান সারনাথ ; এবং মহাপরিনির্বাণের স্থান কুশীনগর । কপিলবস্তু এবং কুশীনগর বুদ্ধের মহিমায় মহিমান্বিত । কিন্তু বোধগয়া (উরুবিল্ব) এবং সারনাথ বেদপস্থিগণের দুইটি মহাতীর্থ গয়ার এবং বারাণসীর নিকটবর্তী । সুতরাং বৌদ্ধ ধর্মের অভ্যুদয় ব্যাশারে এই দুইটি স্থানের আচার নীতির যে কতকটা প্রভাব ছিল এ কথা স্বীকার না করিয়া উপায় নাই ।

প্রাচীন বৌদ্ধ সূত্র অপেক্ষা নিঃসংশয়রূপে প্রাচীনতর কোন গ্রন্থে গয়ার উল্লেখ দেখা যায় না । গয়ার চারিদিকে বাঁহারা বাস করিতেন বৈদিকযুগে সেই মগধগণ বেদবাহ্য ব্রাত্য বলিয়া ঘৃণিত ছিলেন । প্রাচীন বৌদ্ধশাস্ত্রে গয়াপ্রদেশ-বাসীর যে বিবরণ পাওয়া যায় তাহা হইতে পরিষ্কার বুঝিতে পারা যায় না যে কিরূপ ভাবের আবহাওয়ার ভিতর থাকিয়া গৌতম উরুবিল্বে ছয় বৎসর কাল কঠোর তপস্তা করিয়া ছিলেন এবং শেষে সম্বোধিলাভ করিয়া ছিলেন । কিন্তু বারাণসীতে বৌদ্ধ ধর্মের উৎপত্তির সময়ে যে কি প্রকার ভাবের হাওয়া বহিতে ছিল বৈদিকসাহিত্যে তাহার অনেকটা আভাস পাওয়া যায় ।

শতপথব্রাহ্মণে, কোন কোন প্রাচীন উপনিষদে, এবং শ্রোতসূত্রে কাশ্য নামক জনগণের উল্লেখ দৃষ্ট হয়। কাশ্যগণের রাজাকে কাশ্য বলা হইয়াছে। বৈদিক সাহিত্যে বারাণসীর নাম দৃষ্ট হয় না। অথর্ববেদে বরগাবতী নদীর নাম উল্লিখিত থাকায় অধ্যাপক মেকডোনেল ও কিথ মনে করেন যে বারাণসী নগরী অতি প্রাচীন(১)। ব্যাকরণ মহাভাষ্যকার পতঞ্জলি পাণিনির “বিদূরাঙ্ঞাঃ” (৪।৩।৮৪) সূত্রের ভাষ্য কাত্যায়নের এই বার্তিকটী উদ্ধৃত করিয়াছেন :—

“বালবায়ো বিদূরংচ প্রকৃত্যন্তরমেব বা।

নবৈ তত্রৈতি চেদ্ব্রহ্মজিহ্বরীবহুপাচরেৎ ॥”

“বিদূরাঙ্ঞাঃ” সূত্রের অর্থ, বিদূর নামক পর্কতে উৎপন্ন মণি অর্থে বিদূর শব্দের উত্তর ঞ্চ প্রত্যয় যোগে বৈদূর্য্য পদ সিদ্ধ হয়। কিন্তু প্রকৃত প্রস্তাবে বৈদূর্য্যমণি বিদূর নামক কোন পর্কতে উৎপন্ন হয় না, বালবায় নামক পর্কতে উৎপন্ন হয়। এই জন্ত এই বার্তিকে কাত্যায়ন বলিয়াছেন, “বিদূর বালবায়ের প্রতিশব্দ মাত্র। যদি বলা হয় যে বালবায়কে বিদূর বলা যাইতে পারে না; উত্তরে বলা যায়, যেমন বণিকেরা বারাণসীকে জিহ্বরী বলে, তেমনি বৈরাগ্যকরণেরা বালবায়কে বিদূর বলে।” বার্তিকের “জিহ্বরীবহুপাচরেৎ” পদের পতঞ্জলি এই প্রকার ভাষ্য করিয়াছেন—

“বণিজো বারাণসীং জিহ্বরীত্বাপাচরন্তি। এবং বৈয়া-

করণা বালবায়ং বিদূর ইত্বাপাচরন্তি।”

“বণিকগণ বারাণসী নগরীকে জিহ্বরী নামে অভিহিত করে; এইরূপ বৈরাগ্যকরণেরা বালবায়কে বিদূর বলে।”

পতঞ্জলি আনুমানিক খৃষ্টপূর্ব দ্বিতীয় শতাব্দের মধ্যভাগে মহাভাষ্য সঙ্কলন করিয়াছিলেন। পতঞ্জলি মহাভাষ্যে কাত্যা-
য়নকে ভগবান বলিয়া উল্লেখ করিয়াছেন। ইহা হইতে বুঝা
যায় যে পতঞ্জলির সময়ে কাত্যাযন মুনিঋষিবৎ গণ্য হইতে
ছিলেন, অর্থাৎ পতঞ্জলি ও কাত্যাযনের কালের মধ্যে যথেষ্ট
(অনুন শতাধিক বৎসর) ব্যবধান কল্পনা করা যাইতে পারে।
জিহ্বারী শব্দের অর্থ জয়শীলা। অতএব কাত্যাযনের এই বার্তিক
হইতে দেখা যায় যে খৃষ্টপূর্ব তৃতীয় শতাব্দের বারাণসী বাণিজ্যের
এমন একটা প্রসিদ্ধ স্থানে পরিণত হইয়াছিল এবং সেখানে
ক্রয় বিক্রয় এমন লাভজনক ছিল যে বণিকেরা বারাণসীকে
জিহ্বারী নাম দিয়াছিলেন। প্রাচীন বৌদ্ধসূত্রে বারাণসী
বরাবরই কাশিজনপদের রাজধানী বলিয়া উল্লিখিত হইয়াছে।
সুতরাং অনুমান করা যাইতে পারে যে খৃষ্টপূর্ব ষষ্ঠ শতাব্দের
বারাণসী একটি প্রধান নগর এবং কাশিজনপদের রাজধানী
ছিল।

শাঙ্খ্যায়ন শ্রোতসূত্রে (১৬।২৯।৫) কথিত হইয়াছে,

“এতে হ জলো জাতুকর্ণ্য ইষ্টা ত্রয়াণাং নিগুস্থানাং

পুরোধাং প্রাপ কাশুবৈদেহযোঃ কোসল্যাস্ত চ।”

“এই ইষ্টির দ্বারা জলজাতুকর্ণ্য কাশিরাজ, বিদেহরাজ ও
কোসলরাজ এই তিনটি রাজবংশের পৌরহিত্য লাভ করিয়া
ছিলেন।”

এই বচন হইতে দেখা যায় কোসল, কাশি, এবং বিদেহ-
গুণের মধ্যে তখন আচারের ঐক্য ছিল। বৈদিকযুগে একদিকে
যেমন কুরুপাণ্ডালগণের মধ্যে আচার বিষয়ে ঐক্য ছিল তেমনি

আর একদিকে কাশি ও বিদেহগণের মধ্যেও ঐক্য ছিল। শতপথব্রাহ্মণে (১৩।৫।৪।১৯) এই উপাখ্যানটী আছে। ভরতরাজ শতানীক সাত্রাজ্যিত কাশিরাজ ধৃতরাষ্ট্রের যজ্ঞের অশ্ব কাড়িয়া লইয়াছিলেন। ব্রাহ্মণকার লিখিয়াছেন, তদবধি কাশিগণ যজ্ঞাগ্নি জালিত করেন না। এই আখ্যানে দেখা যায় শতপথব্রাহ্মণের এই অংশ রচনার সময়ে কাশিজনপদে বৈদিক যাগযজ্ঞ লোপ পাইতেছিল। কিন্তু কাশির রাজধানীতে যে জ্ঞানকাণ্ডের অহুশীলন হইত উপনিষদে তাহার প্রমাণ পাওয়া যায়। বৃহদারণ্যকে (২।১।১) এবং কোষীতকী উপনিষদে (৪।১) বর্ণিত হইয়াছে, বালাকি নামক একজন ব্রাহ্মণ কাশিরাজ অজাতশত্রুর নিকট আশ্রয় স্বরূপ সম্বন্ধে উপদেশ গ্রহণ করিয়াছিলেন। যে জনপদে যজ্ঞাগ্নি প্রজালিত হইত না অথচ উপনিষদের ব্রহ্মবিদ্যা আলোচিত হইত সেখানকার ভাবের আবহাওয়া অবশ্য গৌতমবুদ্ধের ধর্মের অভ্যাসের অহুকুল ছিল। পালি দীর্ঘাগমের (দীঘনিকায়) অন্তর্গত মহাপদান সূক্তান্ত অনুসারে গৌতমবুদ্ধের অব্যবহিত পূর্ববর্তী কাশ্যপবুদ্ধ বারাণসীতে জন্ম গ্রহণ করিয়াছিলেন এবং জৈনদিগের ত্রয়োবিংশ তীর্থঙ্কর পার্শ্বনাথের জন্মস্থানও বারাণসী। কাশ্যপবুদ্ধ এবং পার্শ্বনাথের জন্মসম্বন্ধীয় প্রাচীন কিম্বদন্তী সাক্ষ্য দান করিতেছে যে প্রাচীন কাল হইতেই বারাণসী বৈদিক কর্মকাণ্ডের বিরোধি ধর্মপ্রবর্তকগণের পালয়িত্রী এবং শিক্ষ-য়িত্রী রূপে গণ্য হইয়া আসিতেছিল। মজ্জিমনিবায়ের অন্তর্গত ঘটকারসূক্তে (৮১) দেখা যায় কাশ্যপবুদ্ধও সময় সময় ঋষিপত্ন মৃগদাবে বাস করিতেন।

গৌতমবুদ্ধ সঙ্ঘোদ্যমানের পর সারনাথে যে সূত্র প্রচার করিয়াছিলেন তাহার শ্রোতা ছিলেন পঞ্চভদ্রবর্গীয় নামে পরিচিত পাঁচজন ভিক্ষু এবং এই সূত্রের প্রতিপাদ্য বিষয় ছিল প্রব্রজিত বা সংসারত্যাগী ভিক্ষুর কর্তব্য নির্ধারণ। এই প্রকার ভিক্ষুগণ তখন শ্রমণ নামে পরিচিত ছিলেন। শ্রমণগণ আদৌ বেদপন্থী ছিলেন এবং কালক্রমে অনেক শ্রমণ বেদমার্গ ত্যাগ করিয়া স্বতন্ত্র পথ প্রতিষ্ঠিত করিয়াছিলেন। কিন্তু ইতিহাসের হিসাবে বিভিন্ন শ্রমণমার্গকে বেদমার্গেরই শাখা প্রশাখা রূপে গণ্য করিতে হইবে। শ্রমণ শব্দের অর্থ অভীষ্ট লাভের জন্ত উপবাসাদি শ্রম বা কষ্টকর কর্মের সম্পাদক। ঋগ্বেদে যাগ যজ্ঞের সঙ্গে সঙ্গে উপবাসাদি তপশ্চরণের কথা আছে। যজুর্বেদে তপশ্চরণের মহিমা বিশেষভাবে কীর্তিত হইয়াছে; কথিত হইয়াছে; প্রজাপতি তপশ্চরণ করিয়া প্রজাসৃষ্টি করিতে সমর্থ হইয়াছিলেন (তৈত্তিরীয় সংহিতা, ৩।১।১)। তৈত্তিরীয় আরণ্যকে (২।৭) এই আখ্যানিকাটি দৃষ্ট হয়—

“বাতরশনা নামক একদল ঋষি শ্রমণ (তপস্বী) এবং উদ্ধরেতা ছিলেন। অভীষ্টলাভের জন্ত কয়েকজন ঋষি তাঁহাদের নিকট আগমন করিয়া ছিলেন। তাঁহারা (বাতরশনা নামক ঋষিগণ ইহা বুঝিতে পারিয়া) অন্তর্হিত হইয়া ছিলেন এবং কুশ্মাণ্ড নামক মন্ত্রবাক্যে প্রবেশ করিয়াছিলেন। (অপর ঋষিগণ) প্রজ্ঞাপূর্বক তপশ্চরণ করিয়া কুশ্মাণ্ড মন্ত্রবাক্যে বাতরশনাগণের সাক্ষাৎলাভ করিয়াছিলেন। তখন তাঁহারা বাতরশনাগণকে জিজ্ঞাসা করিলেন, ‘কি নিমিত্ত আপনারা অন্তর্হিত হইয়াছিলেন।’ বাতরশনাগণ বলিলেন, ‘হে ভগবদগণ

আপনাদিগকে নমস্কার করি। আপনারা আমাদিগের নিকট আগমন করিয়াছেন, বলুন কি উপায়ে আমরা আপনাদিগের সেবা করিব।’ অপর ঋষিরা বাতরশনাগণকে বলিলেন, ‘যাহাতে আমরা পাপরহিত হইতে পারি, আমাদিগকে সেই গুহ্য উপায় বলুন।’ তখন বাতরশনাগণ (শুদ্ধিপ্রদ) এই কয়েকটি সূক্ত দেখিতে পাইয়াছিলেন

. অপর ঋষিগণ এই (কুশ্মাণ্ডমন্ত্ৰের দ্বারা) হোম করিয়া পাপমুক্ত হইয়াছিলেন। যাগযজ্ঞের আরম্ভে কুশ্মাণ্ডহোম করিয়া পাপমুক্ত হইলে যজমানের দেবলোক প্রাপ্তি হয়।”

বোধায়ন শ্রৌতসূত্রে (১৬।৩০) মুতয়ন যাগের অধিকারীকে শ্রমণ বলা হইয়াছে। বৃহদারণ্যকোপনিষদে (৪।৩।২২) শ্রমণ ও তাপসের একত্র উল্লেখ দৃষ্ট হয়। বৌদ্ধ পালি নিকায়ে শ্রমণগণ ব্রাহ্মণের প্রতিযোগী সম্প্রদায়রূপে উল্লিখিত হইয়াছে। পাণিনির ব্যাকরণের একটী (২।৪।৯) সূত্রে বিহিত হইয়াছে, যে সকল প্রাণীর মধ্যে বিরোধ শাস্তিতিক অর্থাৎ চিরন্তন সেই সকল প্রাণিবাচক শব্দের দ্বন্দ্বসমাস হইলে তাহা একবচনান্ত হইবে। এই সূত্রের দৃষ্টান্তস্বরূপ একটী বার্তিকের ভাষ্যে পতঞ্জলি লিখিয়াছেন—

“যেষাং চ বিরোধ ইত্যস্তাবকাশঃ। শ্রমণব্রাহ্মণম্।”

“যাহাদের মধ্যে বিরোধ চিরন্তন তাহাদের সম্বন্ধে এই সূত্রের প্রয়োগ হইবে। যথা শ্রমণব্রাহ্মণম্।”

পতঞ্জলির মহাভাষ্যের রচনাকাল পূর্বেই উল্লিখিত হইয়াছে। সুতরাং এই দৃষ্টান্ত হইতে দেখা যায়, খৃষ্টপূর্ব দ্বিতীয় শতাব্দের মাঝামাঝি সময়ে শ্রমণ ও ব্রাহ্মণগণ দুইটা বিরোধী সম্প্রদায়ে পরিণত হইয়াছিলেন, এবং এই বিরোধ চিরন্তন বলিয়া তৎকালের লোকের ধারণা ছিল। এখানে ব্রাহ্মণশব্দের অর্থ কেবল জ্ঞানী ব্রাহ্মণ নহে, যাঁহারা বৈদিক কৰ্ম্মকাণ্ডের অনুসরণকারী এইরূপ ব্রাহ্মণ।

এই সকল প্রমাণ আলোচনা করিলে অনুমান হয়, উপবাসাদি তপশ্চরণশীল উর্দ্ধরেতা কৰ্ম্মকাণ্ডপন্থী ঋষিগণ আদৌ শ্রমণ নামে পরিচিত ছিলেন। জন্মান্তরবাদের প্রচার এবং বাগযজ্ঞ ও তপস্তার ফলে দেবলোক লাভ হইলে ও সঞ্চিত কৰ্ম্মফল ক্ষয় হওয়ার পর দেবলোক হইতে পতন এবং হীনবোনিতে পুনর্জন্মের সম্ভাবনা আছে এই প্রকার সংস্কার একান্ত নিষ্ঠাবান আদিম শ্রমণগণকে কৰ্ম্মকাণ্ড পরিত্যাগ করিয়া জন্মমৃত্যুর হস্ত হইতে চিরতরে মুক্তি লাভের জগৎ জ্ঞানের অনুশীলনে ব্রতী করিয়াছিল। তদবধি কৰ্ম্মকাণ্ডপন্থী ব্রাহ্মণ এবং জ্ঞানপন্থী শ্রমণ প্রতিযোগী সম্প্রদায়রূপে গণ্য হইয়াছিল। যেখানে বেদবিহিত কৰ্ম্ম বন্ধনের কারণ এবং শ্রমণের সাধ্য জ্ঞান মুক্তির কারণ বলিয়া গণ্য হয় সেখানে কৰ্ম্মকাণ্ডপন্থী ব্রাহ্মণের সহিত মোক্ষপন্থী শ্রমণের বিরোধ অবশ্যসম্ভাবী। প্রাচীন বৌদ্ধগ্রন্থে দেখা যায়, গৌতমবুদ্ধের সমসময়ে শাক্যপুত্রীয় বা বৌদ্ধশ্রমণ ছাড়া কৰ্ম্মকাণ্ড বিরোধী নির্গ্রহ বা জৈন, মক্ষরী বা আজীবিক এবং আরও কতকগুলি শ্রমণসম্প্রদায় বিদ্যমান ছিল। জৈনগণ আমাদের

সুপরিচিত। পাণিনির ব্যাকরণে (৬।১।১৫৪) মঙ্করী পরিব্রাজকের উল্লেখ আছে এবং মহাভাষ্যকার পতঞ্জলি মঙ্করী শব্দের এইরূপ ব্যুৎপত্তিগত অর্থ প্রদান করিয়াছেন—

“মা কৃত কৰ্মাণি মা কৃত কৰ্মাণি শান্তিৰ্বঃ শ্রেয়সীত্যাহাতে
'মঙ্করী পরিব্রাজকঃ।’”

“‘কৰ্ম্মানুষ্ঠান করিওনা, কৰ্ম্মানুষ্ঠান করিওনা, শান্তিই তোমাদিগের শ্রেয়ঃ’, (যাঁহারা) এই প্রকার বলিয়া থাকেন (তঁাহাদিগকে) মঙ্করী (মা × কৃত × ইনি) পরিব্রাজক বলে।’”

মঙ্করী (আজীবিক) পরিব্রাজকেরা সকল প্রকার কৰ্ম্মানুষ্ঠানই নিষেধ করিতেন এবং জীব চতুরশীতি যোনি ভ্রমণের ফলে আপনা আপনি মুক্তিলভ করিবে এইরূপ প্রচার করিতেন। কিন্তু স্বর্গলাভের অর্থাৎ বন্ধনের কারণ বৈদিক যাগযজ্ঞ, বিশেষতঃ যজ্ঞে প্রাণিহত্যা, বোধ হয় তখনকার কোন শ্রেণীর শ্রমণ বা পরিব্রাজকই অনুমোদন করিতেন না; সুতরাং তখন শ্রমণে ব্রাহ্মণে বিরোধ অনিবার্য। কিন্তু শ্রমণ ও ব্রাহ্মণের বিরোধ পাশ্চাত্য জগতের সাম্প্রদায়িক বিরোধের সহিত তুলনীয় নহে। বৈদিক ক্রিয়াকৰ্ম্ম যে নিষ্ফল এমন কথা শ্রমণেরা বলিতেন না। পালি দীঘনিকায় বা দীর্ঘাগমের অন্তর্গত কুটদন্ত সূত্রে গৌতম বুদ্ধ বলিতেছেন, তিনি পূর্বজন্মে একবার পুরোহিতরূপে রাজা মহাবিজিতকে স্বর্গসাধক (অবশ্যই প্রাণিহিংসারহিত) এক মহাযজ্ঞ সম্পাদন করাইয়াছিলেন। “সুত্তনিপাতের” ব্রাহ্মণ-ধর্ম্মসূত্রে গৌতমবুদ্ধ বলিতেছেন, পুরাকালে ব্রাহ্মণেরা সংযমী ছিলেন এবং যজ্ঞে প্রাণিহিংসা করিতেন না; কালক্রমে অব-

নতির ফলে ব্রাহ্মণেরা লোভী হইয়াছেন এবং যজ্ঞে পশুহিংসা আরম্ভ করিয়াছেন।* যাগযজ্ঞের ফলে মরণশীল দেবগণের লোক লাভ হইতে পারে, কিন্তু নির্বাণমুক্তি লাভ হইতে পারে না, সুতরাং বাহাতে নির্বাণমুক্তি লাভ হয় এরূপ সাধন করাই মানুষের কর্তব্য। সকল সম্প্রদায়ের শ্রমণের মতেই এইরূপ নির্বাণমুক্তি গৃহত্যাগী ভিক্ষুর লভ্য, গৃহীর লভ্য নহে। স্তম্ভনিপাতের অন্তর্গত ধর্ম্মিকস্বত্তে বুদ্ধ বলিতেছেন, একান্ত স্বধর্ম্মনিষ্ঠ গৃহস্থ (শ্রাবক বা উপাসক) মৃত্যুর পর স্বয়ংপ্রভানামক দেবগণেরলোক প্রাপ্ত হইবেন। নির্বাণমুক্তি লাভ করিতে হইলে ভিক্ষুধর্ম্ম গ্রহণ করিতেই হইবে। পরিব্রাজকের বা শ্রমণের প্রধান কার্য্য ছিল তপশ্চরণ ও ধ্যান। কিন্তু সকল শ্রেণীর শ্রমণ অবশ্যই কর্তব্যনিষ্ঠ ছিলেন না। গৌতমবুদ্ধ গৃহত্যাগের পর এবং বোধিলাভের পূর্বে উরুবিল্বে ছয় বৎসরকাল কঠোর তপশ্চরণ (হুঙ্করচর্যা) করিয়াছিলেন। ফলে তাঁহার শরীর অস্থিচর্ম্মসার হইয়া ছিল। তারপর তিনি বুঝিতে পারিলেন, হুঙ্করচর্য্যার দ্বারা মুক্তিদায়ক বোধি বা জ্ঞান লাভ করা বাইতে পারে না, বোধি লাভের জন্ত ধ্যানের প্রয়োজন। সুতরাং হুঙ্করচর্যা ভঙ্গ করিয়া তিনি স্নানাহার করিলেন এবং বোধিবৃক্ষের মূলে বসিয়া ধ্যানবলে

* দীঘনিকায়ের অন্তর্গত “অগ্গংএং হত্তে” ব্রাহ্মণবর্ণের উৎপত্তির বিবরণ দ্রষ্টব্য। দীঘনিকায়ের অন্তর্গত “তেবিজ্জ হত্তে” প্রাচীন ঋষিগণের প্রতি গুণা প্রকাশ করা হইয়াছে। তেবিজ্জ হত্তের বাহা লক্ষ্য, ব্রহ্মাতে (ব্রহ্মে নহে) লীন হওয়া অথবা ব্রহ্মলোক লাভ তাহা অস্ত্রান্ত প্রাচীন হত্তের উপদিষ্ট অর্হৎ পদলাভের বিরোধী। সুতরাং তেবিজ্জ হত্তে ক স্বতন্ত্র রচনা মনে করাই কর্তব্য।

মোক্ষদায়ক সম্যক সম্বোধি লাভ করিলেন। সারনাথে পঞ্চভদ্র-বর্গীয়েব নিকট প্রচারিত “ধর্মচক্রপ্রবর্তনস্থত্রে” এই অভিজ্ঞতার ফল স্বরূপ প্রথমতঃ শ্রমণের জ্ঞাত মধ্যমপ্রতিপদা বা মধ্যপথ উপদিষ্ট হইয়াছে। গৌতমবুদ্ধ বলিতেছেন, প্রব্রজিত শ্রমণ ছই প্রকার অনাচার পরিত্যাগ করিবেন; সাধারণ সংসারী লোকের মত তিনি ভোগবিলাসরত হইবেন না; অপরপক্ষে, কঠোর তপশ্চরণ করিয়া শরীরকেও ক্লেশ দিবেন না। ভিক্ষুর মধ্যপথ অনুসরণ করা কর্তব্য; অষ্টাঙ্গিক মার্গ সেই মধ্যপথ। গৌতমবুদ্ধের প্রচারিত শ্রমণ ধর্মের একটি প্রধান লক্ষণ অন্তা-বক্রম বা বাড়াবাড়ির পরিহার। ধর্মচক্রপ্রবর্তনস্থত্রে প্রচারিত আর একটি তথ্য, চারি প্রকার আর্ঘ্য সত্য। যথা, (১) হুংখ; (২) হুংখ সমুদয়; (৩) হুংখ নিরোধ; (৪) হুংখ নিরোধগামিনী প্রতিপদা বা পথ। হুংখ কি? জাতি (জন্ম) হুংখ, জরা (বার্দ্ধক্য) হুংখ, ব্যাধি হুংখ, মরণ হুংখ, অপ্ৰিয় সংযোগ হুংখ প্রিয়বিয়োগ হুংখ। হুংখ সমুদয় বা হুংখের উৎপত্তির কারণ কি? তৃষ্ণা। প্রথম ও দ্বিতীয় আর্ঘ্যসত্যে যে তত্ত্ব সূচিত হইয়াছে তাহা ব্যক্ত করা হইয়াছে প্রতীত্যসমুৎপাদে বা দ্বাদশনিদানে। কথিত আছে সম্বোধিলাভের অব্যবহিত পূর্বে গৌতম দ্বাদশ নিদান বা কার্য-কারণ-শৃঙ্খল অনুভব করিয়াছিলেন। দ্বাদশ নিদান এই—

(১২) জরামরণের কারণ জাতি (জন্ম)।

(১১) জাতির (জন্মের) কারণ ভব (জন্ম গ্রহণের দিকে ঝোঁক)।

(১০) ভবের কারণ উপাদান (কর্মের ইচ্ছা)।

(৯) উপাদানের কারণ তৃষ্ণা।

(৮) তৃষ্ণার কারণ বেদনা (ইন্দ্রিয়ের সহিত বাহ্য বস্তুর সংস্রবজনিত জ্ঞান)।

(৭) বেদনার কারণ সংস্পর্শ (ইন্দ্রিয়ের সহিত বাহ্য বস্তুর সংস্রব)।

(৬) সংস্পর্শের কারণ ষড়ায়তন (চক্ষু, কণ, নাসিকা, জিহ্বা, শ্রবণ, মন এই ছয়টি ইন্দ্রিয়)।

(৫) ষড়ায়তনের কারণ নামরূপ (দেহ ও মন)।

(৪) নামরূপের কারণ বিজ্ঞান (পুনর্জন্ম)।

(৩) বিজ্ঞানের কারণ সংস্কার (কর্মা)।

(২) সংস্কারের কারণ অবিদ্যা (অজ্ঞান)।

(১) অবিদ্যা হুঃখের মূল কারণ।

এই দ্বাদশ নিদানের দ্বারা সৃষ্টিতত্ত্বের রহস্য উদ্ঘাটিত হয় নাই, মানুষের হুঃখের কারণ, দ্বিতীয় আর্য্যসত্য হুঃখসমুদয় ব্যাখ্যাত হইয়াছে। পূর্ব জন্মের (১) অজ্ঞানের ফলে সংস্কার বা কৃতকর্মের সংস্কার এবং সেই সংস্কারের ফলে পুনর্জন্ম। ও হইতে ১০মফল মানুষের বর্তমানজীবনের কথা নিবন্ধ হইয়াছে। পুনর্জন্ম হইলেই দেহমনের উৎপত্তি হয়। ষড়েন্দ্রিয় দেহমনের অঙ্গীভূত। ইন্দ্রিয়ের সহিত বাহ্য বস্তুর সংস্পর্শে জ্ঞানের উৎপত্তি এবং

জ্ঞান হইতে তৃষ্ণার বা বাসনার উৎপত্তি। তৃষ্ণার ফলে ভোগে আসক্তি। এই আসক্তি জন্মগ্রহণের ঝোঁক উৎপাদন করে এবং তাহার ফলে ভবিষ্যতে জাত বা জন্ম (১১) এবং জরামরণ (১২) হয়।

অবিদ্যা যেরূপ হুঃখের মূলীভূত কারণ, অবিদ্যার নিরোধও তেমনি হুঃখ নিরোধের উপায়। অবিদ্যা না থাকিলে সংস্কার থাকিবে না; সংস্কার না থাকিলে বিজ্ঞান থাকিবে না এবং শেষ পর্য্যন্ত হুঃখদায়ক জাতি, জরামরণ হইবে না। অনুলোম রীতিতে উক্ত দ্বাদশ নিদানে যেমন দ্বিতীয় আর্য্যসত্য, হুঃখ সমুদয় ব্যাখ্যাত হইয়াছে, তেমনি প্রতিলোম রীতিতে উক্ত দ্বাদশ নিদানে তৃতীয় আর্য্যসত্য, হুঃখনিরোধ ব্যাখ্যাত হইয়াছে। সুতরাং ধর্ম্মচক্র-প্রবর্তন-স্থত্রে গৌতমবুদ্ধের ধর্ম্মের সার কথা পাওয়া যায়। সকল সম্প্রদায়ের বৌদ্ধেরাই এই স্থত্রকে প্রামাণ্য বলিয়া স্বীকার করেন এবং সকল সম্প্রদায়ই স্বীকার করেন যে এই স্থত্র গৌতমবুদ্ধ কর্তৃক সারনাথে বিবৃত হইয়াছিল। সুতরাং বৌদ্ধধর্ম্মের অভ্যুদয়ের সূচনা হইতেই সারনাথ একটা মহাতীর্থ বলিয়া গণ্য হইয়া আসিতেছে। এপর্য্যন্ত সারনাথে খৃষ্টপূর্ব্ব পঞ্চম বা চতুর্থ শতাব্দের কোন নিদর্শন পাওয়া যায় নাই; কিন্তু তৎপরবর্ত্তী যুগের, খৃষ্টপূর্ব্ব তৃতীয় শতাব্দে হইতে খৃষ্টীয় দ্বাদশ শতাব্দ পর্য্যন্ত এই দেড় হাজার বৎসরের নিদর্শন ধারাবাহিক রূপে পাওয়া গিয়াছে। ভারতীয় প্রত্নতত্ত্ব অনুসন্ধান বিভাগের কর্তৃপক্ষ এই দেড় হাজার বৎসরের অন্তর্গত বিভিন্ন যুগের চমৎকারজনক বহু নিদর্শন ভূগর্ভ হইতে উদ্ধৃত করিয়াছেন। বর্ত্তমান গ্রন্থে শ্রীমান ভবতোষ মজুমদার

যোগ্যতার সহিত তাহার পরিচয় লিপিবদ্ধ করিয়াছেন। রায় বাহাদুর শ্রীযুক্ত দয়্যারাম সাহনীর প্রণীত ইংরাজী সারনাথ বিবরণ অবলম্বনে এই পরিচয় রচিত হইয়াছে এবং চতুর্থ অধ্যায়ের মূর্তি পরিচয়ে অনেক অভিনব তথ্যও নিবদ্ধ হইয়াছে। সারনাথের ধ্বংসাবশেষের এবং মূর্তির পরিচয় ছাড়া গ্রন্থকার এই গ্রন্থের দ্বিতীয় অধ্যায়ে রাষ্ট্রীয় ইতিহাস এবং পঞ্চম অধ্যায়ে ভারতবর্ষের ধারাবাহিক বিবরণ নিবদ্ধ করিয়া গ্রন্থখানির পূর্ণতা সম্পাদন করিয়াছেন। দর্শকগণ তৃতীয় ও চতুর্থ অধ্যায়ের সহায়তায় সারনাথের ভগ্নাবশেষ এবং মিউজিয়ম দেখিয়া অবসর মত গ্রন্থের অন্ত্যস্ত অংশ, বিশেষতঃ দ্বিতীয় এবং পঞ্চম অধ্যায়, পাঠ করিলে সারনাথের স্থিতি অধিকতর উপভোগ্য মনে করিবেন এমন আশা করা যাইতে পারে।

শ্রী রমাশ্রমাদ চন্দ ।



সারনাথ বিবরণ ।

প্রথম অধ্যায় ।

ধর্মচক্র প্রবর্তন ।

প্রায় আড়াই হাজার বৎসর পূর্বের হিমালয় পর্বতের পাদমূলে অবস্থিত কপিলবস্ত্র নামক নগরে ইক্ষ্বাকু বংশের অন্যতম শাখা শাক্যকূলে গোতমবুদ্ধ জন্ম গ্রহণ করিয়াছিলেন। গোতমবুদ্ধের পিতা শুদ্ধোদন শাক্যদিগের রাজা ছিলেন। পিতা পুত্রের নাম রাখিয়াছিলেন সিদ্ধার্থ বা সর্বার্থসিদ্ধ। পিতৃকূলের গোত্র অনুসারে সিদ্ধার্থ গোতম নামে পরিচিত ছিলেন এবং উত্তর কালে বোধিলাভের পর বুদ্ধ নামে খ্যাত হইয়াছিলেন। এই বুদ্ধ ইতিহাসে গোতমবুদ্ধ নামে সুপরিচিত। কুমার সিদ্ধার্থ ২৯ বৎসর বয়সে জরা, ব্যাধি ও মৃত্যুর হস্ত হইতে এককালে মুক্তি লাভ করিবার জন্ম গৃহত্যাগ করিয়া সন্ন্যাসীর বেশে ভ্রমণ করিতে করিতে মগধের রাজধানী রাজগৃহে উপনীত হইয়াছিলেন। কথিত আছে রাজগৃহের তৎকালীন রাজা বিশ্বিসার তরুণ সন্ন্যাসীকে রাজ্যের

গোতম বুদ্ধের সংক্ষিপ্ত
জীবনী ।

অর্দ্ধাংশ ছাড়িয়া দিতে চাহিয়াছিলেন। সিদ্ধার্থ অসম্মত হইয়া রাজগৃহ ত্যাগ করিয়া আরাড় কালাম এবং রুদ্রক রামপুত্র নামক দুইজন সন্ন্যাসীর নিকট ধর্মোপদেশ গ্রহণ করিয়াছিলেন। এই দুই জনের নিকট বাহা কিছু শিখিবার তাহা শিখিয়া সিদ্ধার্থ গয়ার সমীপস্থ নৈরঞ্জনা (বর্তমান লীলাজান) নদীর তীরবর্তী উরুবেলা গ্রামে উপস্থিত হইয়া তথায় কঠোর তপশ্চরণ আরম্ভ করিয়াছিলেন। এই দুষ্কর তপশ্চর্য্যায় প্রবৃত্ত হইলে কৌণ্ডিন্য, বপ্শ, ভদ্রিয়, মহানাম, ও অশ্বজিৎ নামধেয় পাঁচজন ভিক্ষু তাঁহার সঙ্গী হইয়া তাঁহার সেবা করিয়াছিলেন। ইঁহারা বৌদ্ধ গ্রন্থাদিতে পঞ্চভদ্রবর্গীয় নামে প্রসিদ্ধ। ছয় বৎসর কাল কঠোর তপশ্চরণের পর সিদ্ধার্থ বুঝিতে পারিলেন যে কেবল তপস্যা অর্থাৎ উপবাসাদি করিয়া শরীরকে কষ্ট দিলে মুক্তি লাভের সম্ভাবনা নাই। তখন তিনি গ্রামে গ্রামে ভিক্ষা করিয়া আহাৰাদি আরম্ভ করিলেন। ইহা দেখিয়া কৌণ্ডিন্যাদি পঞ্চ অনুচর মনে করিলেন, ছয় বৎসর কাল কঠোর তপশ্চরণ করিয়া যখন ইনি বোধিলাভ করিতে পারিলেন না তখন ইঁহার বোধিলাভের কোন সম্ভাবনাই নাই। সুতরাং তাঁহারা সিদ্ধার্থের সাহচর্য্য ত্যাগ করিয়া বারাণসী নগরীর উপকণ্ঠস্থিত ঋষিপতন বা মুগদাবে আশ্রয় গ্রহণ করিলেন। এদিকে উরুবেলায় একদিন রাত্রিতে বোধিসত্ত্ব পাঁচটি স্বপ্ন

দেখিলেন এবং নিদ্রাভঙ্গের পর তাঁহার দৃঢ় ধারণা হইল যে পরদিবসই তিনি বোধিলাভ করিবেন। প্রত্যুষে গাত্রো-
থান করিয়া বোধিসত্ত্ব একটা অগ্ন্যোধ বৃক্ষমূলে উপবেশন
করিলেন। এমন সময়ে উরুবেলার গ্রামণী বা গ্রামা-
ধিপতির দুহিতা স্নজাতা আসিয়া তাঁহাকে স্বর্ণপাত্রে
পায়স নিবেদন করিলেন। পাত্র সহ পায়স লইয়া
বোধিসত্ত্ব নৈরঞ্জনার ঘাটে উপস্থিত হইলেন এবং স্নানান্তে
কোপীন বহির্বাস পরিধান করিয়া আহার করিলেন।
আহারান্তে পাত্রটী নৈরঞ্জনার স্রোতে নিক্ষেপ করিয়া
সিদ্ধার্থ বলিলেন, “যদি আজ আমার বোধি বা বুদ্ধভ-
লাভের সম্ভাবনা থাকে তবে এই পাত্র যেন স্রোতের
প্রতিকূলে ভাসিয়া যায়।” পাত্র যথার্থই স্রোতের
প্রতিকূলে ভাসিয়া গিয়া অবশেষে নাগলোকে উপস্থিত
হইল। সন্ধ্যার সময় সিদ্ধার্থ নদীতীরের অদূরস্থিত
একটা পিপ্পল বা অগ্ন্যোধ বৃক্ষের মূলে উপনীত হইলেন
এবং উহার পূর্বদিকে যোগাসনে উপবিষ্ট হইয়া প্রতিজ্ঞা
করিলেন—

“ইহাসনে শুষ্যতু মে শরীরঃ
ত্বগস্থিমাংসং প্রলয়ং চ যাতু।
অপ্রাপ্য বোধিং বহুকল্প দুর্লভাং
নৈবাসনাৎ কায়মতশ্চলিম্যতে ॥”

“আমার শরীর শুষ্ক হউক, অস্থি, চৰ্ম্ম ও মাংস একেবারে বিনষ্ট হইয়া যায় যা’ক, তথাপি বোধিলাভ না করিয়া আমি এই আসন পরিত্যাগ করিব না।” কথিত আছে যে এই সময় সাধুজনের চিরশত্রু মার বা কামদেব সসৈন্য উপস্থিত হইয়া তাঁহাকে নানা উপায়ে বোধিমার্গ হইতে বিচ্যুত করিবার জন্য পুনঃ পুনঃ চেষ্টা করিয়াছিলেন। কিন্তু সকল চেষ্টা যখন ব্যর্থ হইয়াছিল তখন মার বোধিসত্ত্বকে জিজ্ঞাসা করিয়াছিলেন, “তুমি যে দান করিয়াছ তাহার সাক্ষী কে?” বোধিসত্ত্ব তাঁহার দক্ষিণ হস্তের তর্জ্ঞনীর দ্বারা পৃথিবী স্পর্শ করিয়া বলিলেন, “পূর্ব পূর্ব জন্মের কথা ছাড়িয়া দিলেও রাজকুমার বিশ্বস্তুর রূপে জন্মগ্রহণ করিয়া আমি যে সাত শত মহাদান করিয়াছিলাম এই পৃথিবী তাহার সাক্ষ্য দান করিবে।” পৃথিবী বলিয়া উঠিল, “হাঁ, ইহা সত্য।” মার পরাভূত হইয়া সদলবলে পলায়ন করিলেন। তখন বোধিসত্ত্ব সিদ্ধার্থ পরমার্থজ্ঞান লাভ করিবার জন্য ধ্যানস্থ হইলেন। ধ্যানের বলে রজনীর প্রথম যামে বোধিসত্ত্ব দিব্যচক্ষু লাভ করিলেন এবং দিব্যচক্ষুর দ্বারা পূর্ব পূর্ব জন্মের ঘটনাবলী প্রত্যক্ষ করিলেন; রজনীর মধ্যম যামে তিনি দিব্যদৃষ্টিতে সমগ্র জীবজগতের পরিণতি প্রত্যক্ষ করিলেন; রজনীর শেষ যামে ব্যথিত হৃদয়ে জীবের দুর্গতির বিষয় ভাবিতে ভাবিতে উহার কারণ

পরম্পরা অনুসন্ধান করিয়া দেখিলেন জরা, মৃত্যু, জন্ম প্রভৃতি সকলের মূলে অবিদ্যা বা অজ্ঞান এবং অবিদ্যার নাশ হইলেই জীবের সকল প্রকার দুঃখের শেষ অর্থাৎ মুক্তি হইতে পারে। তিনি দুঃখের স্বরূপ, দুঃখের সমুদয় বা কারণ, দুঃখের নিরোধ বা নাশ এবং দুঃখ নিরোধের পথ দেখিতে পাইলেন। তিনি তখন বুঝিতে পারিলেন তিনি সম্বোধি বা সম্যক জ্ঞান লাভ করিয়াছেন, বুদ্ধ বা তথাগত হইয়াছেন, আর তাঁহাকে জন্মমরণের বশীভূত হইতে হইবে না। ঠিক প্রত্যুষে এই ঘটনা ঘটিল। সম্বোধি লাভের পর মোক্ষ সুখ অনুভব করিবার জন্য গোতম প্রথম সপ্তাহ বোধিবৃক্ষের পাদমূলে অবস্থান করিলেন। দ্বিতীয় সপ্তাহ অজপালন্থগ্রোধ মূলে উপবেশন করিয়া কাটাইলেন। তৃতীয় সপ্তাহে মুচলিন্দ গাছের তলায় আসিয়া উপবেশন করিলেন। এই সময় অত্যন্ত ঝড় ও বৃষ্টি হওয়ায় নাগরাজ মুচলিন্দ ফণা বিস্তার করিয়া তাঁহাকে আচ্ছাদিত করিয়াছিলেন। মুচলিন্দ বৃক্ষমূলে সাত দিন থাকিয়া বুদ্ধ রাজায়াতন বৃক্ষের মূলে আসিয়া বসিলেন এবং এখানেও সাত দিন কাটাইলেন। এই সময়ে ত্রপুষ এবং ভল্লিক নামক দুইজন বণিক উৎকল হইতে আসিবার পথে বুদ্ধদেবের নিকট উপস্থিত হইয়াছিলেন এবং আহারার্থ বুদ্ধদেবকে পিষ্টক ও মধু নিবেদন করিবার অনুমতি প্রার্থনা করিয়াছিলেন।

বুদ্ধের নিকট কোনও ভোজন পাত্র না থাকায় গন্ধর্বরাজ
 ধৃতরাষ্ট্র, নাগরাজ বিরূপাক্ষ, কুশাণ্ডরাজ বিরুদ্ধক এবং
 যক্ষরাজ বৈশ্রবণ এই চারিজন দিক্‌পাল চারিটি শিলা পাত্র
 আনয়ন করিয়াছিলেন। বুদ্ধের অলৌকিক ক্ষমতায় চারিটি
 পাত্র একটীতে পরিণত হইয়াছিল এবং তিনি উহাতে
 আহার করিয়াছিলেন। বণিকদ্বয় বুদ্ধ ও ধর্ম্মের
 শরণাগত হইয়া বুদ্ধের প্রথম উপাসক বা গৃহস্থ শিষ্য
 হইয়াছিলেন। তারপর বুদ্ধদেব রাজায়াতন বুদ্ধের মূল
 ত্যাগ করিয়া পুনরায় অজপালন্যগ্রোধের তলে ফিরিয়া
 গিয়াছিলেন এবং তিনি যে মহাসত্য লাভ করিয়াছেন তাহা
 জগৎ সমক্ষে প্রচার করিবেন কি না ইহাই চিন্তা
 করিতেছিলেন। এমন সময় ব্রহ্মা ও অন্যান্য দেবগণ
 তাঁহার মনের কথা বুঝিতে পারিয়া তথায় আসিয়া
 উপস্থিত হইলেন এবং বলিলেন—

“পাতুরহোসি মগধেস্থ পুবেব
 ধম্মো অসুদ্বো সমলেহি চিন্তিতো ।

অপাপুর্ এতন্ অমতস্ দ্বারম্
 স্ননতু ধম্মম্ বিমলেনামুবুদ্ধম্” ॥

“এখন পঙ্কিলহৃদয় শিক্ষকগণের উদ্ভাবিত ধর্ম্ম
 মগধে প্রচলিত আছে ; তুমি অমরত্বের দ্বার খুলিয়া

(১) ললিতবিস্তর, নিদানকথা প্রভৃতি অনুসারে সম্বোধিলাভের পর
 সপ্তম সপ্তাহে বুদ্ধের সহিত ব্রহ্ম ও ভগ্নিকের মিলন হয়।

দাও ; লোকে নিখিলহৃদয় বুদ্ধ কর্তৃক উদ্ভাবিত ধর্ম শ্রবণ করুক ।” ব্রহ্মার স্তুতি বাক্যে মুগ্ধ হইয়া ভগবান বুদ্ধদেব চিন্তা করিতে লাগিলেন কাহার নিকট প্রথম তিনি ধর্ম প্রচার করিবেন এবং কোন ব্যক্তিই বা তাঁহার গভীর নীতিবাক্য হৃদয়ঙ্গম করিতে সমর্থ হইবেন । তখন তিনি ভাবিলেন, আরাড়-কালাম এবং রুদ্রক-রাম-পুত্রের নিকট ধর্ম প্রচার করিবেন । কিন্তু পরক্ষণেই জানিতে পারিলেন যে এই দুই জ্ঞানী পুরুষ ইতিমধ্যে দেহত্যাগ করিয়াছেন । তারপর কৌণ্ডিন্যাদি পঞ্চভদ্র-বর্গীর কথা তাঁহার স্মরণ হইল এবং তাঁহাদিগের নিকট প্রথম ধর্ম প্রচার করিবেন সঙ্কল্প করিলেন । পঞ্চভদ্র-বর্গীয় ভিক্ষুগণ কাশী নগরীর নিকটবর্তী মুগদাব ঋষি-পতনে বাস করিতেছেন বুঝিতে পারিয়া তথাগত তথায় গমন করিলেন ।

প্রাচীন ঋষিপতন বা মুগদাব এখন সারনাথ নামে পরিচিত । সারনাথের ধ্বংসাবশেষ বারাণসী নগরের প্রায় দুই ক্রোশ উত্তরে গাজীপুর যাইবার পথের ধারে অবস্থিত । বর্তমান কালে এই রাজপথ দিয়া বা রেল যোগে সারনাথ যাওয়া যায় । পুরাকালে বারাণসী হইতে এই স্থানে যাইবার একটা সরল পথ ছিল । এই পথের কিছু কিছু নিদর্শন এখনও বর্তমান আছে । ঔরঙ্গজেবের মসজিদের নিকটস্থ পঞ্চগঙ্গাঘাট হইতে একটা পুরাতন :

ঋষিপতন বা মুগদাব—
বর্তমান সারনাথ ।

পথ লাটভৈরবের দক্ষিণদিক দিয়া বরুণা নদীর অপর পার পর্য্যন্ত বিস্তৃত ছিল। এই পথের ধংসাবশেষ বর্তমান রেলপথের নিকট দেখিতে পাওয়া যায়। অষ্টাদশ শতাব্দীর শেষভাগ পর্য্যন্ত এই স্থানে মোগল যুগের তিনটি খিলানযুক্ত একটি পুল ছিল, বহুবার প্রকোপে তাহা ভাঙ্গিয়া গিয়াছে। সারনাথের ঋষিপতন (পালি ইসিপতন) নাম হইবার কারণ মহাবস্তু অবদান নামক গ্রন্থে এইরূপ লিখিত আছে। বারাণসীর সার্কি যোজন দূরে এক মহাবন ছিল এবং তথায় পঞ্চশতজন প্রত্যেক-বুদ্ধ^১ বাস করিতেন। এই পঞ্চশতজন প্রত্যেক-বুদ্ধ আকাশ মার্গে উথিত হইয়া পরিনির্বাণ লাভ করেন অর্থাৎ দেহত্যাগ করেন। তাঁহাদিগের শরীর এই বন খণ্ডে পতিত হওয়ায় এই স্থানের নাম ঋষিপতন হইয়াছিল^২। চীনদেশীয় পরিব্রাজক ফা-হিয়ান খৃষ্টীয় পঞ্চম

(১) প্রত্যেকবুদ্ধ—বাঁহারা বুদ্ধ লাভ করেন কিন্তু ধর্ম প্রচার করেন না।

(২) ফরাসী পণ্ডিত সেনারের (Mon. E. Senart) মতে ‘ঋষিপতন’ ঋষিপত্তন শব্দের অপভ্রংশ। এই স্থানে অনেক ঋষি বা সাধক বাস করিতেন বলিয়া ইহার নাম ঋষিপত্তন হইয়াছিল। কালক্রমে ঋষিপত্তন নামটি জনসাধারণের নিকট অগরিচিত হয় এবং ঋষিপতন নাম প্রচলিত হয় ও ঋষিপতন নামের ব্যুৎপত্তি স্বরূপ এই আপ্যায়িকাটি কল্পিত হয়।

ঋষিপত্তন হইতে ঋষিপতনের উৎপত্তি যেমন সম্ভব ঋষিপতন হইতে ঋষিপত্তনের উৎপত্তি সেইরূপ সম্ভব। স্থানের নাম জনসাধারণের মুখে প্রচলিত ছিল এবং জনসাধারণ প্রাকৃত ভাষাই ব্যবহার করিত।

শতাব্দের প্রথম ভাগে (৪০৫-৪১১) ভারতবর্ষে আসিয়া-
ছিলেন। তিনি তাঁহার ভ্রমণ বৃত্তান্তে ঋষিপতন নাম
সম্বন্ধে লিখিয়াছেন, এক জন প্রত্যেকবুদ্ধ এই বনে
বাস করিতেন এবং ভগবান গৌতমবুদ্ধের মোক্ষলাভের
সময় নিকটবর্তী শুনিয়া এই স্থানে তিনি পরিনির্ব্বাণ
লাভ করিয়াছিলেন।

বুদ্ধদেবের পূর্বজন্মের ঘটনাবলী অবলম্বন করিয়া
পালি জাতক লিখিত হইয়াছে। ঐ গ্রন্থে এবং মহাবস্তু
অবদানে ঋষিপতনের অপর নাম মুগদায় বা মুগদাবের
উৎপত্তি সম্বন্ধে এই গল্পটি লিখিত আছে। গৌতমবুদ্ধ
এক সময়ে ৫০০ মুগের দলপতিরূপে জন্মগ্রহণ করিয়া
এই বনখণ্ডে বিচরণ করিতেন। তখন তাঁহার নাম
ছিল অগ্রোধ। অগ্রোধ দেখিতে অতি সুন্দর ছিল। তাহার
ছিল সূবর্ণের মত স্নিগ্ধ কাস্তি, মাণিক্যের ন্যায় উজ্জ্বল
চক্ষু, রৌপ্যের ন্যায় শুভ্র শৃঙ্গ, সিন্দুরের মত লাল বর্ণ মুখ,
অলক্তরাগে রঞ্জিত চারিখানি খুর, চামরের ন্যায় পুচ্ছ
এবং অশ্বশাবকের ন্যায় বৃহৎ দেহ। অগ্রোধের
সহোদর বিশাখ অন্য এক যুথের অধিপতি হইয়া এই
অরণ্যে বিচরণ করিত। তাহার আকৃতি বোধিসত্ত্বের
(অগ্রোধের) অনুরূপ ছিল। এই সময় কাশীরাজ ব্রহ্ম-
দত্ত অনুচরবৃন্দ সহ প্রত্যহ এই বনখণ্ডে মুগয়া করিতে
আসিতেন এবং অনেক মুগ বধ করিতেন। হরিণগুলি

তাহাদিগের এই বিপদের কথা শ্রোগ্রোধের নিকট বলিল। শ্রোগ্রোধ ও বিশাখ দুই ভ্রাতা রাজা ব্রহ্মদত্তের নিকট গিয়া নিবেদন করিল যে তিনি প্রত্যহ মুগ শিকাব করেন বলিয়া অনেক মুগ আহত হইয়া কম্বু পায়, কতক বা আতঙ্কে মরিয়া যায়। অতএব তাহারা প্রস্তাব করিল যে যদি রাজা আর ঐ বনে মুগয়া করিতে না যান তবে তাহারা দুই দল হইতে পালা ক্রমে একটি করিয়া মুগ প্রতিদিন রাজপ্রাসাদের রন্ধনশালায় প্রেরণ করিবে। রাজা এই প্রস্তাবে সন্মত হইলেন এবং সেই দিন হইতে পালা ক্রমে একটি করিয়া মুগ রাজার রন্ধনগৃহে যাইতে লাগিল।

একদিন বিশাখের দলের একটি হরিণীর পালা উপস্থিত হইল। হরিণী তাহার দলপতির নিকট গিয়া জানাইল যে সে গর্ভবতী। এখন সে পালা রক্ষা করিতে গেলে গর্ভস্থ শাবকও হত হইবে। শাবকটি প্রসূত হইয়া কিছু বড় হইলে তবে সে পালা রক্ষা করিতে যাইবে। অতএব এখন তাহার পরিবর্তে অশ্ব কাহাকে পাঠান হউক। কিন্তু এই প্রস্তাব মত বিশাখের যুথের কোন মুগ যাইতে সন্মত না হওয়ায় হরিণী ভগ্নহৃদয়ে শ্রোগ্রোধের নিকট গিয়া সমস্ত কথা বলিল। শ্রোগ্রোধ হরিণীকে অভয় দিয়া স্বয়ং রাজবাটীর রন্ধনশালায় গিয়া বৃপকাষ্ঠে মাথা রাখিয়া শুইয়া রহিল। রাজা ব্রহ্মদত্ত

পূর্বেই অগ্রোধকে অভয় দান করিয়াছিলেন, এখন তাহার আসিবার কারণ শুনিয়া ও তাহার মহৎ অন্তঃকরণের পরিচয় পাইয়া মুগ্ধ হইলেন এবং প্রতিদিন অগ্রোধের বা বিশাখের যুথের একটি করিয়া হরিণ পাঠাইবার প্রথা রহিত করিয়া দিলেন। রাজা ব্রহ্মদত্ত মুগদিগকে ‘দায়’ অর্থাৎ সঙ্কট হইতে উদ্ধার করিয়াছিলেন বলিয়া, কিস্বা এই ‘দাব’ (অরণ্য) মধ্যে নিরাপদে বিচরণ করিতে দিয়াছিলেন বলিয়া এই স্থানের নাম মুগদায় বা মুগদাব হইয়াছিল। বর্তমান সারনাথ (শারঙ্গনাথ) নামও এই উপাখ্যান স্মরণ করাইয়া দেয়। সারনাথের আধ মাইল ব্যবধানে শারঙ্গনাথ নামক শিবের মন্দির আছে।

বুদ্ধদেব ঋষিপতনে উপস্থিত হইলে, তাঁহাকে দূর হইতে আসিতে দেখিয়া তাঁহার ভূতপূর্ব পাঁচটি সঙ্গী পরস্পর বলিতে লাগিলেন, “এ শ্রমণ গৌতম আসিতেছেন। এখানে এই ‘বাহুল্লিক’ (যাহার বাহাডুম্বর বেশী) এবং ‘প্রধান বিভ্রান্তো’ (বিভ্রান্ত) আসিলে আমরা প্রণাম বা অভ্যর্থনা করিব না; তবে যদি এখানে উপবেশন করিতে ইচ্ছা করেন তাহা হইলে ঐ আসনে বসিতে পারেন।” কিন্তু যখন বুদ্ধদেব নিকটবর্তী হইলেন তখন ভিক্ষু পাঁচজন আর তাঁহাদিগের সঙ্কল্প রক্ষা করিতে পারিলেন না, বুদ্ধদেবের নিকট ছুটিয়া গেলেন। একজন

বুদ্ধদেবের সারনাথে
আগমন ও ধর্ম প্রচার।

তাঁহার ভিক্ষাপাত্র ও উত্তরীয় লইলেন ; একজন তাঁহার বসিবার আসন প্রস্তুত করিয়া দিলেন ; তৃতীয় ব্যক্তি তাঁহার পা ধুইবার জল আনিয়া দিলেন । বুদ্ধদেব আসন গ্রহণ করিয়া হস্তপদাদি প্রক্ষালন করিলে পর ভিক্ষুরা তাঁহাকে নাম ধরিয়া ও বস্তু বলিয়া সম্বোধন করিলেন । বুদ্ধদেব এইরূপ সম্বোধন শুনিয়া তাঁহাদিগকে বলিলেন, “হে ভিক্ষুগণ, তথাগত সম্পূর্ণ সম্বোধিলাভ করিয়াছেন ; আর তোমরা তথাগতকে নাম ধরিয়া এবং বস্তু বলিয়া সম্বোধন করিও না । তোমরা শুন, আমি অর্হৎ (জীবন-মুক্ত) হইয়াছি । আমি অমৃত লাভ করিয়াছি । আমি যে পথ তোমাদিগকে দেখাইব সে পথ যদি গ্রহণ কর তাহা হইলে ধর্ম্মজীবনের চরম লক্ষ্য উপনীত হইতে সমর্থ হইবে ।” তারপর বুদ্ধদেব তাঁহার প্রসিদ্ধ ধর্ম্মচক্র প্রবর্তন নামক প্রথম সূত্র বিবৃত করিলেন ।

বুদ্ধদেব বলিলেন, “হে ভিক্ষুগণ, প্রব্রজিত ব্যক্তিগণ দুইটি চরম পথ অবলম্বন করিয়া থাকেন ; একটা ভোগ বিলাসের পথ, অপরটি কঠোর তপস্তার পথ । কিন্তু এই দুয়ের কোন একটা পন্থা অবলম্বন করিলে নির্বাণ বা মোক্ষলাভ করা যায় না । অতএব এই দুইটি পথই পরিত্যজ্য । এই দুইটি পথ পরিত্যাগ করিয়া মধ্যমা প্রতিপদা বা মধ্যপথ অবলম্বন করা কর্তব্য । সেই মধ্য

পথটি কি ? এই ‘আর্য্য অষ্টাঙ্গিক মার্গ’ সেই মধ্য পথ ।
 যথা—সম্মা দিট্টি—সম্যক্ দৃষ্টি ; সম্মা সংকল্পো—সম্যক্
 সংকল্প ; সম্মা বাচা—সম্যক্ বাক্য ; সম্মা কস্মাস্তো—
 সম্যক্ কস্মাস্তু ; সম্মা আজিবো—সম্যক্ আজীব ; সম্মা
 ব্যায়ামো—সম্যক্ ব্যায়াম ; সম্মা সতি—সম্যক্ স্মৃতি ;
 সম্মা সমাধি—সম্যক্ সমাধি । হে ভিক্ষুগণ, এই চারিটি
 আর্য্য সত্য । দুঃখ আর্য্য সত্য ; দুঃখ সমুদয় (দুঃখের
 কারণ) আর্য্য সত্য ; দুঃখ নিরোধ আর্য্য সত্য ; দুঃখ
 নিরোধগামিনী প্রতিপদা আর্য্য সত্য । দুঃখ
 কাহাকে বলে ? জাতি পি দুক্খা—জন্ম দুঃখকর,
 জরা পি দুক্খা—জরা দুঃখকর, ব্যাধি পি দুক্খা—ব্যাধি
 দুঃখকর, মরণম্ পি দুক্খম্—মরণ দুঃখকর, অগ্নিয়েহি
 সম্পযোগো দুক্খো—অপ্রিয় বস্তুর সংযোগ দুঃখকর, পিয়ে
 হি বিপ্লবযোগো দুক্খো—প্রিয় বস্তুর বিয়োগ দুঃখকর,
 ইয়ম্ পিয়ম ন লভতি তম পি দুক্খম্—আকাঙ্ক্ষিত বস্তুর
 অপ্রাপ্তি দুঃখকর । দুঃখ সমুদয় বা দুঃখের উৎপত্তি
 হয় কোথা হইতে ? তৃষ্ণা বা বাসনা হইতেই দুঃখের
 উৎপত্তি । দুঃখ নিরোধ হয় কি প্রকারে ? তৃষ্ণা বা
 বাসনার নিবৃত্তি হইলেই দুঃখের নিরোধ হয় । দুঃখের
 নিরোধের পথ কি ? হে ভিক্ষুগণ, এই আর্য্য অষ্টাঙ্গ
 মার্গ দুঃখ নিরোধের পথ । যথা : সম্যক্ দৃষ্টি—বিশুদ্ধ
 মত গ্রহণ ; সম্যক্ সংকল্প—উচিত কৰ্ম্ম করিবার ইচ্ছা ;

সম্যক্ বাক্য—সত্য কথা বলণ ; সম্যক্ কৰ্ম্মাস্তু—উচিত কাজ করা ; সমাগাজীব—সৎ পথে চলিয়া জীবিকা নির্বাহ করা ; সম্যক্ ব্যায়াম—উচিত চেষ্টা ; সম্যক্ স্মৃতি—সৎকথা স্মরণ করা ; সম্যক্ সমাধি—সত্যের ধ্যান ।”

বৌদ্ধ তীর্থরূপে
সারনাথ ।

পৃথিবীতে যত প্রকার বৌদ্ধ সম্প্রদায় আছে সকল সম্প্রদায়ের লোকই এই কতিপয় বাক্যকে বুদ্ধদেবের প্রথম উপদেশ বাক্য বলিয়া স্বীকার করিয়া থাকেন । এই কয়েকটি বাক্যে নিবন্ধ উপদেশই বৌদ্ধধর্মের সারকথা । এই উপদেশ বাক্যানিচয় ধর্মচক্রপ্রবর্তন সূত্র নামে প্রসিদ্ধ অর্থাৎ এই সকল উপদেশ বাক্য প্রচার করিয়া ভগবান গৌতম বুদ্ধ পৃথিবীতে নূতন ধর্মরাজ্য স্থাপনের সূত্রপাত করিয়াছিলেন । বারাণসীর উপকণ্ঠে মুগদাব ধ্বিষিণতনে বুদ্ধদেব এই কয়েকটি মহাবাক্য প্রচার করিয়াছিলেন বলিয়াই এই স্থানের এত মহিমা । মহাপরিনির্বাণসূত্রে কথিত আছে যে বুদ্ধদেব ইহলোক ত্যাগ করিবার পূর্বে তদীয় প্রিয় শিষ্য আনন্দকে বলিয়া যান যে বুদ্ধভক্তেরা চারিটি পবিত্র স্থান পরিদর্শন করিবেন । জন্মস্থান—কপিলবস্তুর লুম্বিনী নামক উদ্যান ; সম্বোধি বা সিদ্ধিলাভের স্থান—গয়ার নিকটবর্তী উরুবিল্ব (পালি উরুবেলা) গ্রামের (বর্তমান বুদ্ধগয়া) বোধিবৃক্ষ ;

ধর্মচক্র প্রবর্তনের স্থান—যুগদাব বা ঋষিপতন (সারনাথ);
 মহাপরিনির্বাণের স্থান—মল্লদিগের রাজধানী কুশীনগর
 (বর্তমান গোরখপুর জেলার অন্তর্গত কাশিয়া)। তদবধি
 এই সার্ক দ্বিসহস্র বৎসর ধরিয়া এই তীর্থচতুষ্টয়ের
 অন্যতম সারনাথ বুদ্ধভক্তজনের নিকট পূজা প্রাপ্ত
 হইয়া আসিতেছে।

দ্বিতীয় অধ্যায় ।

ইতিহাস ।

মৌর্য যুগের নিদর্শন—
অশোক স্তম্ভ ।

বুদ্ধের মহাপরিনির্বাণের পর হইতে মৌর্য সম্রাট অশোকের অভ্যুদয়ের পূর্ব পর্যন্ত ঋষিপতনের ইতিহাস অন্ধকারাচ্ছন্ন । এই সময়ে নিশ্চয়ই এখানে বৌদ্ধ সঙ্ঘারাম বা মঠ প্রতিষ্ঠিত হইয়াছিল । কিন্তু সেই প্রাচীন সঙ্ঘারামের কোনও চিহ্ন এ পর্যন্ত আবিষ্কৃত হয় নাই । মৌর্য সম্রাট অশোকের সময় হইতে খৃষ্টীয় দ্বাদশ শতাব্দী পর্যন্ত এই প্রায় সার্ব্ব সাহস্র বৎসরের সারনাথের ইতিহাস প্রাচীন স্থাপত্য ও ভাস্কর্যের ধ্বংসাবশেষ এবং ভগ্নস্তূপ অবিনশ্বর অক্ষরে লিখিয়া রাখিয়া গিয়াছে । অশোকের সময়ের তিনটি কীর্তির নিদর্শন এখনও সারনাথে বিদ্যমান—অশোকের অনুশাসন যুক্ত স্তম্ভ বা লাট, ইফ্টক নির্মিত ধর্ম্মরাজিকার (স্তূপের) ভিত্তি এবং একটি প্রস্তর বেদিকার (railing) ভগ্নাংশ । বৌদ্ধসঙ্গে দলাদলি নিবারণের নিমিত্ত মহারাজ অশোক অনুশাসন সহ উক্তস্তম্ভ আনুমানিক ২৫০ খৃষ্ট পূর্বাব্দে স্থাপিত করিয়াছিলেন । এই স্তম্ভটি ভগ্নাবস্থায় প্রাপ্ত

হইলেও ইহার উপরিভাগে উৎকীর্ণ অনুশাসনখানি প্রায় সম্পূর্ণ বিদ্যমান রহিয়াছে। (তৃতীয় অধ্যায় দ্রষ্টব্য)।

সারনাথে অশোকের দ্বিতীয় কীর্তি ইন্স্ক্রিপ্ট নির্মিত স্তূপঃ। বৌদ্ধ ধর্মগ্রন্থ পাঠে অবগত হওয়া যায় যে বুদ্ধদেবের মহাপরিনির্বাণের পরে তাঁহার দেহের ভস্ম আট ভাগ করা হইয়াছিল এবং রাজগৃহ, বৈশালী, কপিলবস্তু, অলকপ্প, রামগ্রাম, বেঠদীপ, পাবা ও কুশী নগর এই আটটি স্থানে তাহা প্রোথিত করিয়া তদুপরি এক একটি স্তূপ নির্মাণ করা হইয়াছিল। প্রবাদ আছে সম্রাট অশোক রামগ্রাম ব্যতীত অন্যান্য স্থানের স্তূপগুলি খনন করিয়া এবং ঐ সকল স্তূপে প্রোথিত বুদ্ধদেবের দেহের ভস্মাবশেষ ৮৪,০০০ ভাগে বিভক্ত করিয়া ৮৪,০০০ ধর্মরাজিকা বা স্তূপ নির্মাণ করাইয়াছিলেন। অশোক স্তম্ভের দক্ষিণে আবিস্কৃত যে ইন্স্ক্রিপ্ট নির্মিত স্তূপের ভস্মাবশেষ দেখিতে পাওয়া যায় তাহা আদৌ

ধর্মরাজিকা স্তূপ।

(১) স্তূপ ইষ্টক বা প্রস্তরে নিরেট ভাবে নির্মিত হইত। ইহা কোন সাধু বা বড়লোকের দেহাবশেষ রক্ষা করিবার জন্ত, কোন স্মরণীয় ঘটনা লোকের মনে জাগাইয়া রাখিবার জন্ত, অথবা কোনও মহৎ ব্যক্তির উদ্দেশে প্রতিষ্ঠিত হইত। এই জাতীয় স্তূপ বৌদ্ধ ও জৈন উভয় সম্প্রদায়ের লোকই নির্মাণ করিত। কোনও কোনও বৌদ্ধ গ্রন্থ অনুসারে কেবল বুদ্ধ বা চক্রবর্তীদিগের ভস্মাবশেষই স্তূপে সমাহিত হইবার যোগ্য বিবেচিত হইত, কিন্তু সাধারণতঃ বৌদ্ধ ভিক্ষু এবং আচার্যগণও এই সম্মান পাইতেন।

রাজা অশোক কর্তৃক নির্মিত হইয়াছিল এবং প্রায় দেড় হাজার বৎসর পরে তাহার আয়তন অনেকটা বদ্ধিত করা হইয়াছিল। ১৭৯৪ খৃষ্টাব্দের জানুয়ারি মাসে কাশীর রাজার দেওয়ান বাবু জগৎসিংহ এই স্তূপটী বিধ্বস্ত করিয়া ইহার উপাদান লইয়া কাশীতে জগৎগঞ্জ স্থাপন করিয়া ছিলেন বলিয়া প্রত্নতাত্ত্বিকেরা এই স্তূপের ধ্বংসাবশেষকে ‘জগৎসিংহ স্তূপ’ বলিতেন। রায় বাহাদুর দয়ারাম সাহনৌ কৃত সারনাথ বিবরণের তৃতীয় সংস্করণে এই স্তূপকে ‘ধর্ম-রাজিকা’ নামে অভিহিত করা হইয়াছে।

অশোক নির্মিত
বেদিকা।

অশোকের তৃতীয় কীর্তি একটী প্রস্তর বেদিকা (railing) বা প্রাচীর। ১৯০৪-৫ খৃষ্টাব্দে কাশীর ইঞ্জিনিয়ার ওরটেল (Oertel) সাহেব সারনাথের প্রধান মন্দিরের (main shrine) দক্ষিণ কক্ষের ভিত্তি খনন করিতে গিয়া ইহা আবিষ্কার করেন। রায় বাহাদুর পণ্ডিত দয়ারাম সাহনৌ অনুমান করেন যে এই বেদিকা অশোকনির্মিত স্তূপের উপরিভাগের হর্মিকায় নিবদ্ধ ছিল।

শুদ্ধ যুগের নিদর্শন।

আনুমানিক ২৩১ খৃষ্ট পূর্বাব্দে অশোকের দেহা-বসানের অনতিকাল পরেই মৌর্যসাম্রাজ্যের গৌরব রবি অন্তমিত হইয়াছিল। ধর্ম প্রচার করাই সম্রাট অশোকের একমাত্র লক্ষ্য হওয়ায় মৌর্য সাম্রাজ্যের

রাষ্ট্রীয় বন্ধন দূতর করিবার তিনি অবকাশ পান নাই। খৃষ্টপূর্ব দ্বিতীয় শতাব্দীর প্রারম্ভে গান্ধার, কপিশা, অন্ধ্র ও কলিঙ্গ প্রভৃতি দেশগুলি স্বাধীনতা অবলম্বন করিয়াছিল। আনুমানিক ১৮৪ খৃষ্ট পূর্বাব্দে ‘সেনাপতি’ পুষ্যমিত্র তাঁহার প্রভু মৌর্য্যরাজ বৃহদ্রথকে হত্যা করিয়া পাটলিপুত্রের সিংহাসন অধিকার করিয়া শুঙ্গ রাজবংশের প্রতিষ্ঠা করিয়াছিলেন। পুষ্যমিত্র ব্রাহ্মণ ছিলেন এবং অশ্বমেধ যজ্ঞাদির অনুষ্ঠান করিয়াছিলেন। তিনি এবং তাঁহার উত্তরাধিকারিগণ বৌদ্ধধর্ম্ম সম্বন্ধে উদাসীন ছিলেন বলিয়া সারনাথে শুঙ্গ সম্রাটদিগের কোন খোদিত লিপি পাওয়া যায় নাই, কেবল ঐ সময়কার প্রস্তর বেদিকার কয়েকটা স্তম্ভ প্রধান মন্দির ও অশোক স্তম্ভের চারিদিকে পাওয়া গিয়াছে। এই স্তম্ভগুলিতে ব্রাহ্মী অক্ষরে দাতৃগণের নাম উৎকীর্ণ আছে। ঐ সময়কার একটি স্তম্ভশীর্ষ প্রধান মন্দিরের উত্তর-পশ্চিম দিকে পাওয়া গিয়াছে এবং ১৯০৬-৭ খৃষ্টাব্দে উক্ত মন্দির খননকালে একটি প্রস্তর নির্মিত শুঙ্গ যুগের নরমুণ্ডের ভগ্নাংশ [বি১] আবিষ্কৃত হইয়াছে। বোধগয়া, ভারহুত, সাঁচী প্রভৃতি স্থানের কীর্ত্তি চিহ্ন দেখিলে মনে হয় যে শুঙ্গ রাজগণ বৌদ্ধ না হইলেও তৎকালে জনসাধারণের বৌদ্ধ ধর্ম্মে অনুরাগ বৃদ্ধি প্রাপ্ত হইয়াছিল। শুঙ্গ বংশীয় শেষ রাজা দেবভূমি বা দেবভূতি

অত্যন্ত দুশ্চরিত্র ছিলেন এবং এই নিমিত্ত তাঁহার ব্রাহ্মণ মন্ত্রী বাসুদেব আনুমানিক ৭২ পূর্ব খৃষ্টাব্দে তাঁহাকে হত্যা করিয়া পাটলিপুত্রের সিংহাসন অধিকার করিয়া ছিলেন। এই রূপে শুঙ্গ বংশের পতন হয়। তৎপরবর্ত্তী যুগের প্রাচ্য ভারতের ইতিহাস ঘোর তমসচ্ছন্ন।

কুষাণ যুগের নিদর্শন—
বোধিসত্ত্ব মূর্ত্তি, চিত্র
৩ দণ্ড।

খৃষ্টীয় প্রথম শতাব্দীর মধ্যভাগে (আনুমানিক ৬০ খৃঃ) ইয়ুটি বংশোদ্ভব কুষাণগণ পাঞ্জাব প্রদেশ অধিকার করিয়াছিলেন। যিনি এই সাম্রাজ্যের ভিত্তি স্থাপন করিয়া ছিলেন তাঁহার নাম কুজল কদফিস (Kujala Kadphises)। তাঁহার উত্তরাধিকারী বিম কদফিস (Vema Kadphises) বোধ হয় বারাণসী পর্য্যন্ত সাম্রাজ্য বিস্তার করিয়াছিলেন। আনুমানিক ১২৫ খৃষ্টাব্দে কুষাণবংশীয় কণিষ্ক রাজ্যলাভ করিয়াছিলেন। কোন কোন পণ্ডিত মনে করেন কণিষ্ক ৭৮ খৃষ্টাব্দে সিংহাসনে আরোহণ করিয়াছিলেন এবং তাঁহার অভিষেকের দিন হইতে শকাব্দ গণিত হইতেছে। কণিষ্ক চীনের সীমান্ত পর্য্যন্ত কুষাণ সাম্রাজ্য বিস্তৃত করিয়াছিলেন। প্রথমে কণিষ্ক জোরোস্ট্রীয় (Zoroastrian) দেবতাগণের উপাসনা করিতেন, কিন্তু পরে মৌর্য্য সাম্রাজ্য অশোকের ন্যায় বৌদ্ধ ধর্ম গ্রহণ করিয়াছিলেন এবং সম্ভবতঃ তাঁহারই সময়ে মহাযান মতের প্রতিষ্ঠা হইয়াছিল। কণিষ্কের রাজত্ব

কালে নানা স্থানে বৌদ্ধ মন্দির ও স্তূপাদি নির্মিত হইয়াছিল। সারণাথে কণিকের সময়ের একটী বৃহৎ বোধি-সত্ত্ব মূর্তি (চিত্র ৭) এবং প্রকাণ্ড ছত্র ও দণ্ড [বি (এ) ১] পাওয়া গিয়াছে। এই মূর্তির পাদপীঠে ও পশ্চাতে এবং ইহার ছত্রের দণ্ডে যে তিনটী লিপি খোদিত আছে তাহা পাঠে অবগত হওয়া যায় যে মহারাজ কণিকের তৃতীয় রাজ্য্যাক্ষে বারাণসীতে বুদ্ধদেবের পাদচারণ স্থানে ত্রিপিটক-বিদ্ ভিক্ষু বল একটী বোধিসত্ত্ব মূর্তি এবং ছত্র ও যষ্টি প্রতিষ্ঠিত করিয়াছিলেন। এই খোদিত লিপিতে মহাক্ষত্রপ (Great Satrap) খরপল্লান এবং ক্ষত্রপ (Satrap) বনস্পরের নামও উল্লিখিত হইয়াছে। ইহা হইতে অনুমান হয় যে সারণাথ ও বারাণসী তখন কুষাণ সাম্রাজ্যের অন্তর্ভূত ছিল এবং মহাক্ষত্রপ খরপল্লান তৎপ্রদেশের প্রধান শাসনকর্তা ছিলেন। কুষাণযুগের আর একটী নিদর্শন, প্রধান মন্দিরের উত্তর-পশ্চিম কোণে অবস্থিত স্তূপের নিকট আবিষ্কৃত একখানি শিলালিপি। ইহাতে বৌদ্ধদিগের আর্য্যসত্য চতুষ্টয়ের কথা লিখিত আছে [ডি (সি) ১১]।

মহারাজ কণিকের পরে বাসিক ও বাসিকের পরে ছবিক কুষাণ সাম্রাজ্যের অধিকার প্রাপ্ত হইয়াছিলেন এবং তাঁহার মৃত্যুর পর বাসুদেব কুষাণ সিংহাসনে

আরোহণ করিয়াছিলেন। মথুরা ব্যতীত ভারতবর্ষের অন্য কোনও স্থানে ছবিঙ্কের এবং বাসুদেবের সময়ের খোদিত লিপি এখনও আবিষ্কৃত হয় নাই বলিয়া কুষাণ সাম্রাজ্যের সহিত বারাণসীর তখন কিরূপ সম্বন্ধ ছিল তাহা নির্ণয় করা কঠিন।

গুপ্ত যুগে সারনাথ।

খৃষ্টীয় তৃতীয় শতাব্দীর বারাণসীর ইতিহাস একেবারে অন্ধকারাচ্ছন্ন। চতুর্থ শতাব্দীর প্রারম্ভে লিচ্ছবি রাজবংশের জামাতা চন্দ্রগুপ্ত মগধে একটা নূতন রাজ্য স্থাপনের সূচনা করিয়াছিলেন। চন্দ্রগুপ্তের পিতা ঘটোৎকচ গুপ্ত সম্ভবতঃ সামান্য সামন্ত নরপতি ছিলেন। ৩১৯ খৃষ্টাব্দে চন্দ্রগুপ্তের অভিষেক কাল হইতে ‘গুপ্তাব্দ’ নামে একটা নূতন অব্দ প্রচলিত হয়। খৃষ্টীয় চতুর্থ শতাব্দীর মধ্যভাগে (৩৩৫ খৃষ্টাব্দে) লিচ্ছবি রাজবংশের দৌহিত্র ও চন্দ্রগুপ্তের পুত্র সমুদ্রগুপ্ত সিংহাসনে আরোহণ করিয়াছিলেন। তাঁহার রাজত্বকালে উত্তর এবং পূর্ব ভারতে গুপ্ত প্রভাব বিস্তৃত হইয়াছিল। সমুদ্রগুপ্তের দিগিজয় কাহিনী প্রয়াগের অশোকস্তম্ভ গাত্রে উৎকীর্ণ রহিয়াছে। তিনি ব্রাহ্মণ্য ধর্ম্মাবলম্বী ছিলেন এবং অশ্বমেধ যজ্ঞাদি করিয়াছিলেন। এই সময়ে ব্রাহ্মণ্য ধর্ম্মের পুনরভ্যুদয়ের সূত্রপাত হয়। আনুমানিক ৩৮০ খৃষ্টাব্দে সম্রাট সমুদ্রগুপ্তের দেহাবসানের পর তদীয় পুত্র দ্বিতীয় চন্দ্রগুপ্ত সিংহাসনে আরোহণ করিয়া

বিক্রমাদিত্য উপাধি ধারণ পূর্ব ৮৪১৩ খৃষ্টাব্দ পর্য্যন্ত রাজত্ব করিয়াছিলেন। তাঁহার রাজত্ব কালে চীনদেশীয় পরিব্রাজক ফা-হিয়ান ভারতবর্ষে আসিয়াছিলেন এবং তাঁহার ভ্রমণ বৃত্তান্তে ঋষিপতনের নাম উল্লেখ করিয়া গিয়াছেন।

প্রথম চন্দ্রগুপ্ত, সমুদ্রগুপ্ত এবং দ্বিতীয় চন্দ্রগুপ্তের কোন লিপি বা মুদ্রা সারনাথে পাওয়া যায় নাই, তবে কাশী যে সে সময় গুপ্ত সাম্রাজ্যের অধীন ছিল সে বিষয় কোন গন্দেহ নাই। ৪১৩ খৃষ্টাব্দে দ্বিতীয় চন্দ্রগুপ্তের মৃত্যুর পর প্রথম কুমারগুপ্ত রাজা হইয়াছিলেন এবং ৪৫৫ খৃষ্টাব্দ পর্য্যন্ত রাজত্ব করিয়াছিলেন। সারনাথে ধর্ম্মরাজিকা (জগৎসিংহ) স্তূপের দক্ষিণে আবিস্কৃত একটা বুদ্ধমূর্ত্তির [বি(বি)১৭৩] নিম্নদেশে “দে (য়) ধর্ম্মোহয়ং কুমারগুপ্তস্য” লিপি উৎকীর্ণ থাকায় প্রমাণ হইতেছে যে বোধ হয় ইহা রাজা কুমারগুপ্ত কর্তৃক প্রদত্ত হইয়াছিল। কুমারগুপ্তের পর তদীয় জ্যেষ্ঠপুত্র স্কন্দগুপ্ত সাম্রাজ্য লাভ করিয়াছিলেন। স্কন্দগুপ্তের সময় পুষ্যমিত্রীয় ও হুণগণ আর্য্যাবর্ত্ত আক্রমণ করিলে তিনি প্রথম বারে আক্রমণকারিদিগকে পরাজিত করিয়াছিলেন; কিন্তু খৃষ্টীয় পঞ্চম শতাব্দীর শেষভাগে হুণগণ পুনরায় ভারত-বর্ষে প্রত্যাগমন করিয়াছিল এবং কপিশা ও গাঙ্কার

গুপ্ত যুগের নিদর্শন—
কুমারগুপ্ত ও বুদ্ধ
গুপ্তের রাজ্যকালের
বুদ্ধমূর্ত্তি।

অধিকার করিয়া একটি নূতন রাজ্য প্রতিষ্ঠিত করিতে সমর্থ হইয়াছিল। অনেকে অনুমান করেন যে ৪৬৭-৪৬৮ খৃষ্টাব্দে মহারাজাধিরাজ স্কন্দগুপ্তের মৃত্যুর পর তাঁহার কোন সন্তানাদি না থাকায় তদীয় বৈমাত্রেয় ভ্রাতা পুরগুপ্ত সিংহাসনে অধিরোহণ করিয়াছিলেন। তিনি অল্পকালই রাজত্ব করিয়াছিলেন। ৪৬৯ খৃষ্টাব্দে তাঁহার পুত্র নরসিংহগুপ্ত পিতৃসিংহাসনে আরোহণ করিয়াছিলেন। আনুমানিক ৪৭৩ খৃষ্টাব্দে নরসিংহগুপ্ত পরলোক গমন করিলে তাঁহার পুত্র দ্বিতীয় কুমারগুপ্ত সাম্রাজ্য লাভ করিয়াছিলেন। ১৯১৪-১৫ খৃষ্টাব্দে হারগ্রীবস্ (Hargreaves) সাহেব সারনাথে একটি বুদ্ধমূর্ত্তি আবিষ্কার করিয়াছেন। এই মূর্ত্তির পাদপীঠে (pedestal) একটি লিপি উৎকীর্ণ আছে। ইহা হইতে অবগত হওয়া যায় যে ১৫৪ গুপ্ত সম্বতে (৪৭৩-৪৭৪ খৃঃ) কুমারগুপ্তের শাসনকালে ভিক্ষু অভয়মিত্র কর্তৃক এই বুদ্ধ মূর্ত্তিটি প্রতি-

(১) গংজি ১—বর্ষশতে গুপ্তানাং সচতুঃ পঞ্চাশত্ত্বতরে ভূমিং রক্ততি কুমার
গুপ্তে মাসে জ্যৈষ্ঠে দ্বিতীয়ায়াম্ ।

„ ২—ভক্তাবজ্জিত মনসা যতিনা পূজার্থমভয়মিত্রেণ প্রতিমা-
প্রতিমস্ত গুণৈ [র] প [রে] যং [কা] রিতা শাস্ত্বঃ ।

„ ৩—মাতাপিতৃগুর পূর্ত্তিঃ পুণ্যোনানেন সত্কায়োং লভতা-
মভিমতমুপশম হ যাম্ ॥

A. S. R., Part II, 1914-15, page 124.

ষ্ঠিত হইয়াছিল। হারগ্রীবস্ সাহেব কর্তৃক আবিষ্কৃত আর একটা বুদ্ধ মূর্তির পাদপীঠে একটা খোদিত লিপিতে লিখিত আছে যে ১৫৭ সম্বতের বৈশাখ মাসের কৃষ্ণ পক্ষের সপ্তমী তিথিতে মূলা নক্ষত্রে বুদ্ধগুপ্তের শাসন কালে ভিক্ষু অভয়মিত্র কর্তৃক এই প্রতিমা প্রতিষ্ঠিত হইয়াছিল। ইহাতে দেখা যায় যে পঞ্চম শতাব্দীর শেষভাগে বুদ্ধগুপ্তের শাসনকালে কাশীজনপদ গুপ্ত সাম্রাজ্যের অন্তর্ভুক্ত ছিল।

মালবদেশের অন্তর্গত মন্দশোর নগরের সন্নিধানে প্রাপ্ত প্রস্তরস্তম্ভে খোদিত প্রশস্তি পাঠে অনুমান হয় যে ৫৩৩ খৃষ্টাব্দের পূর্বে যশোধর্ম্য হুনাধিপ মিহির কুলকে পরাজিত করিতে সমর্থ হইয়াছিলেন। ইহার অনতিকাল পরেই অথবা প্রায় এই সময়ে বর্তমান যুক্ত প্রদেশে মোখরী বংশের প্রধান্য প্রতিষ্ঠিত হয়। বার-বাঁকী জেলার অন্তর্গত হাড়াহা নামক গ্রামের নিকট প্রাপ্ত একখানি খোদিত শিলাফলক হইতে অবগত হওয়া

যষ্ঠ ও সপ্তম শতাব্দীতে
সারনাথ—মোখরী
বর্দ্ধন বংশের রাজ্যকাল—
হয়েও সত্তর সারনাথ
বর্ণন।

(১) গুপ্তান্য সমতিক্রান্তে সন্তপকশত্বস্তরে। শতে সমান্য পৃথিবীং
বুদ্ধগুপ্তে প্রশাসতি ॥ বৈশাখমাসসপ্তম্যাং মূলে শ্রামগতে ময়া। কারিতা
ভয়মিত্রেণ প্রতিমা শাক্যভিক্ষুণা ॥ ইমামুজ্জন্তসচ্ছত্র পদ্মাসনবিভূষিতাং।
দেব পুত্রবতো দিব্যাং চিত্রবিদ্যা সচিব্রিতাং ॥ যদত্র পুণ্যং প্রতিমাং কারয়িত্বা
মম ভূতম। মাতাপিত্রৌত্তরুণাংচ লোকস্ত চ শমাশ্রয়ে ॥

Ibid, p. 125.

ষায়, ৬১১ বিক্রম সম্বতে (৫৫৪ খৃঃ) মোখরীরাজ ঈশান
 বর্মা রাজত্ব করিতেছিলেন। এই লিপিতে কথিত হইয়াছে
 যে ঈশানবর্মা অন্ধ্রপতিকে পরাজিত করিয়াছিলেন এবং
 সমুদ্রগীরবাসী গোড়গণকে বিতাড়িত করিয়াছিলেন।
 স্ততরাং কাশী মোখরীরাজ্যের অন্তর্ভুক্ত ছিল এরূপ
 অনুমান করা যাইতে পারে। ঈশানবর্মানের পরে
 যথাক্রমে শর্কবর্মা এবং অবন্তীবর্মা মোখরী সিংহাসনে
 আরোহণ করিয়াছিলেন। খৃষ্টীয় সপ্তম শতাব্দীর প্রথম
 ভাগে মোখরী অবন্তীবর্মানের পুত্র এবং হর্ষবর্দ্ধনের
 ভগ্নীপতি গ্রহবর্মানকে কান্নকুজে প্রতিষ্ঠিত দেখিতে
 পাই। আনুমানিক ৬০৫ খৃষ্টাব্দে গ্রহবর্মা মালবরাজ
 দেবগুপ্ত কর্তৃক নিহত হইয়াছিলেন। তৎপরে হর্ষবর্দ্ধনের
 অগ্রজ রাজ্যবর্দ্ধন গ্রহবর্মার পত্নী রাজ্যশ্রীকে উদ্ধার
 করিবার মানসে কান্নকুজে আগমন করিলে গোড়াধিপ
 শশাঙ্ক কর্তৃক নিহত হইয়াছিলেন। রাজ্যবর্দ্ধনের মৃত্যুর
 পর তদীয় অনুজ হর্ষবর্দ্ধন স্থানীশ্বরের সিংহাসনে আরোহণ
 করিয়াছিলেন। তাঁহার রাজত্ব কালে, ৬২৯ হইতে ৬৪৫
 খৃষ্টাব্দের মধ্যে, চীনদেশীয় বৌদ্ধ পরিব্রাজক হুয়েন্সঙ
 ভারতভ্রমণে ব্যাপৃত ছিলেন এবং হর্ষবর্দ্ধনের সহিত
 সাক্ষাৎ করিয়াছিলেন। হুয়েন্সঙ লিখিয়াছেন যে
 রাজ্যলাভের পর ছয় বৎসরের মধ্যে হর্ষবর্দ্ধন (শিলাদিত্য)
 সমস্ত আর্য্যাবর্ত্ত (পঞ্চ গোড়) স্বীয় পদানত করিয়াছিলেন।

তাঁহার রাজধানী স্থানীশ্বর (থানেশ্বর) হইতে কান্ধকুজে স্থানান্তরিত হইয়াছিল। হুয়েৎসঙ্ তাঁহার ভ্রমণবৃত্তান্তে এই সময়কার সারনাথের অতি সুন্দর বিবরণ প্রদান করিয়াছেন। তিনি বারাণসীর উত্তর-পূর্ব দিকে অবস্থিত শতফিট উচ্চ অশোক নিৰ্ম্মিত একটী স্তূপের উল্লেখ করিয়াছেন। হুয়েৎসঙ্ লিখিয়াছেন, এই স্তূপের সম্মুখে সবুজ প্রস্তরের অতি মসৃণগাত্র একটী স্তম্ভ ছিল। এই স্তম্ভের কোনও চিহ্ন এ পর্য্যন্ত আবিষ্কৃত হয় নাই। তৎকালের যুগদাব বা সারনাথ সম্বন্ধে হুয়েৎসঙ্ লিখিয়াছেন, এই স্থানের সুবিশাল সজ্জারাম তখন আট ভাগে বিভক্ত ছিল এবং সমুদয় সজ্জারাম একটী প্রাচীরের দ্বারা বেষ্টিত ছিল। এই সজ্জারামে তখন হীনবান সম্রাটীয় সম্প্রদায়ের ১৫০০ বৌদ্ধ ভিক্ষু বাস করিতেন। সজ্জারামের অভ্যন্তরে দুই শত ফিটেরও অধিক উচ্চ চমৎকার কারুকার্যমণ্ডিত একটী মন্দির ছিল। এই মন্দিরের অভ্যন্তরে ধাতুনিৰ্ম্মিত মানুষপ্রমাণ ধৰ্ম্মচক্র প্রবর্তনরত বুদ্ধদেবের মূৰ্ত্তি প্রতিষ্ঠিত ছিল। হুয়েৎসঙ্ এই মন্দিরের দক্ষিণ-পশ্চিম দিকে অবস্থিত অশোকের নিৰ্ম্মিত শতফিট উচ্চ ধৰ্ম্মরাজিকা স্তূপ ভগ্নাবস্থায় দেখিতে পাইয়াছিলেন। এই স্তূপের সম্মুখভাগে তখন ৭০ ফিট উচ্চ অতি মসৃণগাত্র পাষাণ স্তম্ভ দণ্ডায়মান ছিল বলা বাহুল্য এই স্তম্ভেরই ভগ্নাংশের উপর অশোকের

অনুশাসন খোদিত রহিয়াছে এবং এই স্তম্ভের শীর্ষদেশে চারিটা সিংহমূর্তিমণ্ডিত ছিল। হুয়েন্সঙ লিখিয়াছেন, “সম্বোধি লাভের পর, বুদ্ধদেব যে স্থানে (বসিয়া) প্রথম ধর্ম প্রচার করিয়াছিলেন সেই স্থানে এই স্তম্ভ প্রতিষ্ঠিত হইয়াছে।” হুয়েন্সঙ মৃগদাবের অপরূপ অংশেরও বিস্তৃত বিবরণ প্রদান করিয়াছেন, বাহুল্য ভয়ে এখানে তাহা উদ্ধৃত হইল না। হুয়েন্সঙের সময়ে কাশী প্রদেশ অবশ্য হর্ষবর্দ্ধনের প্রতিষ্ঠিত কাণ্ডকুজের সাম্রাজ্যের অন্তর্ভূত ছিল এবং এই অবধি খ্রীষ্টীয় দ্বাদশ শতাব্দীর শেষভাগে মুসলমান বিজয় পর্যন্ত সারনাথের ভাগ্যলক্ষ্মী কাণ্ডকুজেশ্বরের ভাগ্যলক্ষ্মীর অনুসারিণী ছিলেন।

কাণ্ডকুজরাজ যশোবর্মা,
আয়ুধ ও প্রতীহার
রাজবংশ।

৬৪৭ খ্রীষ্টাব্দে হর্ষবর্দ্ধনের মৃত্যুর পর আর্যাবর্তের ইতিহাসে আর এক অন্ধকারাচ্ছন্ন যুগের সূচনা হয়। তারপর অষ্টম শতাব্দীর প্রথমার্ধে কাণ্ডকুজের সিংহাসনে যশোবর্মা নামক একজন পরাক্রান্ত নৃপতিকে প্রতিষ্ঠিত দেখিতে পাওয়া যায়। যশোবর্মা এক সময়ে মগধ ও বঙ্গ পর্যন্ত স্বীয় আধিপত্য বিস্তৃত করিয়াছিলেন, কিন্তু পরে কাশ্মীররাজ ললিতাদিত্য কর্তৃক পরাজিত এবং

(১) S. Beal, *Buddhist Records of the Western World*, London, 1906, Vol. II, pp. 45-60; *Walters On Yuan Chwang's Travels in India*, Vol. II, pp. 48-56.

সিংহাসনচ্যুত হইয়াছিলেন। অষ্টম শতাব্দীর শেষভাগে
আয়ুধবংশীয় নৃপতিগণ কাশ্যকুঞ্জের সিংহাসনে অধিরূঢ়
ছিলেন। নবম শতাব্দীর প্রথমপাদে গোড়াধিপ ধর্মপাল
ইন্দ্রায়ুধকে সিংহাসনচ্যুত করিয়া অনুগত চক্রায়ুধকে
কাশ্যকুঞ্জের সিংহাসনে প্রতিষ্ঠিত করিয়াছিলেন। এই
সময় হইতে রাজপুতানার অন্তর্গত ভিল্মমালের প্রতীহার,
দাক্ষিণাত্যের অন্তর্গত মালখাড়ের রাষ্ট্রকূট এবং গোড়ের
পাল এই তিন বংশের নৃপতিগণকে আর্য্যাবর্তের সার্ব-
ভৌমত্ব লইয়া বিরোধে ব্যাপ্ত দেখিতে পাওয়া যায়।
খৃষ্টীয় নবম শতাব্দীর মধ্যভাগে প্রতীহার বংশীয় মিহির-
ভোজ (আদিবরাহ) স্থায়ীভাবে কাশ্যকুঞ্জ অধিকার
করিতে সমর্থ হইয়াছিলেন এবং একাদশ শতাব্দীর দ্বিতীয়
পাদের প্রথম ভাগ পর্য্যন্ত তাঁহার উত্তরাধিকারিগণ কাশ্য-
কুঞ্জের সিংহাসনে অধিষ্ঠিত ছিলেন। সারনাথে প্রতীহার
রাজগণের বা তাঁহাদের নাম যুক্ত কোনও কীর্ত্তিচিহ্ন
এথাবৎ পাওয়া যায় নাই।

সারনাথের প্রাপ্ত খৃষ্টীয় নবম শতাব্দীর প্রচলিত
অক্ষরে খোদিত একখানি শিলালিপিতে [ডি(এফ)৫৯]

পালরাজত্বের নিদর্শন—
মহীপালের কীর্ত্তি;
১০২৫ খৃষ্টাব্দের শিলা-
লিপি।

(১) বিশ্বপালঃ ॥ দশ চৈতাম্বস্ত যৎ পুণ্যং কারয়িত্বাজ্জিতং ময়া
সর্বলোকো ভবেৎতেন সর্বজ্ঞঃ করুণাময়ঃ ॥ ত্রীজয়পাল
এতাহুদ্দিগু কারিতমামৃতপালে [ন]।

দাতারূপে শ্রীজয়পালের নাম দৃষ্ট হয়। পণ্ডিতেরা অনুমান করেন এই জয়পাল গোড়াধিপ ধর্মপালের ভ্রাতুষ্পুত্র। সারনাথে প্রাপ্ত কষ্টিপাথরের একখানি বুদ্ধ মূর্তির পাদপীঠে উৎকীর্ণ ১০৮৩ বিক্রম সম্বতের (১০২৫ খ্রীষ্টাব্দের) একখানি লিপি [বি(সি)১] হইতে জানা যায় গোড়াধিপ মহীপাল, স্থিরপাল এবং বসন্তপালের দ্বারা কাশীধামে ঈশানের (শিবের) ও চিত্রঘণ্টার (দুর্গার) মন্দির এবং আরও শত শত কীর্তি রত্ন প্রতিষ্ঠিত করাইয়াছিলেন। স্থিরপাল এবং বসন্তপাল সারনাথে ধর্মরাজিকা স্তূপ এবং বিহার ও মন্দিরাদি সংস্কার করিয়াছিলেন এবং একখানি শিলাফলকে আটটি মহাস্থানে সংঘটিত গৌতম বুদ্ধের জীবনের আটটি প্রধান ঘটনার চিত্র অঙ্কিত করাইয়া তাহা একটা নবনির্মিত গন্ধকুটিতে প্রতিষ্ঠিত করিয়াছিলেন।

(১) ১। ওঁ নমো বুদ্ধায় ॥ বারান(প)শী(সী)-সরস্তা-গুপ্তব-শ্রীবামরাসি
পাদজিঃ।

আরাধ্য নমিত-ভূপতি-শিরোরূহৈঃ শৈবলাবীশং ॥

ই (ঈ)শান-চিত্রঘণ্টাদি-কীর্তি রত্নশতানি যৌ।

গোড়াধিপো মহীপালঃ কাষ্ঠাঃ শ্রীমানকার[য়ঃ] ॥

২। সফলীকৃতপাণ্ডিত্যো বোধীরবিনিবর্তিনৌ।

তৌ ধর্মরাজিকং সাক্ষং ধর্মচক্রং পুনর্বম ॥

কৃতবন্তৌ চ নবীনামষ্টমহাস্থান শৈল-গন্ধকুটং।

এতাং শ্রীস্থিরপালো বসন্তপালোহমুজঃ শ্রীমান ॥

৩। সংবৎ ১০৮৩ পৌষ দিনে ১১ [II]

Catalogue of the Museum of Archaeology at Sarnath, p. 8.

১০১৮ খৃষ্টাব্দে গজনীর সুলতান মামুদ কান্ধকুজ আক্রমণ করিয়া সেই মহানগর বিধ্বস্ত করিয়াছিলেন। এই সময় কান্ধকুজের সিংহাসনে অধিষ্ঠিত ছিলেন প্রতীহারবংশীয় রাজ্যপাল। মামুদ কর্তৃক কান্ধকুজ ধ্বংসের পরেই প্রতীহার বংশ না হউক প্রতীহার রাজ্য কার্যতঃ ধ্বংস প্রাপ্ত হইয়াছিল এবং প্রাচ্য ভারতের আধিপত্য লইয়া গোঁড়াধিপ মহীপাল এবং ত্রিপুরিরাজ কলচুরি বা হৈহয়বংশীয় গাঙ্গেয় বিক্রমাদিত্যের মধ্যে বিরোধ উপস্থিত হইয়াছিল। এই সূত্রে কাশী প্রদেশ বোধ হয় এক সময় পাল নরপালের পদামত হইয়াছিল। ধামেক স্তূপের উত্তর দিকে ছয় খণ্ডে বিভক্ত একখানি লিপিস্থক্ত শিলাফলক [ডি (এল)৮] আবিষ্কৃত হইয়াছে। এই ফলকের লিপিতে কথিত হইয়াছে, ১০৫৮ খৃষ্টাব্দের ৪ঠা অক্টোবর তারিখে কলচুরি বংশীয় (গাঙ্গেয় বিক্রমাদিত্যের পুত্র) পরমভট্টারক মহারাজাধিরাজ কর্ণদেবের কল্যাণবিজয় রাজ্যকালে উপাসিকা মামকা একখানি অষ্টসাহস্রিকা প্রজ্ঞাপারমিতা লিপিবদ্ধ করাইয়া তাহা এবং অন্যান্য দ্রব্য ভিক্ষুগণকে দান করাইয়াছিলেন। এই লিপি পাঠে অনুমান হয় ১০৫৮ খৃষ্টাব্দে সারনাথ কলচুরি রাজ্যের অন্তর্ভুক্ত ছিল।

কলচুরি রাজ কর্ণদেবের
১০৫৮ খৃষ্টাব্দের শিলা-
লিপি।

গাহড়বাল রাজ্যে সারনাথ; কুমরদেবী প্রতিষ্ঠিত বৌদ্ধ বিহার; মুসলমান আক্রমণ ও দখল।

খৃষ্টীয় একাদশ শতাব্দীর শেষ ভাগে গাহড়বাল বংশীয় চন্দ্রদেব কাশ্যকুজের এক নবরাজ্য প্রতিষ্ঠিত করিয়াছিলেন। এই রাজ্য শতাব্দী কাল স্থায়ী হইয়াছিল এবং কাশী প্রদেশ বরাবর এই রাজ্যের অন্তর্ভুক্ত ছিল। সারনাথে আবিষ্কৃত একখানি শিলালিপি [ডি (এল) ৯] হইতে জানা যায় চন্দ্রদেবের পৌত্র গাহড়বাল-রাজ গোবিন্দচন্দ্রের পত্নী কুমরদেবী সারনাথে একটা বিহার প্রতিষ্ঠিত করাইয়াছিলেন। এতদ্ব্যতীত আর কোন গাহড়বাল কীর্তি সারনাথে এ পর্য্যন্ত আবিষ্কৃত হয় নাই। ১১৯৪ খৃষ্টাব্দে গোবিন্দচন্দ্রের পৌত্র জয়চন্দ্র সুলতান মৈজুদ্দীন মহম্মদ ইব্ন সাম কর্তৃক পরাজিত ও নিহত হইলে ১১৯৫ খৃষ্টাব্দে বারাণসী মুসলমান সেনাপতি কুতুবুদ্দীন আইবক কর্তৃক লুণ্ঠিত হইয়াছিল এবং সেই সময়ে সম্ভবতঃ সারনাথের অনেক বৌদ্ধকীর্তিও বিনষ্ট হইয়াছিল। এই ঘটনার পরে সারনাথের উপর যে যবনিকা পতিত হয় তাহা প্রথম উত্তোলিত হয় ঠিক ছয় শত বৎসর পরে, ১৭৯৪ খৃষ্টাব্দে, যখন জগৎ সিংহের লোকেরা সারনাথ ধ্বংসের শেষ অঙ্কের অভিনয়ে প্রবৃত্ত হইয়াছিল।

জগৎ সিংহের খনন।

রাজা চেৎসিংহের দেওয়ান জগৎসিংহ নিজের নামে

(১) মূল লিপির পাঠ পরিশিষ্টে দ্রষ্টব্য।

একটি ব্যঙ্গ্য নিৰ্মাণ কৰিতে ইচ্ছুক হইলেন। এতদুদ্দেশ্যে তিনি সারনাথৰ স্তূপ ভাঙ্গিয়া ইষ্টক ও প্রস্তর আহরণে লোক নিযুক্ত কৰেন। এই লোকগুলি খনন কৰিতে কৰিতে একটা স্তূপৰ মध्ये একটা প্রস্তরের আধাৰ প্ৰাপ্ত হয়। এই প্রস্তৰাধাৰৰ মध्ये একটা মৰ্ম্মৰ নিৰ্ম্মিত ছোট কোটা (relic casket) পাওয়া গিয়াছিল। এই বৃহৎ প্রস্তর আধাৰটী প্ৰায় ৪০ বৎসর গৱেষকলিকাতা মিউজিয়মে লইয়া যাওয়া হয়। এই খননৰ বিস্তারিত বিবরণ বারাণসীৰ কমিশনৰ জোনাথন ডানক্যান (Mr. Jonathan Duncan) সাহেব এমিয়াটিক্ সোসাইটী অব বেঙ্গলৰ পত্ৰিকায় প্রকাশ কৰেন। এই স্থানে একটা বৌদ্ধমূৰ্ত্তি পাওয়া যায়। ইহাৰ পাদপীঠে পাল নরপতি মহীপালের লিপি উৎখা হইয়াছে।

পুৰাতত্ত্ব উদ্ধাৰ কল্পে সারনাথৰ প্ৰথম খনন কাৰ্য্য মেকেঞ্জীৰ খনন। ১৮১৫ খৃষ্টাব্দে কৰ্ণেল মেকেঞ্জী (Colonel A. Mackenzie) সাহেব কর্তৃক অনুষ্ঠিত হয়। তাঁহার আবিষ্কৃত মূৰ্ত্তিগুলি এখন কলিকাতা মিউজিয়মে রক্ষিত আছে। সম্ভবতঃ কৰ্ণেল মেকেঞ্জী সাহেবের খননের কোন বিবরণ প্রকাশিত হয় নাই।

১৮৩৪ খৃষ্টাব্দের ডিসেম্বর মাস হইতে ১৮৩৬ জানুয়ারি মাস পর্যন্ত জেনারেল সার এলেক-

জ্ঞাণ্ডার কানিংহাম (General Sir Alexander Cunningham) নিজ ব্যয়ে দুইটি স্তূপ, একটা সজ্জারাম এবং ধর্মরাজিকা (জগৎসিংহ) স্তূপের উত্তর দিকের একটা মন্দির পরীক্ষা করিয়াছিলেন। ধামেক ও চৌখণ্ডী স্তূপ দুইটি খননের বিবরণ তৃতীয় অধ্যায়ে প্রদত্ত হইয়াছে। উপরোক্ত ধর্মরাজিকা স্তূপের প্রস্তর আধারটি তিনি খুজিয়া বাহির করেন এবং অনেকগুলি মূর্তি এই স্থান হইতে সংগ্রহ করিয়া কলিকাতা মিউজিয়মে প্রদান করেন। তিনি আনুমানিক চল্লিশটি মূর্তি এবং বহুসংখ্যক খোদিত প্রস্তর সারনাথে ফেলিয়া যান। পাদ্রি শেরিংগের (Rev. M. A. Sherring) পুস্তক পাঠে অবগত হওয়া যায় যে বরুণা নদীর সেতু (Duncan Bridge) নির্মাণের সময় সারনাথের আটচল্লিশটি মূর্তি এবং অন্তর্বিধ প্রস্তর ফলকাদি ব্যবহৃত হইয়াছিল এবং সারনাথের প্রাচীন ইমারত হইতে পঞ্চাশ গাড়ীর অধিক পাথর বরুণার লৌহ সেতু নির্মাণ কার্যে ব্যবহৃত হইয়াছিল।

কিটোর খনন।

এই ঘটনার পরে ১৮৫১ খৃষ্টাব্দে মেজর কিটো (Major Markhan Kittee) এখানে খনন কার্য আরম্ভ করেন। তিনি ঐ সময়ে কুইন্স কলেজ (Queen's College) ভবন নির্মাণে নিযুক্ত ছিলেন। তাঁহার খননের ফলে ধামেক স্তূপের চারিপাশে বহুসংখ্যক

ইমারতের অংশ বাহির হইয়াছিল। একটী ইমারতকে তিনি রোগিনিবাস (hospital) বলিয়া স্থির করিয়া ছিলেন কিন্তু এখন জানা গিয়াছে যে এটি একটী সজ্জারাম মাত্র। মেজর কিটো আর একটী সজ্জারামের পরিক্ষরণ আরম্ভ করেন। এটি এক্ষণে কিটোর সজ্জারাম নামে অভিহিত হয়। তিনিও কলেজ নির্মাণে সারনাথের প্রস্তর ব্যবহার করিয়াছিলেন। তাঁহার সংগৃহীত মূর্তিগুলি লক্ষ্ণৌ মিউজিয়মে রক্ষিত আছে।

ইহার পর টমাস (Mr. E. Thomas, C. S.) সাহেব এবং প্রফেসার হল (Professor Fitz Edward Hall) সাহেব খনন কার্যে ত্রুতী হয়েন। তাঁহাদিগের আবিষ্কৃত মূর্তিগুলি কলিকাতা মিউজিয়মে রক্ষিত আছে। কাগর্ক (Mr. A. Rivett Carnac) সাহেব ১৮৭৭ খৃষ্টাব্দে একটী বৌদ্ধমূর্তি প্রাপ্ত হন। এই ঘটনার পূর্বে, ১৮৬৫ খৃষ্টাব্দে গভর্নমেন্ট একজন নীলকর ফার্গুসন (Mr. Fergusson) সাহেবের নিকট হইতে সারনাথের জমী ক্রয় করেন।

টমাস ও হলের খনন।

১৯০৫ খৃষ্টাব্দে ইঞ্জিনিয়ার ওরটেল (Mr. F. O. Oertel) সাহেব গাজীপুর পথ হইতে সারনাথে যাইবার জন্য একটী রাস্তা নির্মাণ করেন। এই পথ নির্মাণ কালে তিনি একটী বুদ্ধমূর্তি প্রাপ্ত হন এবং প্রত্নতত্ত্ব-

ওরটেলের খনন।

বিভাগের সাহায্যে সারনাথের খনন কার্য নূতন উদ্যমে আরম্ভ করেন। ওরটেল সাহেবের খননের কালে প্রধান মন্দির, অশোক স্তম্ভ ও তাহার সিংহচূড়া, অনেকগুলি মূর্তি ও খোদিত লিপি আবিষ্কৃত হইয়াছিল। এই খননের বিস্তারিত বিবরণ প্রত্নতত্ত্ব বিভাগের রিপোর্টে প্রকাশিত হইয়াছে।

প্রত্নতত্ত্ব বিভাগের খনন।

ইহার দুই বৎসর পরে প্রত্নতত্ত্ব বিভাগের প্রধান অধ্যক্ষ সার জন্ মার্শেল (Sir John Marshall, Director General of Archaeology in India), ডাক্তার কোনো (Dr. Sten Konow), নিকোল্‌স্ (Mr. W. H. Nicholls) সাহেব এবং রায় বাহাদুর দয়্যারাম সাহনীর সহায়তায় সারনাথের উত্তরভাগ এবং প্রধান মন্দিরের চতুর্দিকে খনন কার্য আরম্ভ করেন। এই খননের কালেই সর্ব প্রথম সারনাথের প্রাচীন মঠ, মন্দিরাদির সংস্থান নির্ণীত হয়। প্রধান মন্দির, অশোক স্তূপ এবং অশোক স্তম্ভকে কেন্দ্র করিয়া যে সারনাথে অসংখ্য ইमारতাদি নির্মিত হইয়াছিল ইহাও এই খনন হইতেই অবগত হওয়া যায়। সার জন মার্শেল সাহেব কর্তৃক উদ্ধৃত ইमारতগুলির মধ্যে কুষাণ যুগের তিনটি সঞ্জারাম এবং তাহাদের ধ্বংসাবশেষের উপর মধ্যযুগে নির্মিত সুরহং-বিহার এই চারিটি বিশেষ উল্লেখযোগ্য।

ইহার বিস্তারিত বিবরণ তৃতীয় অধ্যায়ে প্রদত্ত হইল। পূর্বোক্ত খননে প্রাপ্ত মূর্তি, শিলালিপি, মূর্তিকার পাত্রাদি সারনাথ মিউজিয়মে প্রদর্শিত হইয়াছে। সার জন মার্শেল উপর্যুপরি দুই বৎসর এইস্থানের খনন কার্যে ব্যাপ্ত ছিলেন। তাঁহার বিশ্বাস যে সারনাথ স্থাপত্য ও ভাস্কর্য্য শিল্পের একটি কেন্দ্র ছিল। ১৯১৪-১৫ খৃষ্টাব্দে প্রত্নতত্ত্ব বিভাগের অত্যন্ত প্রাধ্যক্ষ হারগ্রীভস (Mr. H. Hargreaves) সাহেব প্রধান মন্দিরের পূর্ব, উত্তর এবং পশ্চিম দিকে খনন কার্য্য পরিচালিত করেন। শেষোক্ত স্থানে একটি প্রাচীন মন্দির এবং গুপ্তযুগের বহুসংখ্যক মূর্তির ভগ্নাবশেষ আবিষ্কৃত হয়। তিনটি দণ্ডায়মান বুদ্ধমূর্তি এই স্থানে আবিষ্কৃত হয়। তাহাদের উপরে খোদিত লিপি হইতে গুপ্তদিগের বংশাবলী সম্বন্ধে অনেক নূতন তথ্য অবগত হওয়া যায় (পৃঃ ২৪-২৫)।

গত ছয় বৎসর যাবৎ সারনাথের খনন কার্য্য এবং গৃহ নিদর্শনাদির সংরক্ষণ রায় বাহাদুর পণ্ডিত দয়্যারাম সাহনীর তত্ত্বাবধানে সম্পাদিত হইয়া আসিতেছে। নূতন খনন কার্য্যের মধ্যে ধামেক স্তূপ এবং প্রধান মন্দিরের মধ্যবর্তী জমি ও দুই সংখ্যক সজ্জারামের পরীক্ষা বিশেষ ভাবে উল্লেখ যোগ্য। প্রথম স্থানটীতে প্রাচীন কালে একটি পুষ্করিণী ছিল এই বিশ্বাসানুসারে

উহা ১৯০৪-৫ খৃষ্টাব্দে ভরিয়া দেওয়া হয়। সেই স্থানের খননের ফলে একটা বৃহৎ উন্মুক্ত অঙ্গণ (পরিমাণ ২৭১'×১১২') আবিষ্কৃত হইয়াছে। এই অঙ্গণটি নিশ্চয়ই অষ্টম অথবা নবম শতাব্দীতে প্রধান মন্দিরের সহিত সংযুক্ত ছিল। যে পয়ঃপ্রণালী দিয়া প্রধান মন্দির এবং এই অঙ্গণ হইতে জল নিঃসৃত হইত সেটীও পাওয়া গিয়াছে। ১৯০৭-৮ খৃষ্টাব্দের আংশিকরূপে উদ্ধৃত দ্বিতীয় সজারামের পুনর্ব্বার খননের ফলে একটা মন্দির এবং তৎসহিত একটা দীর্ঘ পথ আবিষ্কৃত হইয়াছে।

তৃতীয় অধ্যায় ।

ধবংসাবশেষ ।

বারাণসী হইতে গাজীপুর যাইবার প্রশস্ত রাজপথের একটা শাখা সারনাথ অভিমুখে গিয়াছে । এই রাস্তায় কিয়দূর অগ্রসর হইলে বামপার্শ্বে একটা উচ্চ ইষ্টক নিৰ্ম্মিত স্তূপ দর্শকের নয়নপথে পতিত হয় (চিত্র ২) । এই স্তূপটা চৌখণ্ডী নামে বিখ্যাত । ইহার উপরে একটা অষ্টকোণি বুরুজ আছে । এই বুরুজের উত্তর দ্বারের শীর্ষদেশে স্থাপিত একখানি প্রস্তর ফলকে পারস্য ভাষায় এই লিপিটা উৎকীর্ণ রহিয়াছে :—

الله اكبر

چو اینجا شاه چنت آشیانی
 همایون بادشاه هفت کشور
 برروز آمد و بر تخت بنشست
 رزان شد مطلع خورشید انور
 کزیدن بده را آمد بخاطر
 غلام خانه زان شاه اکبر
 که سازن جائه نو برسر آن
 معلا گنبدے چون چرخ اخضر
 نرد شش سال و نهصد و نود و نهم
 که آمد در بنا این خواجه منظر

“সপ্তমহাদেশের সম্রাট স্বর্গবাসী হুমায়ুন একদিন এই স্থানে আসিয়া উপবেশন করিয়া সূর্যের জ্যোতি বৃদ্ধি করিয়াছিলেন। এজন্য তদীয় পুত্র এবং দীন ভৃত্য আকবর গগনস্পর্শী একটা উচ্চ বুরুজ নির্মাণ করিতে সংকল্প করিয়াছিলেন। ৯৯৬ হিজরীতে [১৫৮৮ খৃষ্টাব্দে] এই বুরুজটা নির্মিত হইয়াছিল।”

এই বুরুজের উপর হইতে দক্ষিণ দিকে কাশীর বেণী-মাধবের ধ্বজা এবং উত্তর দিকে ধামেক স্তূপ পর্য্যন্ত সমস্ত ভূভাগের দৃশ্য নয়নগোচর হয়।

১৯০৪-৫ খৃষ্টাব্দে ওরটেল সাহেব কর্তৃক এই স্তূপের নিম্নাংশ পরিক্ষিত হইয়াছিল। স্তূপটী তিনটী চতুষ্কোণ পীঠিকার উপর অবস্থিত। প্রত্যেক পীঠিকা প্রস্থে এবং উচ্চতায় প্রায় দ্বাদশ ফিট। এই স্তূপটী এখন বিকৃতি প্রাপ্ত হইয়াছে, কিন্তু ইহার অষ্টকোণবিশিষ্ট তারকাকৃতি ভিত্তির (plinth) কিয়দংশ এখনও বর্তমান। স্তূপের সকল পীঠিকার গাত্রে সারিসারি প্রকোষ্ঠ বাহির হইয়াছে। এই স্থান খননের ফলে ওরটেল সাহেব কাল্পনিক সিংহমূর্তি (leogryph) পরিশোভিত দুইখানি প্রস্তর-খণ্ড [সি (বি) ১ ও ২] প্রাপ্ত হন। প্রত্যেক সিংহের উপরে ও নিম্নে দুইজন যোদ্ধা অবস্থিত।

১৮৩৫ খৃষ্টাব্দে জেনারল কানিংহাম স্তূপের উপরি-ভাগের বুরুজের মেঝে হইতে স্তূপের নিম্নস্তর পর্য্যন্ত

একটি গভীর কূপ খনন করিয়াছিলেন, কিন্তু কিছুই পান নাই। তাঁহার অনুমান গোঁতমবুদ্ধ গয়া হইতে যুগদাবে আসিবার সময় কোণ্ডিগ্ৰাদি সম্মাসীদিগের সহিত এই স্থানে মিলিত হন। এই ঘটনার স্মৃতিরক্ষার্থ এই স্তূপটি নির্মিত হইয়াছিল। কানিংহাম সাহেবের অনুমানের সহিত ছয়েঙ্সঙ্কের বর্ণনার সম্পূর্ণ ঐক্য আছে। ছয়েঙ্সঙ্ক বলেন এই স্তূপটি উচ্চতায় ৩০০ ফিট ছিল কিন্তু ওরটেল সাহেবের অনুমান ২০০ ফিট। বর্তমান কালে ইফ্টকচুড়া সহ ইহার উচ্চতা ৮৪ ফিটের অধিক হইবে না।

স্তূপের পার্শ্বের পতাকা শোভিত ইটের চাতালটী আধুনিক। এখানে গ্রামের লোক ভূত প্রেত শাস্তির জন্ত ছাগ বলি দিয়া থাকে।

এখান হইতে আরও অর্ধ মাইল উত্তরে অগ্রসর হইলে যুগদাব। দর্শক যুগদাবে আসিয়া উপস্থিত হইবেন এবং দক্ষিণ পার্শ্বে মিউজিয়ম গৃহ দেখিতে পাইবেন। মিউজিয়ম দেখিবার পূর্বের দর্শকের সারনাথের ধ্বংসাবশেষ পরিদর্শন করা উচিত। দর্শকের সুবিধার জন্ত এক নম্বর চিত্রে সারনাথের ধ্বংসাবশেষ অভিমুখে বাইবার পথটী লাল রেখা দ্বারা প্রদর্শিত হইয়াছে।

সারনাথের খনিত অংশ দুই ভাগে বিভক্তঃ (১) দক্ষিণ দিকের অথবা স্তূপের দিকের অংশ এবং (২) উত্তর

সারনাথের দক্ষিণ ভাগ

দিকের অথবা সজ্জারামের অংশ। কিন্তু রায় বাহাদুর দয়ারাম সাহনীর খননের ফলে বুঝিতে পারা যাইতেছে যে এইরূপ বিভাগ সমীচীন নহে। প্রকৃতপক্ষে প্রধান মন্দির এবং স্তূপগুলি মধ্যস্থানে ছিল এবং তাহার চারিদিক বেষ্টিত করিয়া সজ্জারামগুলি নির্মিত হইয়াছিল।

৬ নম্বর সংজ্জারাম
(কিটো সাহেবের
সজ্জারাম)।

দর্শক চৌখণ্ডী স্তূপ হইতে অর্দ্ধ মাইল আসিয়া প্রথমে পথের দক্ষিণ পার্শ্বে একটা বৌদ্ধ সজ্জারামের ধ্বংসাবশেষ (নম্বর ৬) দেখিতে পাইবেন। ১৮৫১-৫২ খৃষ্টাব্দে এই স্থানটী মেজর কিটো (Major Kittoe) সাহেব খনন করিয়াছিলেন বলিয়া প্রত্নতাত্ত্বিক সমাজে ইহা কিটোর সজ্জারাম নামে বিদিত। খনন বিবরণ প্রকাশ করিবার পূর্বে মেজর কিটো ইহলোক ত্যাগ করেন বলিয়া জেনারল কানিংহাম সাহেবের প্রথম রিপোর্টে সেই বিবরণ প্রদত্ত হইয়াছে। এই সজ্জারামটী 'দৈর্ঘ্যে ৩ প্রস্থে ১০৭ ফিট ছিল এবং অষ্টাশ্র বৌদ্ধ সজ্জারামের ন্যায় ইহার মধ্যে একটা বিস্তৃত প্রাঙ্গণ ছিল। প্রাঙ্গণের চতুর্দিক বেষ্টিত করিয়া শিলাস্তম্ভশোভিত পথ ছিল। এই পথ অতিক্রম করিয়া বৌদ্ধ ভিক্ষু বা ভিক্ষুণীরা নিজ নিজ প্রকোষ্ঠে প্রবেশ করিতেন। সর্বসমেত ২৮টা প্রকোষ্ঠ ছিল। প্রকোষ্ঠগুলি এত ছোট যে মাত্র একজন ভিক্ষু বা ভিক্ষুণী তাহাতে বাস করিতে পারিতেন। প্রত্যেক প্রকোষ্ঠের

পৃথক্ পৃথক্ প্রবেশ দ্বার ছিল। উত্তরদিকের মধ্যবর্তী ঘরটি অগ্ন্যগ্ন ঘর হইতে আয়তনে বৃহত্তর এবং তথায় মূর্তির পাদপীঠ ছিল বলিয়া জেনারল কানিংহাম এই ঘরটিকে সজ্জারামের দেবালয় বলিয়া নির্দেশ করেন। তিনি অনুমান করেন যে সজ্জারামের প্রবেশপথ দক্ষিণদিকে ছিল এবং এইদিকের মধ্যবর্তী গৃহে কারুকার্যখচিত সমচতুর্ভুজ প্রস্তরখানি সজ্জারামের প্রধান আচার্য্যের বসিবার আসন ছিল।

জেনারল কানিংহামের খননের পরে এই সজ্জারামের অধিকাংশভাগই ধবংস হইয়া যাওয়ায় মাটির উপর এত অল্প দেখা যাইত যে ইহাকে সজ্জারাম বলিয়া চিনিয়া লওয়া কঠিন হইয়া উঠিয়াছিল। এই স্থান পুনরায় খননের ফলে অনেক নূতন তথ্য আবিষ্কৃত হইয়াছে। এখন বুঝিতে পারা গিয়াছে, উত্তরদিকের যে বড় ঘরটি জেনারল কানিংহাম সজ্জারামের মন্দির (chapel of the monastery) বলিয়া মনে করিয়াছিলেন তাহা প্রকৃত পক্ষে প্রবেশপ্রকোষ্ঠ। জেনারল কানিংহাম বাহিরের দেওয়ালের নিকট তিনটি ছোট ঘর একেবারেই দেখিতে পান নাই। সেই তিনটির একটি দুয়ার বা ফাটক এবং বাকী দুইটি প্রতিহার কক্ষ (guard-room)। প্রায় সমস্ত সজ্জারামেই প্রতিহার কক্ষ বা ফাটক দেখিতে পাওয়া

যায়। যে দুইটি বড় বড় পাথর জেনারল কানিংহাম মূর্তির পাদপীঠ বলিয়া মনে করিয়াছিলেন সে দুইটি প্রকৃতপক্ষে প্রবেশপ্রকোষ্ঠের দেহলী (threshold) এবং ইহার গর্ভগুলিতে কাঠের চৌকাঠ লাগান থাকিত। এই সজ্জারাম দক্ষিণদিকে অবস্থিত ছিল এবং ঐ দিকের মাকের ঘরটাই মন্দির বলিয়া বোধ হয়। ইহা ব্যতীত পূর্বদিকে সজ্জারামের আরও একটি প্রাঙ্গণ ছিল। শৈব, বৈষ্ণবাদি মূর্তি রাখিবার জন্য নির্মিত ঘরের দ্বারা এই প্রাঙ্গণটি ঢাকা পড়িয়াছে। মেজর কিটো কর্তৃক খোদিত সজ্জারামটী মধ্যযুগের এবং তাহার ভিতের নীচে আর একটি প্রাচীনতর সজ্জারামের ধ্বংসাবশেষ বিদ্যমান আছে। প্রথমটীর মেঝের দুই ফিট নীচে দ্বিতীয়টীর মেজে পাওয়া যায়। এই সজ্জারামের দক্ষিণ-পশ্চিম কোণের দুইটি ছোট ঘর খুঁড়িয়া এই প্রাচীন সজ্জারামের অস্তিত্ব অবগত হওয়া গিয়াছে। এই দুইটি ছোট ঘরে দুই স্তর মেঝে বাহির হইয়াছে। উপরের মেঝেটিতে খৃষ্টীয় নবম শতাব্দীর অঙ্করে “যে ধর্ম্য হেতু . . .” এই শ্লোকযুক্ত একটি শীলমোহর পাওয়া গিয়াছে। নীচের মেঝেটির উপরে বুদ্ধের গন্ধকুটি বা মন্দিরের চিত্র সম্বলিত ১০।১২টি মাটির শীল বা মোহর পাওয়া গিয়াছে। এই সমস্ত শীলমোহরের অঙ্কর খৃষ্টীয় ষষ্ঠ বা সপ্তম শতাব্দীর। প্রাচীন সজ্জারামটী

এই সমস্ত শীলমোহর অপেক্ষা অনেক পুরাতন, কারণ, ইহা ১৭ $\frac{১}{২}$ " X ১১" X ২ $\frac{১}{২}$ " আকারের ইটে নিশ্চিত হইয়াছিল। এই আকারের ইট সাধারণতঃ কুবাণ যুগের ইমারতে দেখিতে পাওয়া যায়।

সজ্জারামের উঠানের মাঝখানের কূপটি প্রাচীন সজ্জারামেরই সমসাময়িক, কেবল উপরের গাঁথনি এবং জল তুলিবার কপিকল আধুনিক। এই কূপের জল মিষ্ট এবং সারনাথের বৌদ্ধ যাত্রীরা ইহা অতি আগ্রহের সহিত পান করিয়া থাকেন।

সজ্জারামের চওড়া প্রাচীর দেখিয়া জেনারেল কানিংহাম সিদ্ধান্ত করিয়াছিলেন যে বাড়ীটি তেতলা বা চৌতলা ছিল। চীনদেশীয় পরিব্রাজক হুয়েন্সঙ সারনাথে খৃষ্টীয় সপ্তম শতাব্দীতে যে ৩০টি সজ্জারাম দেখিয়াছিলেন ইহা তাহাদের মধ্যে অন্ততম।

মেজর কিটোর খননের ফলে জানিতে পারা যায় যে এই সজ্জারামটিতে একদিন সহসা আগুন লাগায় বৌদ্ধ ভিক্ষুরা মুখের গ্রাস ছাড়িয়া পলাইতে বাধ্য হইয়াছিলেন। কিটো সাহেব খননকালে একটি ক্ষুদ্র কুলঙ্গীতে গমের আটার রুটি পাইয়াছিলেন এবং রায় বাহাদুর পণ্ডিত শ্রীযুক্ত দয়্যারাম সাহনীও পূর্বোক্ত ছোট দুইটি ঘরে অনেকগুলি মাটির হাঁড়িতে ভাতের চিহ্ন দেখিতে পাইয়াছেন।

৭ নম্বর সজ্জারাম।

৬ নম্বর সজ্জারামের পশ্চিম দিকে ১৯১৮ সালের খননের ফলে এই জাতীয় আর একটা বাড়ী আবিষ্কৃত হইয়াছে। ইহারও মাঝখানে একটা পাকা উঠান। উঠানটা লম্বা চওড়ায় ৩০ ফিট এবং ইহার উত্তর-পূর্ব কোণে ইস্টক নির্মিত একটা কূপ আছে। উঠানের চারিদিকের ছোট ছোট কক্ষগুলির কোন চিহ্নই নাই, কিন্তু তাহাদের সম্মুখের দেওয়াল এবং পাকা বারান্দার ভগ্নাবশেষ এখনও দেখিতে পাওয়া যায়। বারান্দার পাথরের থামের ২১টি পাদপীঠ (base) এখনও স্থানচ্যুত হয় নাই। এই ছোট সজ্জারামের ভিত্তির উচ্চতা এবং ইহার নির্মাণে ভগ্ন ইস্টকের ব্যবহার দেখিয়া মনে হয় যে ইহা সর্বশেষে নির্মিত হইয়া থাকিবে। এই সজ্জারামের কূপ হইতে আবিষ্কৃত মধ্যযুগের লিপিগুলি এই কথাই সপ্রমাণ করিতেছে। এই কূপ হইতে প্রাপ্ত একটা শীলমোহরের ছাঁচে (বাস ১১ $\frac{১}{৪}$) “শ্রীশিষ্যদ” নামক এক ব্যক্তির নাম উল্টা অক্ষরে লেখা আছে। সম্ভবতঃ ইনি বৌদ্ধ ভিক্ষুদিগের বাসের জন্য এই বাড়ীটী দান করিয়াছিলেন। এই কূপে একটা পাতলা তামার পাত পাওয়া গিয়াছে, উহার ধারগুলি একটু একটু মোড়া। ইহার উপরে “যে ধর্ম হেতু প্রভবা . . .” শ্লোকটি খোদিত আছে।

বারান্দার স্তম্ভের পাদপীঠগুলির ভগ্নাবস্থা এবং উঠানের ইটের মেঝের অবস্থা দেখিয়া স্পষ্টই বুঝিতে পারা যায় যে এই সজ্ঞারামটী পূর্বোক্ত অগ্নিকাণ্ডে ধ্বংস হইয়া থাকিবে। এই সজ্ঞারামের নীচেও আর একটী সজ্ঞারামের ধ্বংসাবশেষ নিহিত আছে।

নক্সার লাল রেখা ধরিয়া উত্তর-পশ্চিমে কিয়দূর অগ্রসর হইলে একটী বৃহৎ স্তূপের ধ্বংসাবশেষ দর্শকের দৃষ্টি আকর্ষণ করে। পূর্বেরই উক্ত হইয়াছে যে এই স্তূপটী জগৎসিংহ ১৭৯৪ খৃষ্টাব্দে নষ্ট করিয়াছিলেন বলিয়া এতদিন ইহা ‘জগৎসিংহ’ স্তূপ নামে পরিচিত ছিল। এই স্তূপ সম্ভবতঃ অশোক কর্তৃক নিৰ্ম্মিত হইয়াছিল বলিয়া রায় বাহাদুর দয়ারাম সাহনী ইহার ধর্ম্মরাজিকা নাম প্রদান করিয়াছেন। এই স্তূপের মধ্যে প্রাপ্ত পাষাণের আধারের কথা পূর্বেরই উল্লিখিত হইয়াছে (৩৩ পৃঃ)। জগৎসিংহের লোকেরা এই আধারের মধ্যে একটী সবুজ বর্ণের মর্ম্মরাধার প্রাপ্ত হইয়াছিল। এই মর্ম্মরাধারে দেহের ভস্মাবশেষ এবং কয়েকটী মুক্তা ছিল। এই স্তূপের উপরে প্রাপ্ত গোড়াধিপ মহীপালের ১০৮৩ সম্বতের লিপিয়ুক্ত বুদ্ধ মূর্ত্তির [বি (সি) ১] নিম্নভাগের কথা পূর্ব অধ্যায়ে উক্ত হইয়াছে (৩০ পৃঃ)। জগৎসিংহের খননের পর এই স্তূপের কঙ্কাল মাত্র অব-

ধর্ম্মরাজিকা স্তূপ।

শিষ্ট ছিল। ইহা সত্ত্বেও ১৯০৭-৮ সালে এই স্তূপের নিম্ন-ভাগের চারিদিক খননের ফলে জানিতে পারা গিয়াছে যে স্তূপটির বহির্ভাগে ইটের গাঁথনি ছিল। এই স্থানের অশোক নির্মিত আদিম স্তূপের পাদদেশের ব্যাস ছিল ৪৯ ফিট, কিন্তু পরে ইহার পার্শ্বে ইট গাঁথিয়া ১১০ ফিটে বর্ধিত করা হয়। মৌর্য যুগের অন্যান্য ইমারতের ইটের মতন অশোকের আদিম স্তূপের ইটগুলি বৃহদাকার। প্রায় সমস্ত ইটগুলি একদিকে সরু ও অপরদিকে মোটা (wedge-shaped); সরু দিকটা স্তূপের কেন্দ্রের অভিমুখে বসান ছিল; কিন্তু গাঁথনির বাঁধন পাকা নয়। এই যুগের অন্যান্য স্তূপের মতন এই ধর্মরাজিকা স্তূপটি প্রায় অর্ধ গোলাকৃতি ছিল। এই স্তূপটির শীর্ষদেশেও অবশ্য হর্মিকা ও ছত্র ছিল। ছত্রের কোন চিহ্ন পাওয়া যায় নাই কিন্তু হর্মিকার বেদিকা বা প্রাচীরের ভগ্নাংশ প্রধান মন্দিরের দক্ষিণ দিকের গর্ভগৃহে দৃষ্ট হয়। এই বেদিকাটি একখানি বিরাট প্রস্তরখণ্ড হইতে প্রস্তুত এবং ইহার স্তম্ভের এবং সূচীর (cross-bar) গাত্র অশোক স্তম্ভ গাত্রের ন্যায় অতি মন্থণ।

আদিম ধর্মরাজিকার প্রথম সংস্কার হইয়াছিল আনুমানিক খৃষ্টাব্দের প্রথমভাগে। দ্বিতীয় সংস্কার আনুমানিক খৃষ্টীয় পঞ্চম বা ষষ্ঠ শতাব্দীতে হইয়া থাকিবে।

পূর্ব অধ্যায়ে (২৭ পৃঃ) উক্ত হইয়াছে খৃষ্টীয় সপ্তম শতাব্দীতে হয়েঙ্-সঙ্ এই স্তূপটিকে শত ফিট উচ্চ এবং ভগ্নাবস্থায় দেখিতে পাইয়াছিলেন। গুপ্ত যুগের সংস্কারের ফলেই বোধ হয় স্তূপের উচ্চতা এতটা বর্দ্ধিত হইয়াছিল।

১৯০৭-৮ খৃষ্টাব্দে খোদিত ধর্ম্মরাজিকা স্তূপের প্রদক্ষিণ পথটী দ্বিতীয় বারের সংস্কারের সময় নির্মিত বলিয়া বোধ হয়। প্রদক্ষিণ পথের বেষ্টিতকারী প্রাচীর চার ফিট পাঁচ ইঞ্চি উচ্চ। ইহার চারিদিকে চারিটা দ্বার ছিল। সপ্তম শতাব্দীতে স্তূপটী পুনঃ সংস্কৃত হয়। এই সময় প্রদক্ষিণ পথটী ভরিয়া দেওয়া হয় এবং স্তূপে উঠিবার জন্য চারিটা সিঁড়ি এক এক খানি অঞ্চল প্রস্থেরে নির্মিত হয়। দক্ষিণ সোপানের উপরের ধাপে উৎকীর্ণ ক্ষুদ্র লিপিটী খৃষ্টীয় দ্বিতীয় বা তৃতীয় শতাব্দীর অক্ষরে লেখা। এই স্তূপটীর শেষ সংস্কার খৃষ্টীয় একাদশ শতাব্দীতে ধর্ম্মচক্রজিনবিহার নির্মাণের সময়ে সাধিত হইয়াছিল। ধর্ম্মরাজিকা স্তূপের চতুর্দিকে অনেকগুলি ছোট ছোট স্তূপ দৃষ্ট হয়। পশ্চিম দিকের তৃতীয় স্তূপের কুলঙ্গীতে “দেয়ধর্ম্মোয়ম ধনদেবস্ত” লিপিবদ্ধ একটি বুদ্ধ মূর্তি পাওয়া গিয়াছে। এই মূর্তিটী [বি (বি) ১০এ] খৃষ্টীয় পঞ্চম শতাব্দীতে নির্মিত হইয়াছিল, এবং তৎকালীন কোন ইমারত হইতে এই স্তূপে নীত হইয়া

থাকিবে। এই স্তূপটী ও উত্তরের কয়েকটী স্তূপ একাধিকবার পুনর্নির্মিত হইয়াছিল।

ধর্মরাজিকার উত্তরে ও প্রধান মন্দিরে যাইবার অর্ধ পথে মথুরার রক্ত প্রস্তরে নির্মিত বিরাট একটী বোধিসত্ত্ব [বি (এ) ১] মূর্তি (চিত্র ৭) ও ছত্রদণ্ড পাওয়া গিয়াছে। এই দণ্ডে ও মূর্তিতে কণিষ্কের তৃতীয় রাজ্যাক্ষের লিপি খোদিত আছে।

প্রধান মন্দির।

ধর্মরাজিকা স্তূপের ৪০ হাত উত্তরে একটী বৃহদাকার মন্দিরের ধ্বংসাবশেষ দেখিতে পাওয়া যায়। নক্সায় এই ধ্বংসাবশেষ প্রধান মন্দির (Main Shrine) বলিয়া চিহ্নিত। এখনও পর্য্যন্ত এই মন্দিরটী খৃষ্টীয় একাদশ শতাব্দীর স্থাপত্য নিদর্শন বলিয়া পরিগণিত হইয়া আসিতেছে; কিন্তু ইহার নির্মাণ প্রণালী এবং উপাদান হইতে অনুমান হয় যে ইহা আরও কয়েক শত বৎসর পূর্বের নির্মিত হইয়াছিল। আদি মন্দিরটী দৈর্ঘ্যে ও প্রস্থে ৪৫' ৬" ছিল এবং ইহার দেওয়াল ১০ ফিট পুরু ছিল। উত্তর, পশ্চিম এবং দক্ষিণ দিকে কক্ষ ছিল এবং সেগুলিতে বহির্দেহ হইতে প্রবেশ করিতে হইত। এই মন্দিরের প্রাচীর এখন কোন জায়গায় ১৮ ফিটের অধিক উচ্চ নাই। এই প্রাচীরের ভিতরদিকে কোন নক্সা ছিল না, কিন্তু মন্দিরের বহির্ভাগে গোলাকার কুলঙ্গী

দেখিতে পাওয়া যায়। কুলঙ্গীর ভিতরে ছোট ছোট থাম, থামের মূলদেশে ঘটাকৃতি এবং উপরিভাগ চারিকোণা মাথালে (bracket capital) পরিশোভিত। এই সমস্ত নক্সা গুপ্ত যুগের শিল্প নমুনা। মন্দিরটি একই উপাদানে নির্মিত এবং বাহির দেওয়ালের নক্সা অবিচ্ছিন্নভাবে বিদ্যমান আছে; কেবল দুয়ারের চৌকাঠ এবং কোন কোন স্থানে দেওয়ালের ভিত্তে পরে ঠাসা (underpinning) দেওয়া হইয়াছিল। মন্দিরটি $১৪\frac{১}{২}'' \times ৮\frac{১}{২}'' \times ২\frac{১}{২}''$ হইতে $১৫\frac{১}{২}'' \times ৯\frac{১}{২}'' \times ২\frac{১}{২}''$ আকারের ইটে এবং কাদায় নির্মিত। ১০ ফিট স্থূল প্রাচীর দেখিয়া মনে হয় যে মন্দিরের শিখর খুব উচ্চ ছিল এবং সম্ভবতঃ ইহা দেখিতে বুদ্ধগয়ার মন্দিরের মতন ছিল।

নিৰ্মাণের অনেক দিন পরে মন্দিরের উর্দ্ধভাগ ভগ্নোন্মুখ হইয়া পড়ায় আদি মন্দিরের ভিতরের তিনদিকে ১১ ফিট চওড়া আর একটা দেওয়াল গাঁথা হয়। ফলে মন্দিরের গর্ভগৃহ সমচতুর্কোণ $২৩' ৬''$ একটা ছোট ঘরে পরিণত হয়। এই সময় মন্দিরের পিছনে মূর্তি বসাইবার জন্ত একটা বড় চারিকোণা চত্বর গাঁথা হয়। এই চত্বরের উপর প্রতিষ্ঠিত মূর্তিটি সম্ভবতঃ বহু শতাব্দী পূর্বে ধ্বংস হইয়া গিয়াছে।

উত্তর এবং পশ্চিমের ছোট ঘরের মূর্তি দুইটাও পাওয়া যায় নাই কিন্তু সেই দুইটা যে ইটের বেদির উপর স্থাপিত ছিল তাহা এখনও অক্ষুণ্ণ আছে। দক্ষিণ দিকের ছোট ঘরে গুপ্তযুগের একটা শিরোহীন দণ্ডায়মান বুদ্ধ মূর্তি পাওয়া গিয়াছে; তাঁহার দক্ষিণহস্তে অভয়মুদ্রা। অন্য দুইটা ছোট ঘরেও বোধ হয় এই জাতীয় মূর্তি ছিল। ওরটেল সাহেব দক্ষিণ দিকের ছোট ঘরের মেঝে খুঁড়িয়া মৌর্য যুগের একটা সমচতুষ্কোণ বেদিকা (railing) পাইয়াছিলেন। এই বেদিকার মধ্যে একটা ইষ্টক নির্মিত ছোট স্তূপ আছে। মির্জাপুর জেলার অন্তর্গত চুনারের একখানি বৃহৎ প্রস্তরখণ্ড খোদিয়া এই বেদিকাটা প্রস্তুত এবং অশোকের সময়ের অন্যান্য শিল্প নিদর্শনের স্থায় ইহাতেও উজ্জ্বল বজ্রলেপ (পালিস) দেখিতে পাওয়া যায়। এই বেদিকা ৮' ৪" লম্বা ও ৪' ৯" উচ্চ। ইহার প্রত্যেক দিকে চারিটা চারিকোণা স্তম্ভ ও প্রত্যেক দুইটা খামের মধ্যে তিনটা সূচী (cross-bar) আছে।

এই বেদিকার পূর্ব ও দক্ষিণ দিকের স্তম্ভের মূলদেশে উৎকীর্ণ দুইটা প্রাচীন লিপি হইতে জানিতে পারা যায় যে ইহা খৃষ্টীয় তৃতীয় কিম্বা চতুর্থ শতাব্দীতে বৌদ্ধ সর্বাস্তিবাদী সম্প্রদায়ের ভিক্ষু-দিগের অধিকারে ছিল। পূর্ব দিকের শিলা লিপিটা

দেখিলে বুঝিতে পারা যায় যে ইহার শেষ কথাটি খৃষ্ট-
পূর্ব দ্বিতীয় শতাব্দীর কোন লিপির পরিশিষ্ট এবং
প্রাকৃত ভাষায় রচিত। এই লিপিটির অন্য অংশে অন্য
কোন বৌদ্ধ সম্প্রদায়ের নাম খোদিত ছিল। খৃষ্টীয়
তৃতীয় কিস্বা চতুর্থ শতাব্দীতে সর্বাস্তিবাদী বৌদ্ধ ভিক্ষু-
গণ পূর্বের লিপিটা বিলুপ্ত করিয়া নিজেদের নাম উৎকীর্ণ
করিয়াছিলেন। বোধ হয় তাঁহারা সান্নাথে নিজেদের
প্রাধান্য স্থাপনের উদ্দেশ্যে দক্ষিণ দিকের বেদিকায় সংস্কৃত
ভাষায় উক্ত শিলা লিপিটা পুনরায় খোদিত করিয়া-
ছিলেন। পূর্বকথিত ইষ্টক স্তূপটি ১৯০৬-৭ খৃষ্টাব্দে
খনিত হইয়াছিল কিন্তু ইহার মধ্যে কিছুই পাওয়া যায়
নাই। মৌর্য যুগের এই প্রস্তর বেদিকা অসম্পূর্ণ
অবস্থায় পাওয়া গিয়াছে। ইহার কতকটা অংশ ভাঙ্গিয়া
প্রাচীন যুগেই লুপ্ত হইয়াছিল। এই বেদিকা আদৌ
কি জন্ম নির্মিত তাহাও অনেক দিন ধরিয়া সন্দেহের বিষয়
ছিল। দুইটা কারণ সম্ভব বলিয়া বিবেচিত হইত; প্রথমতঃ—
ইহা কোন পবিত্র স্থান, যথা যেখানে বুদ্ধদেব বসিয়া
ধর্মচক্র প্রবর্তন করিয়াছিলেন অর্থাৎ প্রথম ধর্ম প্রচার
করিয়াছিলেন সেই স্থানটা চিহ্নিত করিবার জন্ম নির্মিত
হইয়াছিল; অথবা ইহা অশোক স্তম্ভের বেষ্টিণী ছিল।
এই দুইটা মতই ভুল বলিয়া প্রমাণ হইয়াছে; কারণ ইহা
যে ধর্মরাজিকা স্তূপের উপরে বসান ছিল এবং ইহার

ভিতরে ধর্মরাজিকা স্তূপের ছত্রদণ্ড গাঁথা ছিল তাহা এখন স্পর্শই বুঝিতে পারা যায়। সম্ভবতঃ ইহা ভূমিকম্পে স্থানচ্যুত হইয়াছিল।

উপরোক্ত বিবরণ হইতে বুঝিতে পারা যায় যে প্রধান মন্দিরটি গুপ্তযুগে নির্মিত ; কিন্তু ইহার নির্মাতার নাম এখনও আমাদের নিকট অজ্ঞাত। এই মন্দিরের প্রাচীনতম মেঝেটি দক্ষিণ কক্ষে স্থাপিত অশোক বেদিকার মেঝের সমসাময়িক। এই কক্ষে অশোকের বেদিকা (balustrade) বোধ হয় অনেক শতাব্দী ধরিয়া দেখা যাইত। পরবর্তী কালে প্রধান মন্দিরের চারিপার্শ্বস্থ জমী উঁচু হইয়া যাওয়ায় এই বেদিকায় যাইবার জন্য একটা সোপান শ্রেণী নির্মিত হয়। প্রধান মন্দিরের তিনদিকের কক্ষগুলির প্রবেশপথ দুইটি বিভিন্ন যুগে তৈয়ারী হইয়াছিল। আগেকার পাথরের চৌকাঠগুলি লাল রঙে রঞ্জিত এবং লতালঙ্কারে (scroll work) পরিশোভিত ছিল। এই চৌকাঠগুলি সপ্তম শতাব্দীতে নির্মিত হইয়াছিল। পরবর্তী যুগের চৌকাঠ-গুলিতে কোনরূপ কারুকার্য দেখা যায় না। এই সময়ে গুপ্ত এবং পরবর্তী যুগের ইमारতের উপাদান লইয়া বাহিরের দেওয়ালের নিম্নদেশ মেরামত হইয়াছিল। এই সংস্কার কার্যে কোনরূপ নৈপুণ্য দেখা যায়

না। মন্দিরের বাহিরের দক্ষিণ-পশ্চিম কোণের প্রস্তর-খানিতে মধ্যযুগের শেষভাগের নাগরী অক্ষরে 'সুহিল' কথাটি উৎকীর্ণ থাকায় প্রধান মন্দিরের নির্মাণ কাল লইয়া অনেক তর্ক বিতর্ক উঠিয়াছে, কারণ এই লেখা যুক্ত পাথর দেওয়ালের ভিত্তে গাঁথা ছিল বলিয়া অনেকে অনুমান করিতেন যে প্রধান মন্দিরটি গুপ্তযুগের অনেক পরে নির্মিত। কিন্তু এখন বেশ স্পষ্ট বুঝিতে পারা যায় যে এই মন্দিরটি নির্মাণের অনেক পরে ইহার সংস্কারের সময় এই পাথরগুলি ব্যবহৃত হইয়াছিল; সুতরাং আদি মন্দিরের সঙ্গে ইহাদের কালগত বিস্তর ব্যবধান রহিয়াছে।

উপরোক্ত প্রমাণ সমূহের সহিত প্রধান মন্দিরের অবস্থিতি এবং অশোকের সমসাময়িক ইমারতাদির সহিত ইহার সাদৃশ্য থাকায় অনুমান হয় যে ছয়েঙ-সঙের মতে যে মন্দিরটি বুদ্ধের প্রথম ধর্ম প্রচারের স্থানে নির্মিত হইয়াছিল ইহা সেই মন্দির।

প্রধান মন্দিরের চতুর্দিকে ৪০ ফিট বিস্তৃত খোয়ার মেঝে আবিষ্কৃত হইয়াছে। এই মেঝেটি অনেক বার বর্ধিত ও সংস্কৃত হইয়াছে। আরও পূর্ব দিকে পাথরে বাঁধান পথ আছে। এই পথে ১৯০৬-৭ এবং ১৯০৭-৮ সালের খনন কালে অনেক গুলি শিল্প নিদর্শন আবিষ্কৃত

হয়। ১৯১৪-১৫ সালে হারগ্রীবস্ সাহেব এখানে দ্বিতীয় কুমারগুপ্ত ও বুদ্ধগুপ্তের সময়ের তিনটি মূর্তি পাইয়াছেন।

প্রধান মন্দিরের অঙ্গনটী লম্বায় আন্দাজ ২৭১ ফিট এবং পূর্ব হইতে পশ্চিমে বিস্তৃত ছিল। ইহার উত্তর, দক্ষিণ ও পূর্ব দিকে ইটের প্রাচীর ছিল কিন্তু এই প্রাচীরের অধিকাংশ পড়িয়া গিয়াছে। পূর্বদিকের দেওয়ালের মাঝখান দিয়া উঠানে নামিবার সিঁড়ি আছে। সিঁড়ি দুইটি নির্মাণ করিবার সময় ভিন্ন ভিন্ন যুগের খোদাইকরা পাথর ব্যবহৃত হইয়াছিল। এই সকল পাথরের মধ্যে দুই একটি গুপ্তযুগের নমুনা দেখিতে পাওয়া যায়।

প্রধান মন্দিরের অঙ্গনে বিভিন্ন আকারের স্তূপ আবিষ্কৃত হইয়াছে ; তাহা ছাড়া ছোট ছোট মন্দিরও দৃষ্ট হয়। এইশ্রেণীর একটি দক্ষিণ-পূর্ব কোণে অবস্থিত এবং আর একটি নক্সায় ১৩৭ সংখ্যক চিহ্নিত। ইহাদের মধ্যে সর্ব প্রাচীন ইমারতগুলি গুপ্তযুগের। তন্মধ্যে একটি স্তূপের ভিত্তিমাত্র এখনও বর্তমান। এই ভিত্তির চারিদিকে চারিটি সুন্দর নক্সাকাটা কুলঙ্গী (niche) ছিল এবং এক কালে এই কুলঙ্গীর মধ্যে এক একটি বুদ্ধমূর্তি ছিল। তদ্ব্যতীত অনেকগুলি প্যানেল (panel)

আছে এবং এই সকল প্যানেলের (panel) দুই পার্শ্বে অক্টোভিন থাম (pilaster), মধ্যভাগ নানা রকমের ফুল (rosette), কীর্তিমুখ ও অন্যান্য কারুকাৰ্য্যে শোভিত। এই জাতীয় শিল্প সাধারণতঃ গুপ্তযুগে প্রচলিত ছিল। এই স্তূপটী এখনও খুড়িয়া দেখা হয় নাই; সুতরাং ইহার মধ্যে অতীতের কোন নিদর্শন পাওয়া যাইবে কি না বলা যায় না।

১৩৬ সংখ্যক স্তূপ অপেক্ষা ইহার নিকটবর্তী মন্দিরটী পরবর্তী কালে নিৰ্ম্মিত। এই মন্দিরের বহির্ভাগে ৩৭ ফিট লম্বা ও প্রায় ২৮ ফিট চওড়া এবং খননের সময় ইহার মধ্যে দুইটী বুদ্ধমূৰ্ত্তি পাওয়া যায়। প্রধান মন্দিরের অঙ্গনের আর সমস্ত ইমারত মধ্যযুগের। ইহাদের মধ্যে অধিকাংশই মানস বা মানত রক্ষার জন্য নিৰ্ম্মিত হইয়াছিল। অঙ্গনের পূর্বদিকের দেওয়ালের দক্ষিণাংশে এক শ্রেণীতে স্থাপিত ছয়টী বা সাতটী স্তূপ সর্বপ্রথমে দর্শকের দৃষ্টি আকর্ষণ করে। যে সমস্ত বৌদ্ধ ভিক্ষু সারনাথে দেহত্যাগ করিয়াছিলেন তাঁহাদিগের ভস্মাবশেষ ইহাদের মধ্যে রক্ষিত আছে।

প্রধান মন্দিরের অঙ্গনের দক্ষিণ-পূর্ব কোণে অবস্থিত মন্দিরটী ধর্ম্মচক্রজিনবিহারের সমসাময়িক। এই মন্দিরের নক্সা দেখিলে ইহার যুগ নির্দ্ধারণ করা

যায়। আর্য্যবর্তের ধরণে এই মন্দিরটী শিখরযুক্ত ; মন্দিরের গর্ভগৃহ (cella) সমচতুষ্কোন এবং মুখমণ্ডপ (portico) যুক্ত। এই মন্দিরের পিছনের দেওয়ালে অবস্থিত পাদপীঠের লাজ্জন (cult-mark) দেখিলে মনে হয় যে বারাহী বা মারীচীর (অর্থাৎ বৌদ্ধ উষাদেবীর) মূর্তি ইহার উপর প্রতিষ্ঠিত ছিল। ইহাতে ঐ দেবীর দণ্ডায়মান এবং উপবিষ্ট অবস্থার মূর্তি খোদিত আছে। তদ্ব্যতীত পাদপীঠের উত্তর পার্শ্বে খোদিত পুরুষ এবং স্ত্রী মূর্তি নিশ্চয়ই এই মন্দিরের প্রতিষ্ঠাতা এবং তাঁহার সহধর্ম্মিণী বলিয়া মনে হয়। মূলমূর্তিটী ১৯১৮-১৯ খৃষ্টাব্দে মন্দিরটী খননের পূর্বেই স্থানান্তরিত বা ধ্বংস হইয়াছিল। পরবর্তী কালে এই মন্দিরের ধ্বংসাবশেষ, সারনাথের আরও দুই তিনটি মন্দিরের ধ্বংসাবশেষের মত, হিন্দু দেবতার জন্ম ব্যবহৃত হইয়াছিল ; কারণ ইহার দক্ষিণ-পূর্ব কোণে ভৈরব মূর্তি (২৩' উঁচু, ১৪' চওড়া) এবং ছোট পাদপীঠে পাঁচটি শিবলিঙ্গ পাওয়া গিয়াছিল।

এই অঙ্গনে একটা ১ ফুট ৯ ইঞ্চি হইতে ২ ফিট ৭ ইঞ্চি চওড়া এবং ৩ ফিট গভীর পাকা নর্দমা- ১৯২১-২২ সালের খননে বাহির হইয়াছে। এই চত্বরের জল নিকাসের জন্ম এই নর্দমাটী খোয়ার তৈয়ারী এবং

খণ্ড খণ্ড পাথরে আচ্ছাদিত ছিল। এই সব পাথরের মধ্যে সর্দলের (lintel), বেদিকার থামের ও ছত্ৰের টুকরা পাওয়া গিয়াছে। নর্দমাটি উত্তর-পূর্ব কোণ হইতে আরম্ভ করিয়া ২৫০ ফিট দূরে ধর্মচক্রজিনবিহারের দুই নম্বর তোরণের নিম্ন দিয়া চলিয়া গিয়াছে। ইহা হইতে বুঝিতে পারা যায় যে ধর্মচক্রজিনবিহারটি প্রধান মন্দির অপেক্ষা অনেক পরে নির্মিত হইয়াছিল। অঙ্গনের বাহিরে ইটের তৈয়ারী পাঁচ ফিট গভীর এবং লম্বা চওড়ায় সাত ফিট একটা কুণ্ড আবিষ্কৃত হইয়াছে। এই জাতীয় কুণ্ড ডাক্তার ভোগেল কাশিয়ার একটা সজ্জারামে (Monastery L-M) পাইয়াছেন। এই কুণ্ডটিতে জল থাকিত ও সেই জল লইয়া ভিক্ষু বা ভিক্ষু-গীরা হাত পা ধুইয়া মন্দিরে প্রবেশ করিতেন। পর্বদিনে অর্থাৎ উপোসথ, অমাবস্তা ও পূর্ণিমা দিনে যখন তাঁহারা বিনয়-ধর্মের জন্ম (confession of sins) আসিতেন তখন এই জল ব্যবহৃত হইত।

প্রধান মন্দিরের পূর্ব দিকে আর একটা ইमारতের উল্লেখ করা উচিত। এই ইमारতটি চারিকোণা, নক্সায় ইহা ৩৬ সংখ্যায় চিহ্নিত। সম্ভবতঃ ইহা ব্যাখ্যান গৃহ (lecture hall)। খননের সময় ইহা প্রধান মন্দিরের চারিদিকের উচ্চ চত্বরে ঢাকা ছিল। ইহার দেওয়াল গুলি এত পাতলা যে বোধ হয় উপরে কোন কালে ছাদ

ছিল না অথবা কাঠের খামের উপরে খুব হালকা কাঠের ছাদ ছিল। পিছনের দেওয়ালে একটা ইটের বেদী আছে। সম্ভবতঃ সঙ্ঘের আচার্য্য (teacher) বা সঙ্ঘস্ববির (chairman) এই স্থানে বসিতেন। দক্ষিণ, পশ্চিম ও উত্তর দিকের প্রাচীরের বাহিরে একটা পাথরের বেদিকা ছিল এবং এই বেদিকার কতক অংশ ভাঙ্গিয়া উত্তর দিকের দেওয়ালে পড়িয়াছে। এই বেদিকার [ডি (এ) ৩৯] উপরে খৃষ্টপূর্ব দ্বিতীয় শতাব্দীর অক্ষরে খোদিত একখানি লিপি আছে। প্রধান মন্দিরের দক্ষিণ, পশ্চিম ও উত্তর দিকে অবস্থিত ছোট বড় ইমারতগুলি যাত্রীগণের তীর্থাগমন-স্মৃতি স্বরূপ নিশ্চিত হইয়াছিল। এই মন্দিরের উত্তর-পূর্ব এবং দক্ষিণ-পশ্চিমে অনেকগুলি ঘন সংবদ্ধ স্তূপ দেখিতে পাওয়া যায়। প্রত্যেক ইমারত অনেকবার বাড়ান হইয়াছে অথবা নূতন করিয়া নিশ্চিত হইয়াছে। স্মরণ্য অনুমান হয় ঐ স্থান বৌদ্ধদিগের নিকট বিশিষ্টরূপে পবিত্র ছিল। উত্তর-পূর্ব দিকের সর্বাপেক্ষা বড় স্তূপটির (নম্বার ৪০ সংখ্যা) উপরের গাঁথনী ধ্বংস হইয়া গিয়াছে। কিন্তু খননকালে ভিতের নীচে কতকগুলি কাঁচামাটির শীল (seals) এবং আরও নীচে খৃষ্টীয় চতুর্থ বা পঞ্চম শতাব্দীর কতকগুলি পাথরের মূর্তি

পাওয়া গিয়াছিল। শীলগুলিতে (seals) সম্ভোধি সময়ের বুদ্ধমূর্তি এবং খ্রীষ্টীয় অষ্টম বা নবম শতাব্দীর অঙ্করে “যে ধর্ম্মা হেতু প্রভবা...” শ্লোকটি দেখিতে পাওয়া যায়। ইহা হইতে বেশ বুঝিতে পারা যায় যে মধ্য-যুগের শেষে এই স্তূপটি মেরামত করিবার সময় শীলগুলি (seals) এবং পাথরের মূর্তিগুলি নীচে ফেলিয়া দেওয়া হইয়াছিল।

নম্বায় ১৩ সংখ্যক চিহ্নিত স্তূপটি প্রধান মন্দিরের উত্তর-পশ্চিম দিকে অবস্থিত এবং ইহার নিকটে পালি লিপিঃ যুক্ত পাথরের ছত্রের একটা অংশ [ডি(সি) ১১] পাওয়া গিয়াছে।

১৯০৪-৫ খৃষ্টাব্দে ওরটেল সাহেব প্রধান মন্দিরের পশ্চিম দিকে অশোক স্তম্ভ আবিষ্কার করেন। স্তম্ভশীর্ষ এবং কয়েকটা টুকরা পশ্চিম দেওয়ালের নিকট পাওয়া যায়। খননের সময় ঐ মন্দিরের চারিদিকে খোয়ার মেরের উপরে অশোক স্তম্ভের নিম্নাংশটি স্থাপিত ছিল। ইহা হইতে অনুমান হয় যে প্রধান মন্দির নির্মাণের বহু শতাব্দী পরে অশোক স্তম্ভ ধ্বংস হইয়াছিল। স্তম্ভটির বর্তমান উচ্চতা ১৭ ফিট এবং নিম্নদেশের ব্যাস ২ ফিট ৬ ইঞ্চি। ইহার ভগ্নাংশগুলি দেখিয়া মনে হয় যে

অশোক স্তম্ভ।

সিংহচূড়াটি লইয়া স্তম্ভের উচ্চতা ৫০ ফিট ছিল। ৮' X ৬' X ১৩' আয়তন বিশিষ্ট একখানি পাথরের উপরে স্তম্ভটি স্থাপিত। অশোক স্তম্ভের শ্রায় সারনাথ স্তম্ভটিও একখানি অখণ্ড চুনার প্রস্তরে নির্মিত। স্তম্ভের সিংহচূড়াটি (এ ১) সাত ফিট উচ্চ এবং ইহার উপর যে ধর্মচক্র ছিল তাহার ব্যাস ২৩ ফিট। স্তম্ভশীর্ষটি (চিত্র ৫) এবং চক্রের কয়েকটি খণ্ড সারনাথ মিউজিয়মে রক্ষিত আছে। সমস্ত স্তম্ভটি খুব মসৃণ ও চিকণ। স্তম্ভের ভূমিতে প্রোথিত পাঁচ হাত পরিমিত অংশ অমার্জিত। অমার্জিত অংশের নীচেই পুরাতন মেঝের চিহ্ন বর্তমান। এই পুরাতন মেঝে ও বর্তমান মেঝেটির মধ্যে অনেকগুলি মেঝের অস্তিত্ব খননে প্রকাশ পাইয়াছে। এই মেঝে উত্তর হইতে দক্ষিণে ১৮' ১০" লম্বা এবং পূর্ব-পশ্চিমে ১৬' ৯" চওড়া। ইহার ২৩' নীচে চারিটি ইটের দেওয়াল পাওয়া গিয়াছে। এই দেওয়ালগুলি অশোক স্তম্ভ বেষ্টিত করিয়াছিল এবং উহার চারিদিকে বেদী ছিল। এই দেওয়ালগুলি অত্যন্ত জীর্ণ হওয়ায় পরে ইহার উপরে অশোক স্তম্ভের রক্ষার জন্য নির্মিত নূতন ছত্রীর স্তম্ভগুলি বসাইবার সময় পুরাতন ইট সংগ্রহ করিয়া ইহাকে মেরামত করা হয়। ছত্রীর ইটের মেঝেটি অশোকস্তম্ভের পাদদেশের সর্ব পুরাতন মেঝের দুই ফিট নয় ইঞ্চি উপরে অবস্থিত।

অশোক অনুশাসন লিপিটী স্তম্ভের গাত্রে খোদিত আছে। স্তম্ভটী পড়িয়া যাইবার সময় খোদিত লিপির একাদশ পংক্তির মধ্যে প্রথম তিন পংক্তির অনেকটা নষ্ট হইয়া গিয়াছে। বাকী পংক্তিগুলি এখনও সুস্পষ্ট আছে। এই অনুশাসন লিপি সম্রাট অশোকের সময়ে প্রচলিত প্রাকৃত ভাষায় রচিত এবং তৎকালীন বৌদ্ধসম্ভ্রমের অন্তর্গত কোনও ভিক্ষু বা ভিক্ষুণী যাহাতে সম্ভ্রমের প্রতিকূল আচরণ না করেন সেজন্য সাবধান করিয়া দিতেছে। অনুশাসনটী নিম্নে উদ্ধৃত হইল :—

- ১। দেবা [নং-পিয়ে পিয়দসি লাজ্জা]
- ২। এল
- ৩। পাট [লিপুতে] যে কেন-
পি সংঘে ভেতবে এ চুংশো
- ৪। ভিথু বা ভিথুনি বা সংঘং ভাখতি সে ওদাতানি
দুসানি সংনংধাপয়িয়া আনাবাসসি
- ৫। আবাসয়িয়ে [।] হেবং ইয়ংসাসনে ভিথুসংঘসি
চ ভিথুনি সংঘসি চ বিংনপয়িতবিয়ে [।]
- ৬। হেবং দেবানংপিয়ে আহা [।] হেদিসা চ
ইকা লিপী তুফাকংতিকং ছবাতি সংসল-
নসি নিখিতা

৭। ইকং চ লিপিং হেদিসমেব উপাসকানং-
তিকং নিখিপাথ [।] তে পি চ উপাসকা
অনুপোসথং যাবু

৮। এতমেব সাসনং বিস্বংসয়িতবে অনুপোসথং
চ ধুবায়ে ইকিকে মহামাতে পোসথায়ে

৯। যাতি এতমেব সাসনং বিস্বংসয়িতবে আজানি-
তবে চ [।] আবতে চ তুফাকং আহালে

১০। সবত বিবাসয়াথ তুফে এতেন বিয়ংজনেন [।]
হেমেব সবেষু কোটবিষবেসু এতেন

১১। বিয়ংজনেন বিবাসাপয়াথা [।]'

অনুবাদ :—

১। দেবতাদিগের প্রিয় প্রিয়দর্শী রাজা . . .

৩। পাটলীপুত্রে সজ্জে কেহ
ভেদ উপস্থিত করিতে পারিবে না

৪। ভিক্ষুই হ'ক বা ভিক্ষুণী হ'ক যে সজ্জে ভেদ
উপস্থিত করিবে সে অবশ্য শ্বেতবস্ত্র ধারণ
করিয়া অনাবাসে বাস করিবে।

৫। এবম্প্রকারে এই শাসন ভিক্ষুসজ্জে এবং
ভিক্ষুণীসজ্জে বিজ্ঞাপিত হ'ক।

(১) Hultzsch, *Inscriptions of Asoka*, Oxford, 1925, pp.
161—164.

৬। দেবতাদের প্রিয় এইরূপ বলিতেছেন—এই লিপির একখণ্ড প্রতিলিপি তোমাদের সংসরণে থাকুক; এবং আর একখানি প্রতিলিপি উপাসকগণের নিকট রাখ।

৭-৯। প্রত্যেক উপবাসের দিনে আসিয়া উপাসকেরা এই লিপির প্রতি শ্রদ্ধাবান হউন; প্রত্যেক উপবাসের দিনে মহামাত্রগণ আসিয়া এই লিপির প্রতি শ্রদ্ধাবান হউন এবং ইহার মর্ম্ম অবগত হউন।

১০-১১। তোমাদের অধিকার যতদূর বিস্তৃত ততদূর এই আদেশ প্রচারিত কর। এই প্রকারে সকল দুর্গের আশ্রিত প্রদেশে এই আদেশ প্রচারিত কর।

অশোকের অন্যান্য অনুশাসনের মত এই অনুশাসনেও সম্রাট অশোককে “দেবানাং পিয়” এবং “পিয়দসি লাজা” অর্থাৎ দেবতাদিগের প্রিয়, প্রিয়দর্শী রাজা বলা হইয়াছে। এই রাজাই যে মৌর্য্যরাজ অশোক তাহা সম্প্রতি হায়দ্রাবাদ রাজ্যের মাস্কি গ্রামের নিকট আবিষ্কৃত আর একটী অনুশাসন হইতে প্রতিপন্ন হইয়াছে, কারণ উহাতে অনুশাসনের কর্ত্তাকে “দেবানাং পিয় অশোক” বলা হইয়াছে।

এই মৌর্য্য লিপি ব্যতীত স্তম্ভগাত্রে আরও দুইটী লিপি উৎকীর্ণ আছে। একটী কনিষ্কাদের চত্বারিংশৎ

বৎসরে অশ্বঘোষ নামক রাজার রাজত্ব কালে খোদিত
এবং অপরটি গুপ্ত সময়ে (আনুমানিক ৩০০ খৃষ্টাব্দে)
উৎকীর্ণ। লিপি দুইটি নিম্নে প্রদত্ত হইল :—

১।... পারিগেয্হে রজ্জ অশ্বঘোষস্ত চতরিশে
সবছরে হেমতপথে প্রথমে দিবসে দসমে

২। আ[চা]র্য্যনং স[ম্মি]তিয়ানং পরিগ্রহ বাৎসী-
পুত্রিকানাং

শ্রমটির অনুবাদ :—

রাজা অশ্বঘোষের রাজত্বের চত্বারিংশ বৎসরে হেমন্তের
প্রথম পক্ষে দশম দিবসে

দ্বিতীয়টির অনুবাদ :—

বাৎসীপুত্রিক সম্প্রদায়ের অন্তর্গত সন্নিহিত শাখার
আচার্য্যগণের দান।

অশোক স্তম্ভের পশ্চিম
দিকের অংশ

১৯১৪-১৫ সালে হারগ্রীভস্ সাহেব কর্তৃক অশোক
স্তম্ভের পশ্চিমদিকের অংশে মৌর্য্যযুগের স্তর পর্য্যন্ত খনিত
হয়। খননে একটী চৈত্যাকার মন্দির (apsidal
temple) ও তদুপরি পরবর্তী যুগের একটী সজ্জারামের
চিহ্ন পাওয়া গিয়াছিল। তক্ষশীলা ও সাঁচীতে চৈত্যাকার
মন্দির আবিষ্কৃত হইয়াছে। এই সকল মন্দিরের সম্মুখের

ভাগ চতুষ্কোণ কিন্তু পশ্চাদ্ভাগ অথবা মন্দিরের যে অংশে দেবতা প্রতিষ্ঠিত হয় তাহা অর্দ্ধবৃত্তাকৃতি। আমাদের দেশে ঠাকুরঘরে বা মন্দিরে চারিকোণা বেদী বা আর্য্যপট থাকে, কিন্তু বৌদ্ধদিগের মন্দিরে গোলাকার স্তূপ থাকিত এবং তাহার পশ্চাদংশ স্তূপের অর্দ্ধাকারে, চারিকোণা না করিয়া গোলাকারে, তৈয়ারী করা হইত। এই জাতীয় মন্দিরকে চৈত্য়মন্দির (apsidal) বলা হয়। সারনাথের চৈত্য়মন্দিরটী $২১" \times ১৩" \times ৪"$ আকারের ইটে নির্মিত, স্তূপের ইহা মৌর্য বা শূন্যযুগের পরবর্তী হইতে পারে না। এই সমস্ত ইমারতের মধ্যে অনেকগুলি সুন্দর খোদাই করা মৌর্য বা শূন্যযুগের মূর্তির টুকরা এবং ইমারতের পাথরের টুকরা পান্ভয়া গিয়াছে। এই গুলি বোধ হয় অন্য ধ্বংসাবশেষ হইতে আনিয়া এই অংশের জমি ভরাট করিবার জন্য ফেলা হইয়াছিল। ইহা স্থির যে যে সমস্ত মন্দিরে এই সমস্ত খোদাই করা পাথর বা মূর্তি ছিল তাহা কুষাণ যুগের শেষ ভাগে বিধ্বস্ত করা হইয়াছিল। কিন্তু এই সমস্ত মন্দির কেমন করিয়া ধ্বংস হইয়াছিল তাহা বলিতে পারা যায় না। আবিষ্কৃত কতকগুলি টুকরা নিদর্শন স্বরূপ সারনাথ মিউজিয়মের হলঘরে তিনটি আধারে প্রদর্শিত আছে। ইহাদিগের মধ্যে অশোক স্তম্ভের সিংহের উপরে যে রকম একটি পাথরের চক্র ছিল সেই

রূপ আর একটা পাথরের চক্রের টুকরা আছে। সম্ভবতঃ
অপর একটা অশোকস্তম্ভের উপরে এই দ্বিতীয় পাথরের
চক্রটি ছিল, কিন্তু চীনদেশীয় পরিব্রাজকেরা সারনাথে
কেবল একটা অশোকস্তম্ভের উল্লেখ করায় অনুমান
হয় এই চক্রটি শুঙ্গ আমলের কোন স্তম্ভের শীর্ষদেশে
ছিল। এই সমস্ত টুকরার মধ্যে পাথরের বেদিকার
(railing) থাম ও সূচীর (cross-bar) অংশ এবং পারস্য
রীতির (Indo-Persepolitan capital) অনুকরণে
নির্মিত কতকগুলি স্তম্ভশীর্ষ আছে।

এই স্থান হইতে প্রধান মন্দিরের উত্তর দিকে ফিরিলে
একটা বিচিত্র ধরণের ইমারত দেখা যায়। এই ইমারত
১৯১৪-১৫ সালে আবিষ্কৃত হয়। ইহা আকারে গোল
এবং ব্যাসে ১২' ৭৩"। এই গোলাকার ইমারত বেষ্টিত
করিয়া একটা প্রাচীর আছে। এই প্রাচীরের পূর্ব
দিকের অংশ ৭৩' উচ্চ। ইটের আকার দেখিয়া অনুমান
হয় যে ইমারতটি একটা প্রাচীন স্তূপ, কিন্তু বাহিরের
দেওয়ালটি বোধ হয় পরবর্তীকালে কোন বৌদ্ধ ভক্ত
কর্তৃক নির্মিত হইয়াছিল।

চত্বর হইতে মন্দিরের উত্তর-পূর্ব দিকে একটা প্রস্তর
নির্মিত প্রশস্ত পথ আছে। পূর্বদিকের রাস্তার দ্বায়ে
ইহারও উভয় পার্শ্বদেশ সারিসারি স্তূপ এবং অগ্ন্যগ্ন

ইমারতের ধ্বংসাবশেষে পরিপূর্ণ। পশ্চিমদিকের স্তূপ-শ্রেণীর মধ্যস্থলে প্রথম বা দ্বিতীয় খুঁটাক্কে নির্মিত গোঁতমবুদ্ধের দণ্ডায়মান মূর্তিটী [বি (এ) ২] এবং পূর্বদিকের বীথির নিকট [ডি (ডি) ১] সংখ্যক পাথরের সর্দাল (lintel) আবিষ্কৃত হয়। ইহার কিছু উত্তরে সার জন মার্শেল খৃষ্টপূর্ব প্রথম বা দ্বিতীয় শতাব্দীর একটা বেদিকার এগারটা স্তম্ভ আবিষ্কার করিয়াছেন। এই স্তম্ভগুলি এখন সারনাথ মিউজিয়মে প্রদর্শিত হইয়াছে।

পূর্বোক্তাঙ্কিত বেদিকাটী সম্ভবতঃ প্রধান মন্দিরের উত্তর অংশ খননে আবিষ্কৃত স্তূপটীর চারিপার্শ্বে বা উপরে স্থাপিত ছিল। যে স্থানে এই বেদিকাটী পাওয়া গিয়াছে সেই স্থানে গুপ্তযুগের একটা মন্দিরের মণ্ডপ অবস্থিত ছিল। মধ্যযুগে এই মন্দিরটীর পুনঃসংস্কার হইয়াছিল। ইহা একটা ছোট চারিকোণা প্রকোষ্ঠ; ইহার পূর্ব ও পশ্চিমদিকে দরজা ছিল। পূর্বদিকের দরজার পাথরের চৌকাট চামরধারী মনুষ্য মূর্তি এবং নানাবিধ কারুকার্য শোভিত প্রবেশ পথের সম্মুখে এবং উত্তর ও দক্ষিণদিকের প্রাচীরের বাহিরে কয়েকটা মূর্তির পাদপীঠ সংলগ্ন আছে। এই মূর্তিগুলি এক একটা প্রস্তর নির্মিত ছত্রের নিম্নে প্রতিষ্ঠিত ছিল। এই সকল ছত্রদণ্ডের টুকরা এখনও স্থানে স্থানে বিদ্যমান। দক্ষিণাংশে

৫০ নম্বর মন্দির

অবস্থিত একটি পাদপীঠে গুপ্তযুগে প্রচলিত অক্ষরে উৎকীর্ণ লিপি হইতে জানিতে পারা যায় যে ‘নানাল’ নামক এক বৌদ্ধ ভিক্ষু ইহার উপরে একটি মূর্তি স্থাপন করিয়াছিলেন। এই লিপির দ্বারা এই মন্দির নির্মাণের ও এই সমস্ত মূর্তি প্রতিষ্ঠার সময় নিরূপণ করা যায়। মন্দিরের উত্তর দিকের খোয়ার মেঝের উপরে আবিস্কৃত একটি পোড়া মাটির ফলক (tablet) হইতে এই মন্দির-টীর পুনঃসংস্কারের সময় নির্ণীত হইয়াছে। এই ফলকের উপরে আসীন বোধিসত্ত্ব অবলোকিতেশ্বরের মূর্তির উভয়পার্শ্বে খৃষ্টীয় অষ্টম বা নবম শতাব্দীর নাগরী অক্ষরে উৎকীর্ণ “যে ধর্ম্য হেতু প্রভবা. .” মন্ত্রটি লিখিত আছে। মন্দিরের ভিতরের মেঝেতে পোতা ইচ্চক বেষ্টিত একখানা পাথর ব্যতীত কিছুই পাওয়া যায় নাই। ইহার উপর কোন মূর্তি ছিল বলিয়া বোধ হয় না। সম্ভবতঃ ইহা অগ্নিকুণ্ড বা হোমকুণ্ড ছিল, কারণ খনন-কালে এই মন্দিরের ভিতরে ও বাহিরে ভস্মরাশি ও দন্ধকাষ্ঠ পাওয়া গিয়াছিল। ইহা ব্রাহ্মণদিগের অগ্নি-হোত্র যজ্ঞের অবশেষ বলিয়া বোধ হয়।

উত্তরদিকের অংশ।

সার জন মার্শেল সাহেবের খননে উত্তরদিকের অংশে তিনটি প্রধান সজ্জারামের ভগ্নাবশেষ আবিস্কৃত হয়। এই সমস্ত সজ্জারামে ভিক্ষু ও ভিক্ষুণীরা বাস করিতেন।

এখনও অনেকগুলি সজ্ঞারাম বোধ হয় ভূগর্ভে প্রোথিত আছে; কারণ চীনদেশীয় পরিত্রাজক হয়েঙ-সঙের আগমনকালে যুগদাবে ১,৫০০ ভিক্ষু বাস করিতেন। এই অংশের সজ্ঞারামগুলি কুষাণবংশীয় শেষ রাজাদিগের সময়ে নির্মিত। ধর্মচক্রজিনবিহার নির্মাণ না হওয়া পর্য্যন্ত এই সজ্ঞারামগুলি মাঝে মাঝে সংস্কৃত হইয়া খৃষ্টীয় দ্বাদশ শতাব্দী পর্য্যন্ত ব্যবহৃত হইয়াছিল। ২, ৩ ও ৪ চিহ্নিত সজ্ঞারামগুলি ১৬ হইতে ১৮ ফিট নিম্নে আবিস্কৃত হইয়াছে।

কান্থকুজরাজ গোবিন্দচন্দ্রের বৌদ্ধরাণী কুমরদেবীর ধর্মচক্রজিনবিহার নির্মাণের কথা ১৯০৭-৮ খৃষ্টাব্দের খননে আবিস্কৃত একটি শিলালেখ [ডি (এল) ৯] হইতে জানিতে পারা যায়। বিহারটী প্রধান মন্দিরের ঠিক উত্তরদিকে অবস্থিত ছিল। ইহার আবিস্কৃত অংশ পূর্ব হইতে পশ্চিমে ৭৬০ ফিট লম্বা। ইহার পূর্বদিকে দুইটি উন্মুক্ত প্রাঙ্গণ এবং পশ্চিমদিকে একটি ছোট মন্দির আছে। এই মন্দিরে যাইবার দীর্ঘ স্তূপ পথটীও বাহির হইয়াছে। বিহারটী ৪' ৪" চওড়া ইষ্টকনির্মিত প্রাচীর দ্বারা বেষ্টিত ছিল। প্রাচীরের দক্ষিণাংশ আবিস্কৃত হইয়াছে। উত্তর এবং পশ্চিম সীমার প্রাচীর এখনও আবিস্কৃত হয় নাই। ইহা সম্ভবতঃ লুপ্ত হইয়াছে অথবা অংশবিশেষ পুনরুদ্ধার হইতে পারে।

রাণী কুমরদেবীর ধর্ম-
চক্রজিনবিহার

এরূপ বিচিত্র ধরণে নির্মিত বৌদ্ধ ইমারত অশ্রুত দেখা যায় না। ইহার মধ্যস্থলে একটা সমচতুষ্কোণ প্রাঙ্গণ। প্রাঙ্গণের তিন দিকে ইমারত এবং পশ্চিমদিক উন্মুক্ত। ইমারতগুলির মেঝে মধ্যপ্রাঙ্গণ অপেক্ষা প্রায় ছয় ফিট উচ্চ ছিল। পূর্বদিকের ভিত্তির নীচের সকল কক্ষগুলি এবং উত্তর ও দক্ষিণ দিকের ঐরূপ কক্ষের কয়দংশ পাওয়া গিয়াছে। ভিত্তিমূলের (plinth) ভিতর ও বাহিরের প্রাচীর কারুকার্যখচিত ইষ্টকে নির্মিত। এই কারুকার্যের নমুনা প্রাঙ্গণের দক্ষিণ-পূর্ব কোণের ভিত্তিমূলে পরিষ্কার দেখা যায়। উপরিস্থ কক্ষগুলি লুপ্ত ইইয়াছে তবে ধ্বংসাবশেষ ইহাতে তাহা-দিগের আকার কতকটা অনুমান করা যায়। উপরের গৃহগুলির দেওয়ালের ভিত্তিমূলের সমসূত্রে ছিল এইরূপ অনুমান করিলে সমস্ত ইমারতটীর আকার ও গঠনপ্রণালী বুঝিতে পারা যায়। এই ইমারতে ব্যবহৃত অনেক প্রস্তরখণ্ড ভিতরের প্রাঙ্গণে প্রাপ্ত হওয়ায় মনে হয় বাবু জগৎসিংহ খনন কালে এই ইমারতটী আবিষ্কার করিতে পারেন নাই। সম্ভবতঃ মধ্যপ্রাঙ্গণের তিনদিকে তিনটা অল্প পরিসর অলিন্দ ছিল। অলিন্দের ছাদ প্রস্তরস্তম্ভের উপরে রক্ষিত ছিল এবং অলিন্দের প্রত্যেক কোণে সমচতুষ্কোণ ক্ষুদ্র কক্ষ ছিল। প্রস্তরস্তম্ভের অধিষ্ঠান (base-stone) ইহাতে বুঝিতে পারা যায় যে স্তম্ভ ও

অর্কোডিন্স স্তম্ভগুলি (pilaster) প্রাচীর গাত্রে নির্মিত ছিল। এই বারান্দাটি প্রায় সাত ফিট প্রশস্ত এবং ইহার ছাদ বড় বড় প্রস্তরখণ্ডে নির্মিত ছিল। উত্তর দিকের ধ্বংসাবশেষের মধ্যে এই সকল প্রস্তর রাখা আছে। প্রত্যেকটিতে এক একটি পদ্ম খোদিত আছে।

পূর্বদিকের অলিন্দে একটি সোপানশ্রেণী, একটি প্রবেশ কক্ষ এবং কয়েকটি প্রতিহার কক্ষ ছিল। বারান্দার কোণে সমচতুর্কোণ কক্ষগুলিতে এবং প্রতিহার কক্ষের প্রতি কোণে এক একটি অর্কোডিন্স (pilaster) স্তম্ভ ছিল। এই সকল কক্ষের ছাদ স্ফুট করিবার জন্মই বোধ হয় এই অর্কোডিন্স স্তম্ভগুলি নির্মিত হইয়াছিল। প্রকোষ্ঠের ছাদের মাঝখানকার একখানি পাথর [ডি (আই) ১১৭] সারনাথ মিউজিয়মের উত্তরদিকের বারান্দায় প্রদর্শিত আছে। কি উদ্দেশ্যে প্রাঙ্গণের আর দুইদিকের কক্ষগুলি নির্মিত হইয়াছিল তাহার কারণ নির্দ্ধারণ করা যায় না। সম্ভবতঃ এইগুলি দেবমন্দির ছিল, আর প্রাঙ্গণের দিকে প্রসারিত অলিন্দের কিয়দংশ সন্থাগার রূপে (hall of audience) ব্যবহৃত হইত।

ভিতরের প্রাঙ্গণটি উন্মুক্ত। ইহার মেঝে পাকা ও কাঁকর-চূণ দিয়া মাজা। এই প্রাঙ্গণের উত্তর-পূর্ব কোণে

একটি প্রাচীরবেষ্টিত কূপ (ব্যাস ৫') আছে। কূপটি মন্দিরের সমসাময়িক, কিন্তু মধ্যবর্তী প্রাঙ্গণে যাইবার সোপানশ্রেণীটি পরে নিৰ্ম্মিত হইয়াছে।

প্রধান মন্দিরের পূর্বদিকের প্রাঙ্গণ দুইটি পূর্ব হইতে পশ্চিমে ১১৪ ও ২৯০ ফিট লম্বা এবং মন্দিরের প্রবেশপথ হইতে দেখা যায়। প্রথম প্রাঙ্গণটির মেঝে বেলে পাথর বাঁধান। তাহার কিয়দংশ যথাস্থানে পাওয়া গিয়াছে, কিন্তু তাহার উপরে কোনরূপ কারুকার্যের চিহ্ন নাই। নক্সায় (চিত্র ১) প্রথম ও দ্বিতীয় তোরণ (First Gateway and Second Gateway) রূপে বর্ণিত ইমারত দুইটি এই প্রাঙ্গণের শোভাবর্দ্ধন করিত। দ্বিতীয় তোরণটি প্রথম তোরণ অপেক্ষা বৃহদাকার এবং প্রত্যেক তোরণের বহির্দেশে প্রতোলী (bastion) ও প্রতিহার গৃহ ছিল। প্রথম তোরণের উত্তরদিকের প্রতোলী ভাল অবস্থায় পাওয়া গিয়াছে কিন্তু দ্বিতীয় তোরণের ভিত্তি মাত্র অবশিষ্ট আছে। ভূমি হইতে আট ফিট নীচে এই ভিত্তির প্রথমস্তর থাকায় অনুমান হয় যে ইহার উপরে একটি অতি উচ্চ ইমারত ছিল। এখন ইহার সামান্যই অবশিষ্ট আছে। উভয় তোরণই ধর্ম্মচক্রজিনবিহারের ন্যায় একই উপাদানে এবং একই রীতিতে নিৰ্ম্মিত হইয়াছিল। সম্ভবতঃ আর একটি বৃহত্তর তোরণ এবং

এক বা একাধিক প্রাঙ্গণ আরও পূর্বদিকে ছিল।

পশ্চিমাংশের সমস্ত জমি ধর্মচক্রজিনবিহারের সীমা-ভুক্ত। এই দিকে দ্বিতীয় সংখ্যক সজ্জারাম ব্যতীত আর একটা ভূগর্ভনিহিত গৃহ আবিষ্কৃত হইয়াছে। ১৯০৭-৮ খৃষ্টাব্দে ইহার কতক অংশ বাহির হয় এবং তখন পয়ঃ-প্রণালী বলিয়া অনুমিত হয়। কিন্তু ১৯২০ খৃষ্টাব্দের খননে জানা গেল যে ইহা একটা ক্ষুদ্র ভূমধ্যস্থিত মন্দিরে যাইবার পথ, লম্বায় ১৬০' ৯"।

এই সুড়ঙ্গের সিঁড়ি দিয়া নামিতে হয়; ইহার মেঝে খোয়া দিয়া বাঁধান। সিঁড়ির শেষে প্রবেশ পথ, তাহার ছাদটা নীচু। সুড়ঙ্গের কতক অংশ প্রস্তরনির্মিত, বাকিটা ৯" X ৭" X ১১" মাপের ইটকনির্মিত। ধর্মচক্রজিন-বিহার নির্মাণ কালেও ঠিক এই আকারের ইটক ব্যবহৃত হইয়াছিল। এই সুড়ঙ্গটা ৬' উচ্চ এবং মোটের উপর ৩১' প্রশস্ত। প্রবেশদ্বার হইতে ৮৭ ফিট দূরে পথটা একটা (১২' ৭" লম্বা এবং ৬' ১০" চওড়া) কক্ষে পরিণত হইয়াছে। উপর হইতে এই কক্ষে নামিবার একটা স্বতন্ত্র সিঁড়ি এবং দুই পার্শ্বে দুইটা দ্বার আছে। প্রাচীর গায়ে যে সমস্ত কুলঙ্গী আছে তাহাতে বোধ হয় দিবাভাগে সুড়ঙ্গটির অন্ধকার দূর করিবার জন্য প্রদীপ রাখা হইত। এই সুড়ঙ্গের ছাদ বৃহদাকার প্রস্তর খণ্ডে নির্মিত।

মন্দিরটি আকারে সমচতুষ্কোণ, কিন্তু এখন কেবল মাত্র ইহার প্রাচীরের ভিত্তিমূল অবশিষ্ট আছে। আকারে মন্দিরটি পূর্ববর্ণিত বজ্রবাহী মন্দিরের মত। সম্ভবতঃ এই মন্দিরে কোন দেবমূর্তি প্রতিষ্ঠিত ছিল, কিন্তু কেহ কেহ অনুমান করেন ইহা ভিক্ষুগণের নির্জনে ধ্যান করিবার জন্য ব্যবহৃত হইত।

মোগল দুর্গে অনেক গুপ্ত পথ দেখিতে পাওয়া যায়। মুসলমান আবির্ভাবের পূর্বে নির্মিত এই একটা মাত্র সুড়ঙ্গ পাওয়া গিয়াছে। সংস্কৃত সাহিত্যে এরূপ গুপ্ত পথ বা সুড়ঙ্গের ভূয়োভূয়ঃ উল্লেখ আছে। মহাভারতের আদিপর্বে কথিত আছে যে পাণ্ডবগণ নিজ প্রাণ রক্ষা করিবার জন্য এইরূপ গুপ্তপথ দিয়া জতুগৃহ হইতে পলায়ন করিয়াছিলেন।

ধর্ম্যচক্রদিনবিহারে দুইটা প্রামূর্তি [বি (এফ)৪-৫] ব্যতীত এপর্যন্ত কোন দেবমূর্তি পাওয়া যায় নাই। বোধ হয় ইহারা গঙ্গা ও যমুনার মূর্তি (যদিও তাঁহাদের বাহন নাই)। এজন্য এই বিহারে কোন দেবতা প্রতিষ্ঠিত ছিল তাহা নির্ণয় করা কঠিন। কিন্তু কুমরদেবীর প্রশস্তি পাঠে রায় বাহাদুর দয়ারাম সাহনী অনুমান করেন যে ইহা রাজ্ঞী কুমরদেবী কর্তৃক প্রতিষ্ঠিত বৌদ্ধ দেবতা বসুন্ধারার মন্দির। সারনাথে আবিস্কৃত তিনটা

বসুধারার [বি (এফ) ১৯-২১] মূর্তি এই মন্দিরটির সমসাময়িক। বর্ণনা অনুসারে বোধ হয় কুমরদেবী যে তাত্রপাটে ধর্মচক্রজিনদেবের উপদেশ উৎকীর্ণ করাইয়া-
ছিলেন তাহাও সম্ভবতঃ এই মন্দিরে রক্ষিত ছিল।

নিম্নলিখিত কারণে রায় বাহাদুর দয়ারাম সাহনী মহাশয় এই ইমারতটিকে কুমরদেবীর ধর্মচক্রজিনবিহার বলিয়া সিদ্ধান্ত করেন :—ইহা সজ্জারাম হইতে পারে না কারণ (১) ইহার আকার বিভিন্ন এবং একদিক সম্পূর্ণ উন্মুক্ত ; কিন্তু বৌদ্ধ সজ্জারামগুলি সাধারণতঃ চতুঃশালা-জাতীয় অর্থাৎ চতুর্দিকে কক্ষ পরিবেষ্টিত। (২) বাসোপযোগী স্থান ইহাতে ভুল্ল ; (৩) আর কোন সজ্জারামে এরূপ তোরণবিশিষ্ট বিস্তৃত প্রাঙ্গণ বা অলঙ্কার-প্রাচুর্য্য দেখা যায় নাই। দ্বিতীয় তোরণের দক্ষিণদিকে আবিস্কৃত কুমরদেবীর শিলালিপিতেও [ডি (এল) ৯] ধর্মচক্রজিনবিহার নামধেয় ইমারত নির্মাণের কথা উল্লেখ আছে।

এই বিহারটি নির্মাণ করিতে যেরূপ শ্রম ও অর্থব্যয় হইয়াছিল তাহা হইতে স্পষ্টই বুঝা যায় যে ইহা কোন বিশিষ্ট ধনী অথবা রাজার কীর্তি। কুমরদেবীর স্বামী মহারাজ গোবিন্দচন্দ্র স্বয়ং নির্ভাবান্ হিন্দু হইয়াও তাঁহার অনুরোধে শ্রাবস্তী নগরের জেডবন

সজ্জারামের অধিবাসী বৌদ্ধভিক্ষুগণের উদ্দেশে যে পাঁচ-খানি নিকর গ্রাম দান করিয়াছিলেন ইহাও রাজ্যী কুমরদেবীর বৌদ্ধধর্মের অনুরক্তির বিশিষ্ট প্রমাণ। সারনাথে এই মন্দির প্রতিষ্ঠা তাহারই ফল।

দ্বিতীয় সজ্জারাম।

কুষাণযুগের শেষ ভাগে অথবা গুপ্তযুগের প্রারম্ভে নির্মিত তিনটি সজ্জারামের মধ্যে দ্বিতীয় সংখ্যক সজ্জারামটি ধর্ম্মচক্রজিনবিহারের পশ্চিমদিকে ধ্বংসাবশেষের নিম্নের আবিস্কৃত হয়। ইহার পশ্চিম প্রাচীরই মৃগদাবের পশ্চিম সীমা। ইহার দেওয়ালের বর্তমান উচ্চতা ভিত্তি হইতে তিন বা চার ফিটের অধিক হইবে না এবং স্থানে স্থানে অংশবিশেষ একেবারে বিলুপ্ত হইয়াছে। এই ইমারতের নক্সা কিতো সাহেব কর্তৃক উৎখাত সজ্জারামের অনুরূপ। এ পর্য্যন্ত খননে পশ্চিমদিকে নয়টি কক্ষ, দক্ষিণ-পূর্ব কোণে দুইটি কক্ষের কিয়দংশ, দক্ষিণ ও পশ্চিম দিকের দালানের অধিকাংশ এবং দক্ষিণাংশের দুইটি ঘর পাওয়া গিয়াছে। পূর্বদিকের বারান্দায় একটি অস্থায়ী রন্ধনশালা ছিল এবং তাহাতে একটি ইষ্টকনির্মিত অনুচ্চ বেদী ও ২৩টি ইষ্টকনির্মিত উনান দেপিতে পাওয়া যায়; কিন্তু মাটির গামলা ও হাঁড়ী ব্যতীত আর কোন তৈজসপাত্র পাওয়া যায় নাই। এই সজ্জারামের আজিনার মাপ পূর্ব হইতে পশ্চিমে

৯০' ১০" এবং খননে অবগত হওয়া যায় যে ইহার বহির্ভাগের মাপ দৈর্ঘ্য প্রায় ১৬৫' ছিল। পশ্চিম-দিকের ঘরগুলির মধ্যে দক্ষিণদিকের কোণ হইতে ষষ্ঠ কক্ষটী সর্বাপেক্ষা বৃহৎ। খনিত অংশে বারান্দার একটীও স্তম্ভ পাওয়া যায় নাই, তবে অনুমান হয় যে সেগুলি তৃতীয় ও চতুর্থ সজ্জারামের স্তম্ভের মতন ছিল। পশ্চিম বারান্দার দেওয়ালের দক্ষিণ অংশের দুইটী স্তম্ভের অধিষ্ঠান (base-stone) পাওয়া গিয়াছে।

সার জন মার্শেল সাহেবের খননে ইহার নিম্নে আর একটী পুরাতন সজ্জারামের চিহ্ন পাওয়া যায়। এই প্রাচীনতর ইমারতটী কোন সময়ে নির্মিত হইয়াছিল তাহা স্থির করা কঠিন। ইহার আরও নিম্নে কোন ইমারত আছে কি না তাহাও বলা যায় না।

কুমরদেবীনির্মিত মন্দিরের পূর্বদিকে তৃতীয় সজ্জারাম অবস্থিত। সারনাথে আবিষ্কৃত ইমারতের মধ্যে এইটীই সর্বাপেক্ষা সুরক্ষিত। এই ইমারতটী দ্বিতীয় সজ্জারামের অনুরূপ। ইহার দক্ষিণ দিকের চারিটী কক্ষ, পশ্চিম দিকের কক্ষশ্রেণী, ভিতরের প্রাঙ্গন এবং বারান্দার কিয়দংশ বাহির হইয়াছে। পশ্চিম দিকে সাতটী মাত্র কক্ষ থাকায় অনুমান হয় যে একতলায় ২৪টী কক্ষ ছিল। এই দিকের বাহিরের দেওয়াল ১০৯ ফিট ৬ ইঞ্চি

তৃতীয় সজ্জারাম।

একটি প্রাচীরবেষ্টিত কূপ (ব্যাস ৫') আছে। কূপটি মন্দিরের সমসাময়িক, কিন্তু মধ্যবর্তী প্রাঙ্গণে যাইবার সোপানশ্রেণীটি পরে নির্মিত হইয়াছে।

প্রধান মন্দিরের পূর্বদিকের প্রাঙ্গণ দুইটি পূর্ব হইতে পশ্চিমে ১১৪ ও ২৯০ ফিট লম্বা এবং মন্দিরের প্রবেশপথ হইতে দেখা যায়। প্রথম প্রাঙ্গণটির মেঝে বেলে পাথর বাঁধান। তাহার কিয়দংশ যথাস্থানে পাওয়া গিয়াছে, কিন্তু তাহার উপরে কোনরূপ কারুকার্যের চিহ্ন নাই। নক্সায় (চিত্র ১) প্রথম ও দ্বিতীয় তোরণ (First Gateway and Second Gateway) রূপে বর্ণিত ইমারত দুইটি এই প্রাঙ্গণের শোভাবর্দ্ধন করিত। দ্বিতীয় তোরণটি প্রথম তোরণ অপেক্ষা বৃহদাকার এবং প্রত্যেক তোরণের বহির্দেশে প্রতোলী (bastion) ও প্রতিহার গৃহ ছিল। প্রথম তোরণের উত্তরদিকের প্রতোলী ভাল অবস্থায় পাওয়া গিয়াছে কিন্তু দ্বিতীয় তোরণের ভিত্তি মাত্র অবশিষ্ট আছে। ভূমি হইতে আট ফিট নীচে এই ভিত্তির প্রথমস্তর থাকায় অনুমান হয় যে ইহার উপরে একটি অতি উচ্চ ইমারত ছিল। এখন ইহার সামান্যই অবশিষ্ট আছে। উভয় তোরণই ধর্ম্মচক্রজিনবিহারের দ্বায়ে একই উপাদানে এবং একই রীতিতে নির্মিত হইয়াছিল। সম্ভবতঃ আর একটি বৃহত্তর তোরণ এবং

এক বা একাধিক প্রাঙ্গণ আরও পূর্বদিকে ছিল।

পশ্চিমাংশের সমস্ত জমি ধর্ম্মচক্রজিনবিহারের সীমা-
ভুক্ত। এই দিকে দ্বিতীয় সংখ্যক সজ্জারাম ব্যতীত আর
একটি ভূগর্ভনিহিত গৃহ আবিষ্কৃত হইয়াছে। ১৯০৭-৮
খৃষ্টাব্দে ইহার কতক অংশ বাহির হয় এবং তখন পয়ঃ-
প্রণালী বলিয়া অনুমিত হয়। কিন্তু ১৯২০ খৃষ্টাব্দের
খননে জানা গেল যে ইহা একটি ক্ষুদ্র ভূমধ্যস্থিত মন্দিরে
যাইবার পথ, লম্বায় ১৬০' ৯"।

হুড়ঙ্গযুক্ত মন্দির।

এই হুড়ঙ্গে সিঁড়ি দিয়া নামিতে হয় ; ইহার মেঝে
খোয়া দিয়া বাঁধান। সিঁড়ির শেষে প্রবেশ পথ, তাহার
ছাদটি নীচু। হুড়ঙ্গের কতক অংশ প্রস্তরনির্ম্মিত, বাকিটি
৯" X ৭" X ১৬" মাপের ইষ্টকনির্ম্মিত। ধর্ম্মচক্রজিন-
বিহার নির্মাণ কালেও ঠিক এই আকারের ইষ্টক ব্যবহৃত
হইয়াছিল। এই হুড়ঙ্গটি ৬' উচ্চ এবং মোটের উপর
৩৬' প্রশস্ত। প্রবেশদ্বার হইতে ৮৭ ফিট দূরে পথটি
একটি (১২' ৭" লম্বা এবং ৬' ১০" চওড়া) কক্ষে পরিণত
হইয়াছে। উপর হইতে এই কক্ষে নামিবার একটি স্বতন্ত্র
সিঁড়ি এবং দুই পার্শ্বে দুইটি দ্বার আছে। প্রাচীর গাত্রে
যে সমস্ত কুলঙ্গী আছে তাহাতে বোধ হয় দিবাভাগে
হুড়ঙ্গটির অন্ধকার দূর করিবার জন্য প্রদীপ রাখা হইত।
এই হুড়ঙ্গের ছাদ বৃহদাকার প্রস্তর খণ্ডে নির্ম্মিত।

লম্বা। এই সজ্জারামটী বোধ হয় দ্বিতল বা ত্রিতল ছিল, কিন্তু উপরে উঠিবার সিঁড়ি এখনও আবিষ্কার হয় নাই। প্রাচীরগুলি প্রায় ১০ ফিট উচ্চ। পশ্চিম দিকে বাহিরের দেওয়াল ৫½ ফিট এবং দক্ষিণ দিকে ছয় ফিটের অধিক চওড়া। বারান্দাটী প্রায় ১১ ফিট চওড়া এবং ইহার ছাদ প্রাক্কণের দিকে প্রস্তরস্তম্ভের উপরে এবং ভিতরদিকে প্রাচীরে সংলগ্ন অর্কোস্তম্ভ স্তম্ভের উপরে স্থাপিত ছিল। এই সমস্ত স্তম্ভ বা অর্কোস্তম্ভ স্তম্ভের শীর্ষভাগ (capital) চতুর্ভুজবিশিষ্ট (bracket-capital)। কুমরদেবী-নির্মিত মন্দিরের প্রাচীর এই ইमारতের পশ্চিমদিকের পঞ্চম কক্ষটির উপর দিয়া গিয়াছে এবং সেটি রক্ষা করিবার জন্য তাহার নিম্নে একটি নূতন দেওয়াল দেওয়া হইয়াছে।

প্রকোষ্ঠগুলির দ্বারের উচ্চতা ৬' ৭" এবং প্রস্থ ৪' ২"। কাঠের দরজাগুলি পাওয়া যায় নাই। তৃতীয় নম্বর গৃহের দরজার কপালীটী (lintel) জীর্ণাবস্থায় পাওয়া গিয়াছিল। বর্তমানকালে তৎস্থানে নূতন কাঠ দেওয়া হইয়াছে। এই কপালীটির উপরকার কারুকার্য্যখোদিত ইষ্টকগুলি বিশেষ উল্লেখযোগ্য। অধিকাংশ গৃহে গবাক্ষ ছিল এবং তাহাতে প্রস্তরনির্মিত জাকরি ছিল। এই প্রকার দুইখানি জাকরি [ডি (ঈ)

২ ও ৪] পাওয়া গিয়াছে। কক্ষের ভিতরদিকের ইষ্টক-গুলি মন্ডন নহে। বোধ হয় দেওয়ালে আস্তুর (plaster) ছিল, যদিও বর্তমানে তাহার কোন চিহ্ন নাই। এই কক্ষের পূর্বদিকের ঘরটী সজ্জারামের প্রবেশ পথ। কুমরদেবীর মন্দিরের প্রথম তোরণটী রক্ষার্থে ইহার পূর্বাংশ খনন করা হয় নাই। দক্ষিণদিকের তৃতীয় কক্ষের পশ্চাতের কক্ষটী ১৭ ফিট পর্য্যন্ত খনন করা হইয়াছিল। এই কক্ষটীর কোন প্রবেশদ্বার না থাকায় মনে হয় ইহা সম্ভবতঃ ভাণ্ডার অথবা উপরের কোন ঘরের ভিত্তি ছিল।

এই সজ্জারামের আজিনা, বারান্দা এবং কক্ষের মেঝে পাতকি (laid flat) ইটে গাঁথা। প্রাঙ্গণের জল-নিকাশের জন্য পশ্চিম কোণে একটী পয়ঃপ্রণালী আছে। এই প্রণালীর মুখে একখানি পাথরের বাঁঝরি আছে, ১৯২২ সালের খননে জানা যায় যে এই পয়ঃপ্রণালীটী তৃতীয় সংখ্যক সজ্জারাম অতিক্রম করিয়া পশ্চিম দিকে গিয়াছে। এখন ইহার শেষাংশ কুমরদেবীর মন্দিরের ধ্বংসাবশেষের নিম্নে প্রোথিত আছে।

এই প্রাচীন সজ্জারাম হইতে দুইখানি মন্মার প্রস্তর খোদিত চিত্রফলকের (bas-relief) অংশ ব্যতীত যুগ নির্দ্ধারণোপযোগী আর কোনও বিশেষ চিহ্ন পাওয়া যায়

নাই। ইহা বুদ্ধদেবের সম্বোধিলাভের চিত্রের অংশ। কারুকার্য দেখিয়া অনুমান হয় যে উক্ত চিত্রকলকগুলি কুবাণয়ুগের শেষভাগে খোদিত হইয়াছিল।

চতুর্থ সজ্জারাম।

উপরে উঠিয়া একটু দক্ষিণদিকে অগ্রসর হইলে প্রথম সজ্জারামের প্রথম তোরণ দৃষ্ট হয়। এখান হইতে আর একটু পূর্ব দিকে জমির ১৫ ফিট নিম্নে চতুর্থ সজ্জারামটি অবস্থিত। ১৯০৭-৮ খৃষ্টাব্দে এই সজ্জারামের উত্তর-পূর্ব কোণে পূর্বদিকস্থ দুইটি কক্ষ এবং পূর্ব ও উত্তরদিকের বারান্দার কিয়দংশ আবিষ্কৃত হইয়াছে। তারপর উত্তরদিকের চারিটি কক্ষ ব্যতীত আর কিছুই বাহির হয় নাই। এই সজ্জারামের অধিকাংশ কুমরদেবীর মন্দিরের দক্ষিণ সীমানার প্রাচীরের দক্ষিণদিকে এখনও প্রোথিত রহিয়াছে। ভিতরের আজিনার চারিদিকের বারান্দার কয়েকটি স্তম্ভ শায়িত অবস্থায় পাওয়া গিয়াছিল; এখন সেগুলি পুনরায় যথাস্থানে স্থাপিত হইয়াছে। এইগুলি তৃতীয় সজ্জারামের স্তম্ভের অনুরূপ। বারান্দাটি ৭' ৬" হইতে ৭' ১০" চওড়া। আজিনার মেঝে ইফক নির্মিত এবং উত্তর-পূর্ব কোণে জলনিকাশের প্রণালীর দিকে কিঞ্চিৎ ঢালু।

এই সজ্জারামের পূর্বদিকের কক্ষগুলির পশ্চাদভাগে একটি বৃহদাকার প্রস্তর নির্মিত শৈবমূর্তির পাদপীঠ আছে।

বৌদ্ধ সজ্জারামটীর সহিত এই মূর্তিটির [বি (এচ) ১ ; চিত্র ৮ খ] কোনও সম্বন্ধ নাই, কারণ ইহা আনুমানিক ১০০০ খৃষ্টাব্দে নির্মিত। ঐ সময়ের বহু পূর্বের উক্ত সজ্জারাম ভূপ্রোথিত হইয়া গিয়াছিল। সারনাথের এই অংশে কয়েকটি লৌহনির্মিত তৈজসপাত্র ছাড়া উল্লেখযোগ্য আর কোন নিদর্শন পাওয়া যায় নাই। এই তৈজসপাত্রগুলি সজ্জারামের ধ্বংসের সমসাময়িক।

তৎপরে দ্বিতীয় তোরণ হইয়া দক্ষিণদিকে অগ্রসর হইলে ধামেক স্তূপের উচ্চ শীর্ষদেশ নয়নপথে পতিত হয়। এই স্তূপের চতুর্দিকে মেজর কিটো সাহেব কর্তৃক আবিষ্কৃত অনেকগুলি কক্ষ, স্তূপাদি এখন লুপ্ত হইয়াছে। উত্তরদিকের ইমারতগুলি ১৯০৭-৮ খৃষ্টাব্দে বাহির হয়। ইহাদের নির্মাণকাল গুপ্তযুগের শেষভাগ হইতে আরম্ভ করিয়া খৃষ্টীয় দশম হইতে দ্বাদশ শতাব্দী পর্য্যন্ত। এই সকল স্তূপ ও ভজনাগার প্রভৃতি ইষ্টকনির্মিত। খনন চিত্রে এই স্থানের ৭৪ সংখ্যক স্তূপের ভিত্তিটি বিশেষ উল্লেখযোগ্য ; তবে পরবর্তী কালের আর একটি ইমারতের নিম্নে ইহা এখন প্রোথিত আছে।

পূর্বোন্নিখিত কান্তকুজাধিপতি গোবিন্দচন্দ্রের বৌদ্ধ-রাজতীর প্রশস্তিখানি [ডি (এল) ৯] এই অঞ্চলেই বাহির হয়। এই লিপির প্রথম দুইটি শ্লোকে বহুধারা এবং

চন্দ্রকে আহ্বান করা হইয়াছে এবং তৎপরবর্তী শ্লোকে কুমরদেবী ও গোবিন্দচন্দ্রের বংশাবলীর উল্লেখ আছে। একবিংশ শ্লোকে একটী সজ্জারাম নিৰ্ম্মানের সংবাদ পাওয়া যায়। ইহার পরবর্তী দুইটী শ্লোক পাঠে অবগত হওয়া যায় যে কুমরদেবী এক খানি তাত্রপটে বুদ্ধদেবের ধর্মচক্রপ্রবর্তনসূত্র খোদিত করাইয়াছিলেন; তিনি অশোক নিৰ্ম্মিত ধর্মচক্রপ্রবর্তক বুদ্ধ মূর্তিটার পুনঃসংস্কার করেন। এই শ্লোকগুলির কবি শ্রীকুণ্ডর রচয়িতা এবং এই লিপির শিল্পী বামন। এই প্রশস্তি বাতীত এখানে তিনটী বৌদ্ধমূর্তি [বি (সি) ২ ও ৩৫ এবং বি (ডি) ৮] পাওয়া গিয়াছিল। এই মূর্তিগুলি বোধ হয় পুরাকালে ধামেক স্তূপের কুলঙ্গীতে স্থাপিত ছিল।

ধামেক স্তূপ।

সারনাথের স্থাপত্য নিদর্শন সমূহের মধ্যে ধামেকস্তূপ (চিত্র ৪) বিশেষ প্রসিদ্ধ। “ধামেক” নামটী সংস্কৃত “ধর্মোক্ষা” শব্দের অপভ্রংশ। বর্তমান সময়ে জৈন মন্দিরের পাকা মেঝে হইতে এই স্তূপটির উচ্চতা ১০৪ ফিট এবং ভিত হইতে ১৪৩ ফিট। ধামেক স্তূপের নিম্নাংশের বাস ৯৩ ফিট এবং তাহা খুব দৃঢ়ভাবে নিৰ্ম্মিত। প্রস্তরখণ্ডগুলি লৌহকীলক দ্বারা সুদৃঢ়ভাবে আবদ্ধ। স্তূপের নিম্নভাগ প্রস্তর নিৰ্ম্মিত এবং উপরিভাগ ইষ্টক-নিৰ্ম্মিত। পূর্ব উপরাংশের বর্হিভাগেও প্রস্তর গাঁথনী

ছিল। অনুমান হয় ১৭৯৪ খৃষ্টাব্দে জগৎসিংহের লোকেরা এই প্রস্তরগুলি লইয়া যায়। স্তূপের নিম্নাংশ হইতে অপসৃত প্রস্তরগুলি প্রত্নতত্ত্ববিভাগ কর্তৃক পুনরায় সংযোজিত হইয়াছে।

স্তূপের ভিত্তিমূলে আটটি মুখ বাহির হইয়া আছে। ইহাতে আটটি কুলঙ্গী ও পাদপীঠ বর্তমান। প্রত্যেক কুলঙ্গীতে এক একটি মূর্তি স্থাপিত ছিল। এই অংশে প্রাপ্ত তিনটি আসীন মূর্তি [বি (সি) ২ ও ৩এ এবং বি (ডি) ৮] সম্ভবতঃ এই স্তূপের কুলঙ্গীতে নবম কিম্বা দশম শতাব্দীতে স্থাপিত ছিল। প্রথমটি গোঁতমবুদ্ধের সম্বোধির মূর্তি, দ্বিতীয়টি তৎকর্তৃক ধর্মচক্রপ্রবর্তন বা সারনাথে প্রথম ধর্মপ্রচারের মূর্তি এবং তৃতীয়টি বোধিসত্ত্ব অবলোকিতেশ্বরের মূর্তি। অবশিষ্ট পাঁচটি মূর্তি এখনও পাওয়া যায় নাই; এতদ্ব্যতীত এই সমস্ত কুলঙ্গীতে পূর্ববর্তী যুগে যে সমস্ত প্রাচীন মূর্তি প্রতিষ্ঠিত ছিল তাহাও সন্ধান করিয়া পাওয়া যায় নাই।

স্তূপমূলের নিম্নাংশ সুবিস্তৃত নক্সায় পরিপূর্ণ। নক্সা (চিত্র ৯) দেখিয়া বোধ হয় যে স্তূপটি গুপ্তযুগে নির্মিত। ইহাতে ব্যবহৃত ইষ্টকের আকারই তাহার প্রমাণ। ফাণ্ডার্ন সাহেব ইহাকে খৃষ্টীয় একাদশ শতাব্দীর ইমারত রূপে বর্ণনা করিয়াছেন এবং ওরটেল সাহেব বলিয়াছেন

সপ্তম শতাব্দীর মধ্যভাগে ছয়েঙ-সঙের বারাগসীতে অবস্থান কালে ইহার অস্তিত্ব ছিল না। এই স্তূপটী যে পরবর্তী যুগের ইহা অনুমান করিবার যথেষ্ট কারণ বিদ্যমান নাই। ইহার মধ্যে খৃষ্টীয় ষষ্ঠ বা সপ্তম শতাব্দীর অক্ষরে লিখিত “যে ধর্ম্ম . . .” মন্তব্যযুক্ত একখণ্ড প্রস্তর আবিষ্কৃত হইয়াছে। ১৮৩৫ সালে জেনারল কানিংহাম এই স্তূপের উপর হইতে আন্দাজ ১০ ফিট নীচে এই প্রস্তরখণ্ড পাইয়াছিলেন। এখন ইহা কলিকাতা মিউজিয়মে আছে। সম্ভবতঃ স্তূপটীর পুনঃ সংস্কারের সময় ইহা ভিতরে প্রোথিত হইয়াছিল।

স্তূপগাত্রে খোদিত অসম্পূর্ণ চিত্র দেখিয়া অনুমান হয় যে স্তূপটী সম্পূর্ণরূপে নিশ্চিহ্ন হয় নাই। এইটী এইস্থানের সর্বপ্রাচীন ইमारত নহে। স্তূপের ভিত্তি হইতে জেনারল কানিংহাম যে বৃহদাকারের ইষ্টক পাইয়াছেন তাহা খৃষ্টপূর্ব তৃতীয় এবং দ্বিতীয় শতাব্দীর ইमारতে ব্যবহৃত হইত। এই ইষ্টকগুলি তৎকালে নিশ্চিহ্ন আদিম ইमारতে ব্যবহৃত হইয়াছিল। সেই ইमारতটী কিরূপ ছিল তাহা স্থির করিবার উপায় নাই। সম্ভবতঃ সম্রাট অশোক গৌতমবুদ্ধের স্মারক চিহ্ন স্বরূপ এই স্থানে একটী স্তূপ নির্মাণ করাইয়াছিলেন। চীনদেশীয় পরিব্রাজক ছয়েঙ-সঙ বোধ হয় বারাগসী

আসিয়া এই স্তূপটি দেখিয়াছিলেন, কিন্তু তিনি যে সমস্ত ইমারতের বর্ণনা করিয়া গিয়াছেন তাহার কোনটার সহিত ইহার সাদৃশ্য নাই।

ধামেক স্তূপের কিঞ্চিৎ পশ্চিমে মেজর কিটো পঞ্চম সজ্জারাম। সাহেব পঞ্চম সংখ্যক সজ্জারামটি আবিষ্কার করেন। অনেকগুলি খল ও ডাঁটি প্রাপ্ত হওয়ায় এই ইমারতটিকে তিনি রোগীনিবাস (hospital) বলিয়া নির্দেশ করেন। তাহার এ ধারণা ভ্রান্তিমূলক। ইহা একটা বৌদ্ধ সজ্জারাম এবং ইহার নিৰ্ম্মাণ কাল অষ্টম বা নবম শতাব্দী। ইহার নিম্নে গুপ্ত সময়ের স্থাপত্য চিহ্ন পাওয়া গিয়াছে।

ধামেক স্তূপের অদূরে আধুনিক যুগে নিৰ্ম্মিত একটা জৈন মন্দির আছে। এই মন্দিরটি প্রাচীর বেষ্টিত এবং ইহার পূর্বদিকের বৃহৎ আজিনা ধামেক স্তূপ পর্য্যন্ত বিস্তৃত। ১৮২৪ খৃষ্টাব্দে জৈন ধৰ্ম্মাবলম্বী দিগম্বর সম্প্রদায়ের একাদশ তীর্থঙ্কর শ্রীঅংশনাথের উদ্দেশ্যে এই মন্দিরটি নিৰ্ম্মিত হয়। এখানে কোন প্রত্ন নিদর্শন নাই।

চতুর্থ অধ্যায় ।

মিউজিয়ম ।

মণ্ডপে রক্ষিত জৈন ও
ব্রাহ্মণ্য মূর্তি ।

জৈন মন্দিরের পশ্চিমে একটা খোলা মণ্ডপ দৃষ্ট হয়। সারনাথে আবিষ্কৃত নিদর্শনগুলি সংরক্ষণের জন্য ওরটেল সাহেব ১৯০৫ খৃষ্টাব্দে এই মণ্ডপ নিৰ্ম্মাণ করেন। এই মূর্তিগুলি এখন নূতন মিউজিয়ম গৃহে স্থানান্তরিত হইয়াছে। নিকটবর্তী অন্ত্যান্ত স্থান হইতে প্রাপ্ত ব্রাহ্মণ্য ও জৈন মূর্তিসমূহ এখন এই মণ্ডপে রক্ষিত আছে। এ মূর্তিগুলির প্রাপ্তি স্থান মেজর কিটো কর্তৃক সত্তর বৎসর পূর্বে অঙ্কিত একখানি চিত্রগ্রন্থ (Volume of Manuscript Drawings) হইতে নির্দ্ধারিত হইয়াছে।

রায়বাহাদুর শ্রীযুক্ত দয়ারাম সাহনী প্রণীত মিউজিয়-
মের তালিকা গ্রন্থে (Catalogue) এই সমস্ত মূর্তি
সবিস্তারে বর্ণিত আছে। নিম্নে কয়েকটা বিশিষ্ট মূর্তির
পরিচয় দেওয়া হইল।

অসম্পূর্ণ যমুনা দেবীর মূর্তিটা (জি ২) বোধ হয়
মণ্ডপে প্রদর্শিত মূর্তিগুলির মধ্যে সর্বাপেক্ষা প্রাচীন।
ইহা ৩' ৭½" উচ্চ এবং প্রবেশপথের সম্মুখে রক্ষিত। যমুনা

কচ্ছপের উপরে দণ্ডায়মান। তাঁহার মুখমণ্ডল ভাস্কিয়া গিয়াছে। পরিহিত শাটী চরণগ্রস্থি পর্য্যন্ত নামিয়াছে। দেহের উর্দ্ধভাগ অনাবৃত, কিন্তু বর্জুল কণাভরণ, হার, বাজু এবং অগ্রাঙ্গ অলঙ্কারে পরিশোভিত। দেবী হস্তে পুষ্পমাল্য (?) ধারণ করিয়া আছেন। তাঁহার বাম ভাগে একজন উপাসক নতজামু হইয়া অবস্থিত; দক্ষিণে একটি স্ত্রীমূর্তি চামর ব্যজন করিতেছেন, আর একটু দক্ষিণে আর একটি স্ত্রীমূর্তি দেবীর মস্তকে ছত্র ধারণ করিয়া আছেন; ছত্রের উপরিভাগ লুপ্ত। পশ্চাতে একটি মস্তকবিহীন রমণী ডালা হস্তে দণ্ডায়মান। প্রস্তর মূর্তির ঠিক দক্ষিণে একটি পুরুষের পদ এবং তদপেক্ষা ক্ষুদ্র আকৃতির একটি স্ত্রীলোকের পদ দেখা যায়। পাদপীঠের সম্মুখে কচ্ছপের পিছনে একটি ক্ষুদ্র অনঙ্গ (?) মূর্তি। তাহার দীর্ঘ লাস্কুল প্রস্তরখণ্ডের একদিক হইতে অপর দিক পর্য্যন্ত বিস্তৃত। কারুকার্যে শিল্পীর শক্তির বিশেষ পরিচয় পাওয়া যায়। ইহা গুপ্ত সময়ের নিদর্শন। গাজীপুর জেলায় ভিট্রী নামক স্থান হইতে এই মূর্তি আনীত হয়।

আর একটি প্রস্তরখণ্ডে (জি ৩৩; উচ্চতা ২' ২", প্রস্থ ১' ১১") জীরামচন্দ্রের সেতুবন্ধ চিত্রিত আছে। এই নিদর্শনটীও গুপ্ত সময়ের বলিয়া অনুমিত হয়।

প্রস্তরটীর উপরিভাগে [মস্তকবিহীন] রামচন্দ্র পর্ব্বতো-
পরি আসীন ; তাঁহার বাম হস্তে কার্শ্বক । পশ্চাত্তাঙ্গে
দণ্ডায়মান পুরুষমূর্তিটী লক্ষণ ; সম্মুখের পুরুষমূর্তিটী
সুগ্রীব এবং তাহার পশ্চাতে হনুমান । প্রস্তরটীর
অবশিষ্টাংশ ব্যাপিয়া মৎস্য, কুম্ভীর, শঙ্খ ইত্যাদি সামু-
দ্রিক জন্তু এবং বানর জাতীয় যোদ্ধগণ অবস্থিত । বান-
রেরা সেতু নির্মাণের জন্য শিলাখণ্ড বহন করিতেছে ।

মধ্যযুগের অগ্ন্যস্ত্র নিদর্শনের মধ্যে জি ৩৮ সংখ্যক
সদলটী (দৈর্ঘ্য ৮' ৩") বিশেষ প্রাণিধান যোগ্য । ইহা
তিনটী অংশে (panel) বিভক্ত । মধ্য অংশে (panel)
দেবীশ্রী একখানি আসনে এক চরণের উপর অন্য চরণ
স্থাপন করিয়া উপবিষ্টা । তাঁহার চারিটী বাহু । নিম্ন
বামহস্তে কমণ্ডলু এবং নিম্ন দক্ষিণহস্তে অভয়মুদ্রা ;
উপরের দুই হস্তে পদ্ম এবং তদুপরিস্থিত দুইটী হস্তী
দাঁড়াইয়া দেবীর মস্তকে জলবর্ষণ করিতেছে । ফলকের
দক্ষিণ প্রান্তে চতুর্ভূজ গণেশের মূর্তি । তাঁহার নিম্ন
দক্ষিণহস্তে খড়্গ ; নিম্ন বামহস্তে মিষ্টান্নপাত্র এবং
উপরের দুই হস্তেই পুষ্প । তৃতীয় অংশে (panel)
চতুর্ভূজা বাগ্‌দেবী সরস্বতীর মূর্তি বিরাজমানা । দেবী
বীণাবাদনরতা । তাঁহার উপরের দক্ষিণ হস্তে একটী
পুষ্পকোরক এবং নিম্ন বামহস্তে একখানি পুস্তক । তাঁহার

বাইম হংস নীচে বাম কোণে উৎকীর্ণ রহিয়াছে। এই তিনটি অংশের (panel) মধ্যবর্তী নিম্ন অংশ (panel) দুইটিতে নবগ্রহ অঙ্কিত আছে। মন্দিরদ্বারের সর্দলে এইরূপ নবগ্রহ মূর্তি সচরাচর অঙ্কিত দেখা যায়। কেতুকে রাত্রির উপরে বসাইয়া সামঞ্জস্য বজায় রাখা হইয়াছে। পুরাণানুসারে কেতুর চিহ্ন তাহার কুণ্ডলীকৃত লাঙ্গুল এবং রাত্রির মস্তক ও দুই বাহু তাহার সমস্ত শরীরের পরিচায়ক, কেন না এই দুই অঙ্গই অমৃতপানে অমর হইয়াছিল। বাকী অঙ্গগুলি বিয়ুচক্রে খণ্ড খণ্ড হইয়া নাশ প্রাপ্ত হয়। দক্ষিণ অংশে (panel) সূর্যের মূর্তি। তাঁহার দুইটি হস্ত; প্রতি হস্তে একটি পূর্ণবিকসিত পদ্ম। পদদ্বয়ের মধ্যে পত্নী ছায়া অবস্থিত। তাঁহার বাম হস্তে জলপাত্র এবং দক্ষিণ হস্তে অভয়মুদ্রা। মধ্যভাগে বৈষ্ণবীমূর্তি থাকায় ফলকটি যে বিষ্ণু মন্দিরে ছিল তাহা নিঃসন্দেহে অনুমান করা যাইতে পারে।

এই মণ্ডপে প্রদর্শিত জৈন মূর্তির মধ্যে দুইটি বিশেষ উল্লেখযোগ্য। প্রথমটি একটি জৈন চতুমুখ (জি ৬১; উচ্চতা ২' ১০ $\frac{1}{4}$ ", প্রস্থ ১' ১")। রাজপুতানায় এবং মাড়োয়াড়ে ইহার নাম চৌমুহাজী এবং প্রাচীন নাম সর্বতোভদ্রিকা। ইহার চারিদিকে চারিটি জৈন তীর্থঙ্করের মূর্তি আছে :—

১। মহাবীরের [শিরোহীন] নগ্ন দণ্ডায়মান মূর্তি ;
উভয় পার্শ্বে এক এক জন জিন আসীন।
মহাবীরের চিহ্ন বা লাক্ষ্মন সিংহ পাদপীঠে
খোদিত আছে।

২। আদিনাথের নগ্ন দণ্ডায়মান মূর্তি ; ইঁহার চিহ্ন
বৃষ পাদপীঠে উৎকীর্ণ আছে।

৩। শান্তিনাথের নগ্ন মূর্তি ; ইঁহার চিহ্ন মৃগ
পাদপীঠে বর্তমান।

৪। শেষ দিকে অজিতনাথের উলঙ্গ মূর্তি ; ইঁহার
চিহ্ন হস্তী। পাদপীঠে দুইটি হস্তীর মাঝখানে
একটি চক্র বিদ্যমান।

এই চতুমুখ প্রস্তরখানি পূর্বের কাশীর কুইন্স
কলেজে রক্ষিত ছিল।

দ্বিতীয় জৈন মূর্তিটি (জি ৬২) শ্রীঅংশনাথের নগ্ন মূর্তি
(উচ্চতা ১' ৩", প্রস্থ ১' ১")। দুই পার্শ্বে দুই জন
পরিচারক। জিনের মস্তক নাই। বক্ষে শ্রীবৎসচিহ্ন
অঙ্কিত। ইঁহার পাদপীঠে লাক্ষ্মন গণ্ডার খোদিত রহি-
য়াছে। এই মূর্তিটি গুপ্তযুগের। ইহাও কুইন্স কলেজ
হইতে আনীত হইয়াছে।

প্রাচীন যুগদাবের উচ্চ ভূমি হইতে কিয়দূরে রাস্তার
অপর পার্শ্বে নূতন মিউজিয়ম নয়নগোচর হয়। ১৯০৪-৫
খৃষ্টাব্দে খনন কার্য আরম্ভ হইবার পরই সার জন মার্শেল
সাহেব এই মিউজিয়মটী নির্মাণের প্রস্তাব করেন।
তদানীন্তন ভারত সরকারের স্থাপত্য বিশারদ (Con-
sulting Architect) র্যানসাম সাহেব (Mr. James
Ransome) প্রাচীন বৌদ্ধ সঙ্ঘারামের আদর্শ লইয়া এই
মিউজিয়মের নক্সা প্রস্তুত করেন। বর্তমানে প্রস্তাবিত
ইমারতের অর্দ্ধাংশ মাত্র নির্মিত হইয়াছে ; অবশিষ্টভাগ
প্রয়োজন মত সম্পূর্ণ করা হইবে। এই নূতন মিউ-
জিয়মে রক্ষিত প্রাচীন বস্তুনিচয়ের বিস্তৃত বিবরণী রায়
বাহাদুর শ্রীযুক্ত দয়ারাম সাহনী ১৯১২ খৃষ্টাব্দে গ্রন্থা-
কারে প্রকাশ করিয়াছেন। এই পুস্তক মিউজিয়মের
তত্ত্বাবধারকের নিকট পাওয়া যায়। বিশেষ বিশেষ
নিদর্শনগুলিতে সংক্ষিপ্ত বিবরণ নিবদ্ধ আছে।

সারনাথ মিউজিয়ম।

এই মিউজিয়মের উত্তরদিকের গৃহে পোড়ামাটির বস্তু
(terracotta), ইষ্টক এবং যুৎপাত্রাদি রক্ষিত আছে।
কুমরদেবীর মন্দিরের দ্বিতীয় বহিরাঙ্গন হইতে প্রাপ্ত
প্রকাণ্ড জালা দুইটি এই গৃহের মধ্যস্থলে প্রস্তরপীঠের
উপর স্থাপিত হইয়াছে। এই দুইটি জালাতে সম্ভবতঃ
জল অথবা গোধূমাদি রাখা হইত। গৃহের প্রবেশদ্বারের

পোড়ামাটি, ইষ্টক ও
যুৎপাত্রাদির নিদর্শন।

সম্মুখে কাষ্ঠনির্মিত আধারে কয়েকটি অতি প্রাচীন মুদ্রায়
 ভিক্ষাপাত্র, চূণ ও মৃত্তিকা নির্মিত (stucco) মুণ্ড,
 শাক্যমুনির বুদ্ধত্বপ্রাপ্তি, শ্রাবস্তীনগরে তাঁহার অলৌ-
 কিক কার্য ইত্যাদি বিষয়ক চিত্র প্রদর্শিত আছে। এই
 ঘরের পূর্ব প্রান্তে একটা ছোট আধারে মৃত্তিকা-
 নির্মিত মুদ্রাগুলি (seal) রক্ষিত আছে। উন্টা অক্ষরে
 মুদ্রিত লিপিসূক্ত কয়েকটি মুদ্রার (seal) ছাঁচও ইহার
 মধ্যে দৃষ্টিগোচর হইবে। কোন কোন মুদ্রার পশ্চাদ্ভাগে
 সূতার দাগ দেখিয়া অনুমান হয় সেগুলি লিপি বা তাদৃশ
 কোন দ্রব্যে সংলগ্ন সূতায় বাঁধা থাকিত। প্রাচীন সংস্কৃত
 সাহিত্যে পত্রাদি মোহর করিবার উপরোক্ত রীতি সম্বন্ধে
 উল্লেখ দেখা যায় এবং খোতান, সারনাথ ও অন্যান্য
 স্থানের খননে রাজা, রাজমন্ত্রী, রাজকর্মচারী এবং
 অন্যান্য সাধারণ ব্যক্তির নামাক্ষিত মুদ্রা আবিষ্কৃত
 হইয়াছে। খোতানে (খৃঃ দ্বিতীয় শতকে) কাষ্ঠ ও চর্ম্মে
 লিখিত লিপিতে শিল সংলগ্ন থাকার নিদর্শন ভূয়োভূয়ঃ
 আবিষ্কৃত হইয়াছে। এই আধারে রক্ষিত কতকগুলি শিল
 বোধ হয় যাত্রিগণ কর্তৃক সারনাথের বৌদ্ধমন্দিরে
 পূজোপহাররূপে প্রদত্ত হইয়াছিল। বৌদ্ধভক্তেরা
 তীর্থদর্শনের স্মৃতিচিহ্ন (souvenir) স্বরূপ এইজাতীয় চিত্র
 স্ব স্ব গৃহে লইয়া যাইতেন। এক (ডি) ৪-৮ সংখ্যক
 শিলগুলি প্রধান মন্দিরে (মূলগন্ধকুটীতে) রক্ষিত ছিল।

এই মন্দিরে পূর্বের বুদ্ধমূর্তি প্রতিষ্ঠিত ছিল। অবশিষ্ট ফলকগুলিতে “যে ধর্ম্মা হেতু প্রভবা” ইত্যাদি এই বৌদ্ধ মন্ত্ৰটী লিখিত আছে। পালি বিনয়পিটকের অন্তর্গত মহাবগ্গে (১।২৩.৫) কথিত হইয়াছে যে বুদ্ধের শিষ্য অশ্বজিৎ আদৌ সঞ্জয়ের শিষ্য পরিব্রাজক শারীপুত্রকে এই শ্লোকটী বলিয়াছিলেন :—

যে ধর্ম্মা হেতুপ্রভবা হেতুং তেষাং তথাগতোহবদৎ
তেষাঞ্চ যো নিরোধ এবং বাদী মহাশ্রমণঃ ।

“যে সকল পদার্থ হেতু হইতে উৎপন্ন তথাগত তাহাদের হেতু বলিয়াছেন, তাহাদের যে নিরোধ তাহাও তিনি বলিয়াছেন।”

দেওয়ালের গাত্রে কুম্ভ, কলস, স্থালী প্রভৃতি বহু প্রকারের মুন্ময় পাত্র স্তরে স্তরে সজ্জিত আছে।

মিউজিয়মের বড় হল্ ঘরে সর্বাপেক্ষা বৃহৎ মূর্তি-গুলি সংরক্ষিত আছে। হলে প্রবেশ করিবামাত্রই সর্বপ্রথমে (এ-১ সংখ্যক) অশোক স্তম্ভ শীর্ষ (চিত্র ৫) দৃষ্টিপথে পতিত হয়। ইহার উচ্চতা ৭ ফিট, নিম্নাংশ ২ ফিট ও (‘bell-shaped’) ঘণ্টাকৃতি। ইহার কটিদেশে হস্তী, বুষ, অশ্ব এবং সিংহ চলন্ত অবস্থায় খোদিত। তিনটি জন্তুর চলনভঙ্গী সুন্দরভাবে ফুটিয়া উঠিয়াছে। ধাবমান অশ্বের চিত্রটীও সূচারূপে প্রকটিত হইয়াছে।

অশোক স্তম্ভশীর্ষ।

স্তম্ভের উপরিভাগ পরস্পর পৃষ্ঠসংলগ্ন সিংহচতুর্ভুজে শোভিত। প্রত্যেকটি সিংহ ৩' ৯" উচ্চ। এই চারিটি সিংহ মূর্তির মধ্যে দুইটির মস্তক স্থানচ্যুত হইয়াছিল, এক্ষণে পুনঃসংলগ্ন করা হইয়াছে। স্তম্ভটি কলা নৈপুণ্যে, গাম্ভীর্য্যে ও স্বাভাবিকতায় শুধু মৌর্য্য শিল্পের ন্যায় সমগ্র বিশ্বশিল্পের একটি উৎকৃষ্ট নিদর্শন।

স্তম্ভশীর্ষের কটিদেশের চারিটি জন্তু উৎকীর্ণ করিবার তাৎপর্য্য সম্বন্ধে বিভিন্ন মত প্রকাশিত হইয়াছে। ডাক্তার ব্লকের (Dr. Th. Bloch) মতে এই চারিটি জন্তুর দ্বারা সূর্য্য, চন্দ্র, ইন্দ্র এবং শিব এই চারিজন দেবতা সূচিত হইতেছেন এবং ইঁহারা ও অন্যান্য হিন্দুদেবতাগণ যে বুদ্ধদেবের শ্রেষ্ঠত্ব স্বীকার করিতেছেন ইহাও প্রকাশ পাইতেছে। ডাক্তার ভোগেল (Dr. J. Ph. Vogel) বলেন যে এই চারিটি বৌদ্ধধর্ম্মানুমোদিত জন্তু, স্তূতরাং অলঙ্করণ ভিন্ন ইহা অঙ্কনের অন্য কোনরূপ উদ্দেশ্য নাই। রায়বাহাদুর শ্রীযুক্ত দয়ারাম সাহনী মহাশয় অনুমান করেন যে এই জন্তুগুলি স্তম্ভশীর্ষের কটিদেশে ‘অনবতপ্ত’ সরোবরের অস্তিত্ব জ্ঞাপন করিতেছে। এই সরোবরে বুদ্ধদেব স্নান করিতেন এবং বুদ্ধদেবের মাতা মহামায়া গর্ভধারণের পূর্বে ইহার জলে স্নান করিয়াছিলেন। এই সরোবরের চারিটি দ্বার, যথাক্রমে পূর্ব্ব সিংহ, উত্তরে

অশ্ব, পশ্চিমে বৃষ এবং দক্ষিণদিকে হস্তীর দ্বারা রক্ষিত হইত। সারনাথের অশোকস্তম্ভ শীর্ষের কটিদেশে এই চারিটী জন্তু দেখিয়া বোধ হয় যে স্তম্ভের উপরে জন্তু-চতুষ্টয় স্ব স্ব দিক অনুসারে স্থাপিত ছিল। লাহোর মিউজিয়মে প্রত্নতত্ত্ববিভাগে একটী ছোট চতুষ্কোণ মৃৎ-বেদিকার উপরে গোলাকার কুণ্ড আছে। এই কুণ্ডের চারিদিকে চারিটী জন্তুর মূর্তি আছে। অশোক স্তম্ভ-শীর্ষের কটিদেশের এই চারিটী জন্তু যে ভাবে উৎকীর্ণ আছে মূর্তিকার কুণ্ডটিতেও জন্তুচারিটী ঠিক সেই ভাবে স্থাপিত। রায় বাহাদুর মনে করেন যে মূর্তিকার কুণ্ডটিও অনবতপ্ত (পালি অনোতত্ত) হ্রদ এবং ইহা পূজার জন্য ব্যবহৃত হইত। সারনাথের অশোক স্তম্ভশীর্ষের কটিতে অঙ্কিত এক একটী জন্তুর পরে এক একটী ক্ষুদ্র ধর্মচক্র খোদিত আছে; কিন্তু লাহোর মিউজিয়মে প্রদর্শিত মূর্তিকা নির্মিত কুণ্ডটিতে জন্তুগুলির পরে শঙ্খ, বুদ্ধের চূড়া, ধর্ম-চক্র এবং ত্রিরত্ন দেখিতে পাওয়া যায়। এই স্তম্ভশীর্ষের উপরে যে চক্র শোভমান ছিল তাহার কয়েক খণ্ড মাত্র ওরটেল সাহেব উদ্ধার করিয়াছিলেন। সেগুলি এক্ষণে স্তম্ভের নিকটেই একটী আধারে প্রদর্শিত হইয়াছে।

অশোক স্তম্ভশীর্ষের বামপার্শ্বে মথুরার লাল পাথরে নির্মিত প্রকাণ্ড দণ্ডায়মান বোধিসত্ত্ব মূর্তি [বি (এ) ১ ;

কুবাণয়ুগের বৌদ্ধমূর্তি

চিত্র ৭]। এই মূর্তিটী সর্ববাংশেই জেনারেল কানিংহাম কর্তৃক আবস্তীতে প্রাপ্ত এবং কলিকাতায় ইণ্ডিয়ান মিউজিয়মে রক্ষিত বোধিসত্ত্বমূর্তির অনুরূপ। ইহার উচ্চতা ৮' ১½" এবং স্কন্ধদ্বয়ের মধ্যবর্তিস্থানের বিস্তৃতি ২' ১০"। দক্ষিণ হস্ত ভাঙ্গিয়া গিয়াছে, কিন্তু ইহার যে চারিটী খণ্ড পাওয়া গিয়াছে তাহা দেখিয়া পরিষ্কার বুঝা যায় যে ইহা অভয় মুদ্রার পদ্ধতিতে উর্দ্ধে উখিত ছিল। করতলে চক্র এবং প্রত্যেক অঙ্গুলিতে স্বস্তিক চিহ্ন অঙ্কিত। বাম হস্ত মুষ্টিবদ্ধ অবস্থায় বাম নিতম্বে স্থাপিত। দেহের নিম্নাংশ একখানি অন্তর-বাসকে আবৃত। বামস্কন্ধে উত্তরীয়; ইহার উভয় প্রান্ত বাম উরু পর্য্যন্ত লম্বিত। মূর্তিটীর চিবুক, নাসিকা, জ্র এবং কর্ণলতিকা ভগ্ন ও বিকৃত হইয়াছে। তিস্কুদিগের ন্যায় মস্তকটী মুণ্ডিত, উহার মধ্যভাগে একটী গভীর চিহ্ন থাকায় অনুমান হয় যে ঐ স্থানে ঔষধীষ সংলগ্ন ছিল। পদদ্বয়ের মধ্যস্থলে সিংহমূর্তি (উচ্চতা ১৪½")। এই মূর্তির মস্তকের উপরে একটী শিলানিশ্চিত ছত্র ছিল। ছত্রদণ্ডের নিম্নাংশ মূর্তির সন্নিকটে প্রদর্শিত হইয়াছে।

১। অভয়মুদ্রা—ইহাতে দক্ষিণ হস্ত দক্ষিণ স্কন্ধ পর্য্যন্ত উন্নমিত এবং করতল সম্মুখ দিকে ফিরান। উপবিষ্ট এবং দণ্ডায়মান উভয় প্রকার মূর্তিতেই এই মুদ্রা দৃষ্ট হয়

ছত্রের উপরিভাগ ভাঙ্গিয়া গিয়াছিল ; এক্ষণে টুকরাগুলি সংযোজিত করিয়া ছত্রটি গৃহের উত্তর-পূর্ব কোণে রাখা হইয়াছে। মূর্তিটীতে দুইটি লিপি খোদিত আছে ; একটি পাদপীঠে এবং অপরটি মূর্তির পশ্চাত্তানে। ছত্রযষ্টিতেও একটি লিপি আছে। এই লিপি হইতে আমরা অবগত হই যে বল নামক একজন মথুরাবাসী বৌদ্ধভিক্ষু এই মূর্তি ও ছত্র নিৰ্ম্মাণ করাইয়া কুষাণরাজ কণিক্ষের রাজ্যকালের তৃতীয় বৎসরে কাশীতে বুদ্ধদেবের পাদচারণ (চংক্রমণ) স্থানে স্থাপন করিয়াছিলেন। ছত্রযষ্টির লিপি দশপংক্তি বিশিষ্ট এবং ‘মিশ্রিত’ সংস্কৃত ও প্রাকৃত ভাষায় লিখিত :—

- ১। মহারাজস্য কণিক্ষস্য সং ৩ হে ৩ দি ২২
- ২। এতয়ে পূর্বয়ে ভিক্ষুস্য পুষ্যবুদ্ধিস্য সঙ্ঘোবি-
- ৩। হারিস্য ভিক্ষুস্য বলস্য ত্রেপিটকস্য
- ৪। বোধিসত্ত্বো ছত্রযষ্টি চ প্রতিষ্ঠাপিতো
- ৫। বারাগসিয়ে ভগবতো চংকমে সহ্য মাত(১)
- ৬। পিতিহি সহ্য উপক্য্যাচেরেহি সঙ্ঘোবিহারি-
- ৭। হি অন্তেবাসিকেহি চ সহ্য বুদ্ধমিত্রয়ে ত্রেপিটক-
- ৮। য়ে সহ্য ক্ষত্রপেন বনস্পরেণ খরপল্লা-

৯। নেন চ সহা চ চ[তু]হি পরিষাহি সর্বসঙ্ঘং

১০। হিতসুখার্থং

অনুবাদ।—মহারাজ কণিষ্কের তৃতীয় সংবৎসরে হেমন্তের তৃতীয় মাসের দ্বাবিংশ দিবসে, উক্ত দিনে ভিক্ষু পুষ্যবুদ্ধির সহচর ভিক্ষু ত্রিপিটকবিৎ বল কর্তৃক পিতামাতা, উপাধ্যায়, আচার্য্য, সহচরগণ, শিষ্যগণ, ত্রিপিটকবিদা বুদ্ধমিত্রা, ক্ষত্রপ বনস্পর এবং খরপজ্ঞান ও চতুঃপরিষদগণের সমভিব্যাহারে বারাণসীধামে ভগবানের চংক্রমণ স্থানে বোধিসত্ত্ব (মূর্তি) ও ষষ্টি সহ ছত্র প্রতিষ্ঠাপিত হইয়াছে।

মূর্তিস্থ লিপি দুইটি ক্ষুদ্র। তন্মধ্যে পাদপীঠের সম্মুখের খোদিত লিপিটী এইরূপ :—

১। ভিক্ষুস্ত বলস্ত ত্রেপিটকস্ত বোধিসত্ত্বো
প্রতিষ্ঠাপিতো...

২। মহাক্ষত্রপেন খরপজ্ঞানেন সহা ক্ষত্রপেন
বনস্পরেন।

অনুবাদ।—মহাক্ষত্রপ খরপজ্ঞান ও ক্ষত্রপ বনস্পরের সহিত ত্রিপিটকবিৎ ভিক্ষু বল কর্তৃক বোধিসত্ত্ব প্রতিষ্ঠাপিত হইয়াছে।

মূর্তির পৃষ্ঠদেশে লিপিটী এইরূপ :—

১। মহারাজস্ত কণি[কস্ত] সং ৩ হে ৩ দি ২[২]

২। এতয়ে পূর্বয়ে ভিক্ষু বলস্ত ত্রেপিট[কস্ত]

৩। বোধিসত্তো ছত্রষষ্টি চ [প্রতিষ্ঠাপিতো]

অনুবাদ।—মহারাজ কণিষ্কের তৃতীয় সংবৎসরে, হেমন্তের তৃতীয় মাসের দ্বাবিংশ দিবসে, এই দিনে ত্রিপিটকবিৎ ভিক্ষু বল কর্তৃক বোধিসত্ত্ব (মূর্তি) এবং ষষ্টিসহ ছত্র প্রতিষ্ঠাপিত হইয়াছে।

অশোক স্তম্ভের ঠিক অপর পার্শ্বে আর একটা দণ্ডায়মান বৌদ্ধমূর্তি [বি (এ) ২; উচ্চতা ৬']। ইহা স্থানীয় একজন শিল্পী কর্তৃক মথুরার মূর্তির [বি (এ) ১] অনুকরণে নির্মিত।

অশোক স্তম্ভের ঠিক পশ্চাতে পূর্বদিকের দেওয়ালে সংলগ্ন মূর্তিটা [বি (বি) ১৮১] গুপ্তযুগের (খ্রীষ্টীয় চতুর্থ অথবা পঞ্চম শতাব্দীর) শ্রেষ্ঠ নিদর্শনগুলির মধ্যে অন্যতম (উচ্চতা ৫' ৩"; চিত্র ৮-ক)। এই মূর্তিটা ১৯০৪-৫ খৃষ্টাব্দে ওরটেল সাহেব কর্তৃক আবিষ্কৃত হয়। বুদ্ধদেবের সারনাথে 'ধর্ম্মচক্রপ্রবর্তন' এই মূর্তিতে প্রকটিত হইয়াছে। বক্ষোপরি স্তম্ভ হস্তদ্বয়ের মুদ্রা 'ধর্ম্মচক্র মুদ্রা' এবং মূর্তিপীঠে খোদিত চক্র এবং

গুপ্তযুগের বৌদ্ধমূর্তি।

১। ধর্ম্মচক্রমুদ্রা—এই মুদ্রায় হস্তদ্বয় বক্ষের সম্মুখে একপা ভাবে ধৃত হয় যে দক্ষিণ হস্তের অঙ্গুষ্ঠ এবং তর্জ্জনী বামহস্তের তর্জ্জনী অথবা মধ্যমাকে মাত্র স্পর্শ করিয়া থাকে।

যুগযুগল সম্বুদ্ধের প্রথম ধর্মপ্রবর্তনের পরিচায়ক। চক্রটি বুদ্ধকথিত আৰ্য্যসত্যচতুষ্টয় ও অষ্টাঙ্গিক মার্গের বিজ্ঞাপক চিহ্ন। পূর্বের সারনাথের নাম ছিল যুগদাব, যুগদ্বয়ে এই যুগদাব সূচিত করিতেছে। চক্রের দক্ষিণে তিনজন এবং বামে দুইজন ভিক্ষু আসীন। ইঁহারাই পঞ্চভদ্রবর্গীয় শিষ্য বুদ্ধের প্রথম উপদেশবাণী শ্রবণের অধিকারী হইয়াছিলেন। বুদ্ধের পরিধানে সাধারণ ভিক্ষুর পরিধেয় বস্ত্র। এই বস্ত্র কেবল সুক্ষ্ম রেখা দ্বারা সূচিত হইতেছে। মূর্তিটিতে সুচারু শিল্পনৈপুণ্য এবং গভীর ধ্যানতন্দ্রী ভাব সুন্দররূপ প্রকটিত হইয়াছে। মস্তকের চতুর্দিকের প্রভামণ্ডলও চিত্তাকর্ষক। মূর্তির উভয় পার্শ্বে এক একটা বিদ্যাধর শোভমান। ইঁহার ভগবান বুদ্ধের নিমিত্ত পুষ্পোপহার আনয়ন করিতেছেন।

ইহার দক্ষিণ দিকে একটা শিরোহীন বুদ্ধমূর্তি ভূমি-স্পর্শ মুদ্রায় আসীন [বি (বি) ১৭৫]। পাদপীঠের

১। ভূমিস্পর্শ মুদ্রা—ইহাতে দক্ষিণ হস্তের তর্জালী ভূমি স্পর্শ করিয়া থাকে। শাক্যমনি মার কর্তৃক আক্রান্ত হইয়া নিজ অকৃত্রিম সাক্ষ্য প্রদানার্থ পৃথিবী দেবীকে অঙ্গুলি সঙ্কেতে আহ্বান করিতেছেন। এই মুদ্রায় বুদ্ধের মার জয়ের অব্যবহিত পরে বোধিলাভ জ্ঞাপিত হইতেছে। আসীন বুদ্ধমূর্তি-গুলিতে সাধারণতঃ এই মুদ্রা ব্যবহৃত হয়। কোন কোন স্থলে বোধিবৃক্ষের পত্রাবলী-মস্তকের উপরিভাগে অঙ্কিত হয়; কোথাও বা বুদ্ধের প্রসারিত দক্ষিণ হস্তের নিম্নে বহুজরার একটা ক্ষুদ্র মূর্তি উৎকীর্ণ দেখা যায়।

গহ্বরস্থ সিংহটী বোধ হয় গয়ার সমীপবর্তী উরুবিল্ব বনের নিদর্শন। বুদ্ধের দক্ষিণ হস্তের নিম্নে পৃথিবী দেবী ভূগর্ভ হইতে উথিত হইয়া পূর্বজন্মে শাক্যসিংহ যে সর্বস্ব দান করিয়াছিলেন তাহার সাক্ষ্য প্রদান করিতেছেন। গর্তটীর অপর পার্শ্বের মূর্তি দুইটী সম্ভবতঃ মার এবং তদীয় কন্যাত্রয়ের অন্ততম। এই কন্যাগণ বুদ্ধদেবকে প্রলুব্ধ করিতে আসিয়া নিজেরাই তাঁহার অলৌকিক শক্তিবলে জরাগ্রস্তা বৃদ্ধায় পরিণত হয়। পাদপীঠে খোদিত লিপি হইতে মূর্তি প্রতিষ্ঠাতার নাম অবগত হওয়া যায়। ইনি বন্ধুগুপ্ত নামক একজন বৌদ্ধ ভিক্ষু।

এই কক্ষের উত্তর-পশ্চিম কোণে অবস্থিত অসম্পূর্ণ বৃহৎ শিবমূর্তিটী [বি (এচ) ১] উল্লেখযোগ্য (চিত্র ৮খ)। অনুমান ১০০০ খৃষ্টাব্দে নির্মিত। ভগবান শিব অশুর নিধনে নিযুক্ত। কাশীধামে মণিকর্ণিকা ঘাটের উপরে সিদ্ধেশ্বরীর মন্দিরে এই প্রকারের একটী ক্ষুদ্র আকারের মূর্তি প্রতিষ্ঠিত আছে।

মধ্যযুগের শিবমূর্তি।

পরবর্তী কক্ষে বুদ্ধ, বোধিসত্ত্ব ও বৌদ্ধ দেবদেবীর মূর্তি আছে। বৌদ্ধধর্মের অভ্যুদয়ের প্রারম্ভ হইতে অনেক বুদ্ধের নাম পাওয়া যায়। শাক্যবংশীয় গৌতমবুদ্ধ তাঁহাদের মধ্যে একজন মাত্র। গৌতম স্বয়ং তাঁহার

বৌদ্ধ দেবদেবীর মূর্তি পরিচয়।

পূর্বতন আরও ছয়জন বুদ্ধের নাম করিয়া গিয়াছেন এবং তাঁহার পরে বোধিসত্ত্ব মৈত্রেয় যে বুদ্ধত্ব লাভ করিবেন একথাও বলিয়া গিয়াছেন। এই সাতজন বুদ্ধের মধ্যে গোঁতম শেষ বুদ্ধ। তাঁহার পূর্বের ছয়জন বুদ্ধের নাম—বিপশ্চিন, শিখি, বিশ্বভূ, ত্রুকুচ্ছন্দ, কনকমূনি ও কাশ্যপ। অশোকের সময়ে বৌদ্ধেরা গোঁতমের পূর্ববর্তী এই ছয়জন বুদ্ধের অস্তিত্বে বিশ্বাস করিতেন, কারণ অশোক নিজে তীর্থযাত্রাকালে কপিলবস্ত্র নগরের ধ্বংসাবশেষের নিকটে পূর্বতন বুদ্ধ কনকমূনির স্তূপ দর্শন করেন। তাঁহার প্রতিষ্ঠিত একটি শিলাস্তম্ভের লেখ হইতে জানিতে পারা যায় যে সম্রাট অশোক অভিষেকের চতুর্দশ বৎসর পরে সেই স্তূপটির আকার দ্বিতীয়বার বদ্ধিত করেন এবং তাঁহার রাজ্যের বিংশ বৎসরে সেই স্তূপটি অর্চনা করিয়া সেই স্থানে তিনি একটি শিলাস্তম্ভ প্রতিষ্ঠিত করিয়াছিলেন।^১

১। The Asoka edict on the Nigali Sagar pillar :—

১। দেবানংপিয়ন পিয়দসিন লাজিন চোদসবসাভিসিতেন

২। বুৎস কোনাকমনস থুবে হুতিয়ং বচিতে

৩।সাবিসিণ্ডেন চ অনন আগচ্চ মহীস্বিতে

৪।পাপিতে

E. Hultzsch, *Corpus Inscriptionum Indicarum*, Vol. I, *Inscriptions of Asoka*, New Edition, p. 165.

এই যুগে বোধিসত্ত্ব বলিতে গৌতমের বুদ্ধত্ব লাভের পূর্ববাস্থ্য এবং ভবিষ্যৎ বুদ্ধ মৈত্রেয়কে বুঝাইত। কুষাণ বংশীয় সম্রাট কণিষ্কের রাজ্যকালে মহাযান মত ভারতবর্ষে প্রতিষ্ঠা লাভ করে। এই সময় হইতে অবলোকিতেশ্বর বা লোকেশ্বর, মঞ্জুশ্রী প্রভৃতি বোধিসত্ত্বগণ এবং বোধিসত্ত্বগণের শক্তি তারা, প্রজ্ঞাপারমিতা প্রভৃতি দেবীর পূজা আরম্ভ হয়। তখনও মহাযান বৌদ্ধধর্মে তন্ত্রের প্রভাব ভালরূপে বুঝিতে পারা যায় না, কিন্তু বোধিসত্ত্বগণ পঞ্চশ্রেণীভুক্ত বলিয়া কল্পিত হইতে থাকেন। এই পঞ্চধারার মূল আদিবুদ্ধ; আদিবুদ্ধ হইতে পাঁচটি ধ্যানিবুদ্ধ ও মানুষী বুদ্ধ উৎপন্ন হইয়াছেন এবং ধ্যানিবুদ্ধগণ হইতে পাঁচটি বোধিসত্ত্বের সৃষ্টি হইয়াছে। পঞ্চ ধ্যানিবুদ্ধের নাম—অমিতাভ, অক্লোভ্য, অমোঘসিদ্ধি, রত্নসম্ভব এবং বৈরোচন। এখন নেপালে প্রত্যেক চৈত্য়ের চারিদিকে চারিজন ধ্যানিবুদ্ধের মূর্তি প্রতিষ্ঠিত হইয়া থাকে। কেবল দুই একটা চৈত্রে পাঁচজন মূর্তি দেখিতে পাওয়া যায়। এই পাঁচজন মধ্য বর্তমান সময়ে বৈরোচন শ্রেষ্ঠ বলিয়া পূজিত হওয়ায় নেপালে তাঁহার নাম আদিবুদ্ধ। নেপালে বৌদ্ধধর্মের বর্তমান কেন্দ্র স্বয়ম্ভুকেন্দ্রে স্বয়ম্ভু চৈত্য়ের চারিদিকে চারিটা বুদ্ধের মূর্তি পাওয়া যায়। পঞ্চম বুদ্ধ বৈরোচন শ্রেষ্ঠ বিবেচিত হওয়ায় চৈত্য়ের অণ্ডের (drum)

উপরে বোঁকায় (abacus) তাঁহার চক্ষুত্রয় অঙ্কিত আছে। কলিকাতা মিউজিয়মে একটা প্রস্তর নির্মিত ক্ষুদ্র চৈত্যে অশ্বের চারিদিকে পাঁচটা ধ্যানিবুদ্ধের মূর্তি আছে।^১ এই পাঁচটা ধ্যানিবুদ্ধের সিংহাসনের নীচে তাঁহাদের বাহন হস্তী, অশ্ব, মগ্নুর প্রভৃতি খোদিত আছে। কিন্তু আর একটাতে চারিটা ধ্যানিবুদ্ধ এবং অশ্বের উপরে বেদিকায় আদিবুদ্ধ বৈরোচনের চক্ষু অঙ্কিত আছে। এই পাঁচজন ধ্যানিবুদ্ধ তাঁহাদিগের শিষ্য বোধিসত্ত্বের মাথার উপরে অর্থাৎ চূড়ায় বিরাজিত থাকেন। ইহাদের পাঁচজনের মূর্তি একই রূপ, কেবল মূলা দেখিয়া প্রভেদ বুঝিতে পারা যায়। মূলা পাঁচটা— ভূমিস্পর্শ, ধর্ম্যচক্র, ধ্যান, অভয় ও বরদ। পঞ্চ ধ্যানিবুদ্ধ, পঞ্চ মানুষীবুদ্ধ ও পঞ্চ বোধিসত্ত্ব নিম্নলিখিত রূপে তিন শ্রেণীতে বিভক্ত:—

ধ্যানিবুদ্ধ	মানুষীবুদ্ধ	বোধিসত্ত্ব
বৈরোচন	জকুচ্ছন্দ	সমস্তুভজ্র
অকোভ্য	কনকমুন্নি	বজ্রপাণি
রত্ন-সম্ভব	কাশ্যপ	রত্ন-পাণি

(১) *Catalogue and Handbook of the Archaeological Collections in the Indian Museum*, Vol. II, 1883, pp. 81-82, No. Br. 14.

অমিতাভ	গৌতম	{ পদ্মপাণি অবলোকিতেশ্বর
অমোঘসিদ্ধি	মৈত্রেয়	
		বিশ্বপাণি

যে সমস্ত বোধিসত্ত্বের মস্তকে ভূমিস্পর্শ মূর্ত্তায় ধ্যানিবুদ্ধের মূর্ত্তি আছে সেগুলি লোকেশ্বর বা অবলোকিতেশ্বর বা লোকনাথের মূর্ত্তি। লোকনাথ বা লোকেশ্বর দুই, চারি, ছয়, আট, দশ, দ্বাদশ ও ষোড়শ হস্ত সমন্বিত। এইরূপ অক্ষোভ্য মঞ্জুশ্রীর গুরু। মঞ্জুশ্রী বা বাগীশ্বর বৌদ্ধধর্মের বিদ্যার দেবতা। তাঁহার অধিকাংশ মূর্ত্তিতেই একহাতে পদ্মের উপরে একখানি পুস্তক দৃষ্ট হয়। ইহাই মঞ্জুশ্রীর প্রধান চিহ্ন। মঞ্জুশ্রীর শক্তি প্রজ্ঞাপারমিতা নাম্নী দেবীর মূর্ত্তিতে এক বা উভয় হস্তে সনালোৎপলের উপর পুস্তক দেখিতে পাওয়া যায়। মঞ্জুশ্রীর সমস্ত মূর্ত্তিতেই কিরীটে বা জটায় তাঁহার গুরু ধ্যানিবুদ্ধ অক্ষোভ্যের মূর্ত্তি থাকা বিধেয়। বোধিসত্ত্বগণের সাধনায় দেখিতে পাওয়া যায় যে শ্রীবাদিরাট্ মঞ্জুশ্রী বা মঞ্জুঘোষ পীতবর্ণ, ব্যাখ্যান বা ধর্ম্মচক্রমুদ্রাধর, বামহস্তে উৎপলধারী, সিংহাসনে উপবিষ্ট এবং অক্ষোভ্যাক্রান্ত-মৌলি। বজ্রানন্দ মঞ্জুশ্রী অক্ষোভ্যাধিষ্ঠিত জট-

১। *Etude sur L'iconographie Bouddhique de l'Inde*, deuxième partie, p. 40.

মকুটীঃ ; এইরূপ জন্তলের মুকুটে ধ্যানিবুদ্ধ রত্ন-সম্ভবেরঃ মূর্তি বিরাজ করেন, কিন্তু মতান্তরে জন্তলের মূর্তিতেও জটার মধ্যে অক্ষোভ্যের মূর্তি দেওয়া উচিত।^১

সারনাথ মিউজিয়মে প্রদর্শিত বোধিসত্ত্ব মূর্তিগুলির মধ্যে বি(ডি)১ সংখ্যক অবলোকিতেশ্বর, বি (ডি) ২ সংখ্যক মৈত্রেয় এবং বি (ডি) ৬ সংখ্যক মঞ্জুশ্রীর মূর্তি-গুলি বিশেষভাবে উল্লেখযোগ্য।

অবলোকিতেশ্বরের মূর্তি [বি (ডি) ১] একটা পূর্ণ প্রস্ফুটিত পদ্মের উপর দণ্ডায়মান। জানুহয় এবং গলদেশ এই তিন স্থানে মূর্তিটী ভগ্ন, নাসিকা বিকৃত এবং দক্ষিণ হস্ত লুপ্ত হইয়াছে। বামবাহু বিচ্যুত হইয়াছিল, এক্ষণে পুনঃ সংযোজিত হইয়াছে। “বামে পদ্মধরঃ” এই রীতি অনুসারে বাম হস্তে একটা সনাল পদ্ম আছে। দক্ষিণ হস্তের একটা ভগ্ন খণ্ড পাওয়া গিয়াছে, ইহা বরদ মুদ্রায়^২ অবস্থিত। “বরদং দক্ষিণে” এই উক্তি হইতে আমরা জানিতে পারি যে এই মূদ্রা

১। *Etude sur L'iconographie Bouddhique de l'Inde, deuxième partie*, p. 46.

২। *Ibid.*, p. 51.

৩। *Ibid.*, p. 53.

৪। বরদ মুদ্রা—দক্ষিণ হস্ত নিম্নদিকে প্রদর্শিত এবং করতল উর্ধ্বাভায়ে রাখিত। এই মুদ্রা মাত্র দণ্ডায়মান মূর্তির সহিত সংশ্লিষ্ট।

বোধিপদ অবলোকিতেশ্বরের মূর্তিগুলির একটি বিশেষত্ব। মূর্তিটা কটিবন্ধ পর্য্যন্ত নগ্ন। নিম্নদেশ বসনে আবৃত। কর্ণে বর্তুল কর্ণাভরণ এবং গলদেশে জপমালা ও মুক্তা হার যজ্ঞোপবীতের আকারে বক্ষে শোভা পাইতেছে। “বজ্রধর্ম্ম জটাস্তঃস্থম্” এই উক্তি অনুসারে অবলোকিতেশ্বরের জটামুকুটে তাঁহার গুরু ধ্যানিবুদ্ধ বজ্রধর্ম্ম বা অমিতাভের একটি ক্ষুদ্র মূর্তি ধ্যানমুদ্রায় অবস্থিত। বোধিসত্ত্বের পাদমূলে দক্ষিণ হস্তের নিম্নে দুইটা শীর্ণকায় প্রেত বিদ্যমান। ভগবান দক্ষিণহস্তনিঃস্থত অমৃতের দ্বারা তাহাদিগকে তৃপ্ত করিতেছেন। পাদপীঠে খৃষ্টীয় পঞ্চম শতাব্দীর অক্ষরে উৎকীর্ণ একটি সংস্কৃত লিপি আছে। লিপিটা এই :—

- ১। ওঁ দেয়ধর্ম্মোয়ং পরমোপাসক-বিষয়পতি-সুযাত্রস্ত
 - ২। যদত্র পুণং তদ্ভবতু সর্ববসত্ত্বানামানুত্তরজ্ঞানাবাপ্তয়েৎ
- অমুবাদ।

এই মূর্তিটা পরমোপাসক ভূস্বামী সুযাত্র কর্তৃক ভক্তিভরে প্রতিষ্ঠিত। ইহাতে বাহা কিছু পুণ্য সঞ্চয় হইবে সেই পুণ্যের ফলে সর্বব জীবের পরম জ্ঞান লাভ হউক।

১। ধ্যানমুদ্রা—কোড়ে এক হস্তের উপর অস্ত্র হস্ত স্থাপিত। এই মুদ্রা কেবল মাত্র আসীন মূর্তিতেই ব্যবহৃত হয়।

২। *A.S.R.*, pt. II, 1904-5, p. 81, pe. XXXII, 18.

সারনাথে গুপ্তকালের যে সকল মূর্তি পাওয়া গিয়াছে আলোচ্য মূর্তিটা তাহাদের অন্যতম। ইহাতে ভাস্কর যথেষ্ট শিল্প নৈপুণ্য দেখাইয়াছেন। ১৯০৪-৫ খৃষ্টাব্দে প্রধান মন্দিরের দক্ষিণ-পশ্চিম কোণে এই মূর্তিটা আবিষ্কৃত হয়।

বোধিসত্ত্ব বিশ্বপাণির [বি (ডি) ২] দণ্ডায়মান মূর্তি (উচ্চতা ৪' ৬", প্রস্থ ২' ২"); হস্ত পদ পাওয়া যায় নাই। নাসিকা, চিবুক, কর্ণ ভাজিয়া ঈষৎ বিকৃত হইয়াছে। কটিবন্ধে সংলগ্ন বসনে দেহের অধোভাগ আবৃত। বক্ষোদেশে উত্তরীয় বিলম্বিত। মূর্তির অঙ্গ নিরাতরণ। কেশজাল চূড়াবন্ধে মস্তকের উপরিভাগে গ্রথিত, উভয়পার্শ্বে চূর্ণ কুন্তল গ্রন্থি হইতে শিথিল হইয়া ছড়াইয়া পড়িয়াছে। শিরোদেশে অভয়মুদ্রায় আসীন ধ্যানিবুদ্ধ আমোঘসিদ্ধি ক্ষুদ্রাকারে অঙ্কিত রহিয়াছেন। ইহা হইতে মূর্তিটা যে বোধিসত্ত্ব বিশ্বপাণি তাহা অনুমান করা যায়। এই মূর্তিটা বি (ডি) ১ সংখ্যক অবলোকিতে-শ্বরের মূর্তি অপেক্ষা প্রাচীন এবং কুষাণ যুগের বলিয়া মনে হয়।

পদ্মোপরি দণ্ডায়মান বোধিসত্ত্ব মঞ্জুশ্রী মূর্তি [বি (ডি) ৬], উচ্চতা ৩' ১০ ১/২", প্রস্থ ১' ৭ ১/২"। দক্ষিণ জামু ভগ্ন। দক্ষিণ হস্ত নাই কিন্তু ইহা যে বরদ মুদ্রায় প্রসারিত

ছিল তাহা নিঃসন্দেহ। ‘বামেনোংপলং’ এই রীতি অনুসারে বাম হস্তে ধৃত উৎপলের সমুদয় বস্তুটী এখনও বর্তমান। দেহের উপরার্দ্ধ অনাবৃত, নিম্নার্দ্ধে বসনের রেখা বাম উরুতে ফুটিয়া উঠিয়াছে। কেশজাল জটামুকুটের আকারে গ্রন্থিবদ্ধ। জটামুকুটে মঞ্জুশ্রীর “সিংহাসনস্থং অঙ্কোভ্যাক্রান্তমৌলিনং” ধ্যানানুসারে ধ্যানিবুদ্ধ অঙ্কোভ্যের একটি ক্ষুদ্র মূর্তি ভূমিস্পর্শ মুদ্রায় নিবেশিত হইয়াছে। দেহ নানা আভরণে ভূষিত। মূর্তির দক্ষিণে পদ্মের উপর ভূকুটীতারা দণ্ডায়মান। ইঁহার দক্ষিণ হস্তে অক্ষমালা এবং বাম হস্তে কমণ্ডলু। বোধিসত্ত্বের বামে মৃত্যুবঞ্চন তারা; ইঁহার দক্ষিণ হস্তে বরদমুদ্রা এবং বাম হস্তে নীলপদ্ম। মূর্তির পশ্চাত্তাগে পাদদেশ হইতে কিঞ্চিৎ উপরে সপ্তম শতাব্দীর অক্ষরে ‘যে ধর্ম্মা হেতু প্রভবা’ এই বৌদ্ধ মন্ত্ৰটী লিখিত আছে। এই মূর্তিটী ১৯০৪-৫ খৃষ্টাব্দে ওরটেল সাহেব কর্তৃক প্রধান মন্দিরের দক্ষিণ-পূর্ব কোণে আবিষ্কৃত হইয়াছিল।

.বোধিসত্ত্ব অবলোকিতেশ্বর চীনদেশে কোয়ান-য়িন (Kwan-yin) নামে এবং জাপানে ক্যানন (Kwan-non) অথবা করুণাদেবী নামে পূজিত হন। বৌদ্ধদিগের বিশ্বাস যে শাক্যমুনি গোতমবুদ্ধের তিরোধানের ৫,০০০ বৎসর পরে কেচুমতী নামক স্থানে

৩। সিতা তারা।—মৃত্যুবধন তারা হাঁহার নামান্তর। ইনি শ্বেত পদ্ম মধ্যে বন্ধবজ্র পর্যাঙ্কাসনে উপবিষ্টা, দক্ষিণ হস্তে বরদমুদ্রা, বাম হস্তে উৎপল, ঘোড়শী এবং সর্ববালঙ্কারভূষিতা। অক্ষোভোর শক্তিরূপে ইনি চতুর্ভূজা। হস্তদ্বয়ে উৎপল বিদ্যমান। দক্ষিণ হস্ত চিস্তামণিরত্ সন্মুক্ত বরদমুদ্রায় বিশ্রান্ত।^১

৪। জাঙ্গুলী তারা সর্পের দেবী।—শুক্রবর্ণা, চতুর্ভূজা, জটামুকুটিনী, সিতালঙ্কারবতী, শুক্র সর্পভূষিতা, পর্যাঙ্কো-পরি সঙ্কাসনে উপবিষ্টা, প্রথম দুই হস্তে বীণাবাদনরতা, দ্বিতীয় দক্ষিণ হস্তে অভয়মুদ্রা এবং দ্বিতীয় বাম হস্তে সিতসর্প।^২

৫। ভূকুটী তারা।—একমুখী, চতুর্ভূজা, পীতবর্ণা, ত্রিনেত্রা, নবর্যোবনা এবং পদ্মচন্দ্রাসনস্থা। দক্ষিণ হস্তে বরদমুদ্রা এবং অক্ষসূত্র, বামহস্তে ত্রিদণ্ড কমণ্ডলু, মুকুটে ধ্যানিবুদ্ধ অমিতাভ বিরাজিত।^৩

৬। বজ্র তারা।—মাতৃমণ্ডলমধ্যস্থা, অর্ধবাহু, চতু-মুখী, সর্ববালঙ্কার ভূষিতা, কনকবর্ণাভা, কল্যানী, কুমারী, পদ্মচন্দ্রাসনস্থা। প্রত্যেক মুখ ত্রিনেত্রসমন্বিত, মস্তকে

১। *Etude sur L'iconographie Bouddhique de l'Inde, deuxième partie, p. 66.*

২। *Ibid, p. 67.* ৩। *Ibid p 6*

চারিটি ধ্যানিবুদ্ধ বিরাজিত। দক্ষিণ হস্তচতুষ্টয়ে বজ্র, শর, শঙ্খ ও বরদমুদ্রা এবং বাম হস্তচতুষ্টয়ে উৎপল, ধনুক, বজ্রাকুশ ও বজ্রপাশ।^১

৭। রক্ততারা বা কুরুকুঞ্জা।—রক্তবর্ণা, রক্তপদ্মচন্দ্রা-
সনা, রক্তাশ্বরা, রক্তকিরীটবতী ও চতুর্ভূজা। দক্ষিণ
হস্তদ্বয়ে অভয়মুদ্রা ও শর এবং বামহস্তদ্বয়ে রক্তচাপ ও
রক্তোৎপল। দেবী অমিতাভমুকুটী, কুরুকুঞ্জ গিরিশুহা-
নিবাসিনী, শৃঙ্গাররসোজ্জ্বলা এবং নবর্যোবনা।^২

৮। নীলতারা বা একজটা।—একমুখী, ত্রিনয়না,
প্রত্যালীঢ় পদা, ঘোরা, মুণ্ডমালাপ্রলম্বিতা, খর্ব্বা, লম্বো-
দরী, নীলপদ্মশোভিতা, ঘোরাউহাসশালিনী, শবাক্ষাঢ়া,
রক্তবর্তুলনেত্রা, নাগার্ককবিভূষিতা, নবর্যোবনা, ব্যাত্র-
চক্ষ্যাবতকটী, লোলজিহবা, দংশ্ট্রোৎকটভীষণা এবং পিঙ্গ-
লৈকজটাদারিণী। দক্ষিণ হস্তে খড়্গ ও কুপাণ, বাম হস্তে
উৎপল ও নরকপাল, এবং মুকুটে ধ্যানিবুদ্ধ অক্ষোভোর
মূর্তি।^৩

ভূকুটী তারা [বি (এফ) ১], উচ্চতা ৩' ৪", প্রস্থ
১' ৩½"। পদদ্বয় এবং দক্ষিণ হস্ত নাই। নাসিকা ও

১। *Etude sur l'Iconographie Bouddhique de l'Inde, deuxième partie*, p. 70.

২। *Ibid.* p. 75. ৩। *Ibid.*, pp. 75–76.

অবলোকিতেশ্বরের পুনরায় আবির্ভূত হইবেন এবং নাগবৃক্ষের নিম্নে সম্বোধি লাভ করিবেন।

বৌদ্ধ মূর্তির মধ্যে ধনপতি কুবের এবং তাঁহার মহিষী হারিভী এই দুই জনের দণ্ডায়মান মূর্তি [বি (ই) ১] উল্লেখযোগ্য। এই নিদর্শনটী একাদশ শতাব্দীর বলিয়া অনুমিত হয়।

কোন সময়ে বৌদ্ধধর্মের শক্তির উপাসনা প্রবেশ করিয়াছিল তাহা বলিতে পারা যায় না। প্রথমে যে শক্তি বৌদ্ধ সমাজে পূজিত হইয়াছিলেন তাঁহার নাম তারা। যেমন দুর্গা শাক্তের শিবশক্তি এবং দেবমাতা, সেইরূপ বৌদ্ধতারা অবলোকিতেশ্বরের শক্তি এবং বুদ্ধ ও বোধিসত্ত্বগণের মাতৃরূপে পূজিতা। তারার উপাসনা বৌদ্ধগণের নিজস্ব সম্পত্তি অথবা প্রাচীনতর কোনও সম্প্রদায়ের নিকট হইতে লব্ধ ইহা এখনও গবেষণার বিষয়। তবে প্রাচীন হিন্দু গ্রন্থে তারার সুস্পষ্ট উল্লেখ না থাকায় এবং পরবর্তী তন্ত্রাদি শাস্ত্রে তারা অক্ষোভের শক্তিরূপে কীর্তিত হওয়ায় তারা বৌদ্ধ শক্তি বলিয়া অনেকে অনুমান করেন। ‘তারারহস্ত বৃত্তিকা’ প্রভৃতি তন্ত্র গ্রন্থে তারার প্রজ্ঞাপারমিতা এই বৌদ্ধ নাম দেখিতে পাওয়া যায়। ইহাও উক্ত অনুমানের সমর্থক। বৌদ্ধ তারা মন্ত্রের ঋষি অক্ষোভ্য। ইনি

ধ্যানিবুদ্ধ এবং ইঁহাতে প্রকাশিত পরমজ্ঞানই প্রজ্ঞা-
পারমিতা অথবা তারা। নালন্দায় আবিষ্কৃত একটি
তারা মূর্তিতে নিম্নলিখিত তারা মন্ত্রটী দেখিতে পাওয়া
যায়—“উঁ তারে তুভারে তুরে স্বাহা।”^১ বৌদ্ধসমাজে
মহন্তরী বা শ্যামা, খদিরবণী, সিতা, জাসুলী, ভূকুটী, বজ্র,
রক্ত বা কুরুকুল্লা এবং নীলা তারাই প্রসিদ্ধ।

১। শ্যামা বা মহন্তরী তারা।—শ্যামবর্ণ, দ্বিভুজা,
পদ্মচন্দ্রাসনে উপবিষ্টা এবং সর্বাভরণ ভূষিতা। দক্ষিণ
করে বরদমুদ্রা এবং বামে সনালপদ্ম।^২ কদাচিৎ ইঁহার
পদ্মাসন সিংহোপরি স্থাপিত এবং মুকুটে অমোঘসিদ্ধির
মূর্তি অঙ্কিত দেখিতে পাওয়া যায়। অবলোকিতেশ্বরের
সহযোগে ইঁহার মূর্তি বামভাগে অঙ্কিত হয়।

২। খদিরবণী তারা।—হরিদবর্ণা, মুকুটে ধ্যানিবুদ্ধ
অমোঘসিদ্ধি বিরাজিত, দক্ষিণ হস্তে বরদমুদ্রা এবং
বামহস্তে উৎপলধারিণী। দিব্য কুমারী ও সালঙ্কারা।
ইঁহার দক্ষিণ ও বাম পার্শ্বে যথাক্রমে অশোককাস্তা
মারীচী এবং একজটা মূর্তি অবস্থিত।^৩

১ : *Memoirs of the Archaeological Survey of India, No.*
20, p. 17; প্রায় অবিকল এই তারা মন্ত্রটী এখনও বাঙ্গালা দেশে
প্রচলিত আছে।

২ *Etude sur L'iconographie Bouddhique de l'Inde,*
deuxième partie, p. ৬৬.

৩ *Ibid, p. ৬৫.*

স্তম্ভদ্বয় ভাঙ্গিয়া গিয়াছে। পরিধানে একখানি শাটীর
 ন্যায় বস্ত্র এবং অঙ্গে নানাবিধ আভরণ। বামহস্তে
 ত্রিদণ্ডী, কমণ্ডলু, এবং দক্ষিণহস্তে বরদমুদ্রা। এই দুইটী
 লক্ষণ হইতে মূর্তিটী ভূকুটী তার। বলিয়া অনুমিত হয়।

পদ্মোপরি দণ্ডায়মানা খদিরবণী তারা মূর্তি [বি (এফ)
 ২], উচ্চতা ৪' ৮"। মূর্তিটী কটিদেশে ভগ্ন। নাসিকা
 ও কর্ণদ্বয় বিকৃত এবং দুই হস্তের অংশ মাত্র অবশিষ্ট
 আছে; তবে দক্ষিণ হস্ত যে বরদমুদ্রায় বিগ্নস্ত ছিল
 তাহা সহজেই বুঝিতে পারা যায় এবং বাম হস্তে ধৃত
 উৎপলবৃন্তের এক অংশ এখনও বর্তমান। অঙ্গে অলঙ্কার
 বাহুল্য বিদ্যমান। মস্তকে পঞ্চচূড়ায়ুক্ত মুকুটের
 মধ্যভাগে অভয়মুদ্রায় ধ্যানিবুদ্ধ অমোঘসিদ্ধি উপবিষ্ট।
 তারার দক্ষিণে বৌদ্ধ উষাদেবী মারীচী দাঁড়াইয়া
 আছেন। মূর্তিটির মস্তক ও দক্ষিণ হস্ত নাই। বক্ষে
 বজ্র চিহ্ন এবং বাম হস্তে অশোক পুষ্প হাঁহার পরিচয়
 প্রদান করিতেছে। হাঁহার বামে লম্বোদরী একজটা।
 এই সকল লক্ষণ হইতে এই মূর্তিটী খদিরবণী তারা
 বলিয়া অনুমিত হয়। ললাটের গভীর রেখা তাঁহার
 ক্রুদ্ধভাব ব্যক্ত করিতেছে। মূর্তিটী ১৯০৪-৫ খৃষ্টাব্দে
 ওরটেল সাহেব কর্তৃক ধার্মিক স্তূপের উত্তরে আবিষ্কৃত
 হয়।

ললিতাসনে উপবিষ্টা শ্যামতারা [বি (এফ) ৭], উচ্চতা ১' ১০ $\frac{১}{২}$ ", প্রস্থ ১' ৩ $\frac{১}{২}$ "। একখানি অন্তরবাসিক, কাঞ্চী, অঙ্গদ, হার, ইত্যাদি অলঙ্কার তাঁহার অঙ্গের শোভা বর্দ্ধন করিতেছে। দক্ষিণ হস্তে বরদমুদ্রা এবং বাম হস্তে নীলোৎপল। ইহার বামদিকে তাঁহারই অনুরূপ বসনভূষণে সজ্জিতা আর একটা প্রামৃতি দাঁড়াইয়া আছেন। ইনিও সম্ভবতঃ তারা। নিম্নে একজন উপাসক নতজানু হইয়া উপবিষ্ট। মূর্তিটি মধ্যযুগের শেষভাগের (late-medieval) বলিয়া অনুমিত হয়। ইহা ১৯০৪-৫ খৃষ্টাব্দে প্রধান মন্দিরের দক্ষিণ-পশ্চিম কোণে আবিস্কৃত হইয়াছিল।

পূর্ণাঙ্গ বজ্রতারা মূর্তি [বি (এফ) ৮] উচ্চতা ১' ৭", প্রস্থ ১' ৩"। ইনি চতুর্ভুজা এবং অর্ধবাহুসম্বিতা। দক্ষিণ ও বাম হস্তগুলি ভগ্ন। সম্মুখভাগের ললাটে তৃতীয় নেত্রের চিহ্ন বিদ্যমান এবং চুড়ায় দুইটি অক্ষোভোর, একটা অমিতাভোর ও একটা বৈরোচনের এবং পশ্চাত্তাগের মস্তকে অমোঘসিদ্ধির মূর্তি বিরাজমান। মূর্তিটির অস্বাভাবিক স্তনভার এবং অলঙ্কারপ্রাচুর্য্য দেখিয়া মধ্যযুগের বলিয়া অনুমান হয়। ইহা ১৯০৪-৫ খৃষ্টাব্দে প্রধান মন্দিরের দক্ষিণ-পশ্চিম কোণে আবিস্কৃত হইয়াছিল।

বি (এক) ২৩ সংখ্যক মারীচী মূর্তি। মারীচীর তিনটি মুখ, তাহার মধ্যে একটি বরাহের। তিনি দক্ষিণ পদ বাঁকাইয়া (প্রত্যালাটপদা) দাঁড়াইয়া আছেন। মূর্তির পাদপীঠে সাতটি শূকর মূর্তি ও সারথির চিত্র উৎকীর্ণ রহিয়াছে। সূর্য্যমূর্তির পাদপীঠে তাহার রথের সাতটি অশ্ব ও সারথি অরুণের মূর্তি অঙ্কিত থাকে। সাধারণতঃ যে সমস্ত মারীচীমূর্তি দেখিতে পাওয়া যায় তাহা অর্ধভুজা, কিন্তু এই মূর্তিটি ষড়ভুজা। কলিকাতা মিউজিয়মেও এইরূপ ষড়ভুজা মারীচী মূর্তি ২১টি আছে। কালক্রমে মহাযানীয় বৌদ্ধধর্ম মন্ত্রযান, বজ্রযান প্রভৃতি নানাবিধ শাখায় বিভক্ত হইয়া পড়িয়াছিল এবং নানা তান্ত্রিক ক্রিয়াকলাপ ইহার অন্তর্ভুক্ত হইয়াছিল। তান্ত্রিক সাধনার মূল বীজমন্ত্র। আমাদের দেশের গুরু বা ইষ্টমন্ত্রপ্রদাতার যেরূপ শিষ্য বা শিষ্যাকে দীক্ষা দিবার সময় কর্ণে বীজমন্ত্র শ্রবণ করান সেইরূপ বৌদ্ধতান্ত্রিক সাধনাতেও বীজ স্থাপন করিতে হয়। বৌদ্ধদের ‘সাধন মালায়’ ইহার যথেষ্ট পরিচয় পাওয়া যায়। যথা,—

- ১। অশোককাস্তা মারীচী সাধনা।—শূন্যতা ভাবনা করিয়া চন্দ্রে পীতবর্ণ ‘মাং’, তাহার উপরে অশোক পুষ্পের স্তবক, তাহার উপরে

পুনরায় ‘মাং’ নামক বীজ এবং সকলের উপরে দ্বিভুজা একমুখী বৈরোচন-মুকুটিনী, উদ্ধৃস্থিত অশোকশাখালগ্ন বামকরা দেবীকে ধ্যান করিতে হয়।

২। কল্লোক্ত মারীচী সাধনা।—সূর্য্যে পীতবর্ণ ‘মাং’ নামক বীজ ধ্যান করিয়া তাহা হইতে নির্গত রশ্মিসমূহের দ্বারা আকাশে আকর্ষণ করিয়া তাহার উপরে গৌরবর্ণা ত্রিমুখী ত্রিনেত্রা ভগবতীকে স্থাপন করিতে হয়।

৩। উড্ডীয়ান মারীচী সাধনা।—যগ্মুখী, দ্বাদশ ভুজা, অশোকচৈত্যালঙ্কতা, পীতবৈরোচন সমন্বিতা ব্যাঘ্রচশ্মবসনা, প্রত্যালীরস্থিতা লম্বোদরী।

মারীচী সাধনাগুলি পাঠ করিলে বুঝিতে পারা যায় যে প্রধান ধ্যানিবুদ্ধ বৈরোচন মারীচীর গুরু, ‘মাং’ তাহার বীজ। যেমন শারদীয় পূজার সময়ে পঞ্চবর্ণের চূর্ণ দেবীর বস্ত্রাঙ্কনে ব্যবহৃত হয় সেইরূপ পঞ্চবর্ণের চূর্ণ দিয়া বৌদ্ধদেবতাদিগের যন্ত্র আঁকিতে হইত। রক্ত বর্ণের চূর্ণ দিয়া সূর্য্য এবং স্বেত বর্ণের চূর্ণ দিয়া চন্দ্র আঁকিয়া তাহার উপরে মারীচী দেবীর বীজ ‘মাং’ অঙ্করটী

পীতবর্ণের চূর্ণ দিয়া আঁকিতে হয়। এই প্রকার তান্ত্রিক সাধনা নেপালে এখনও বিদ্যমান আছে।

প্রত্যালীড়পদা মারীচী [বি (এফ) ২৩], উচ্চতা ১' ১০", প্রস্থ ১' ৬"। তাঁহার কটিদেশস্থিত কাঞ্চী হইতে বিলম্বিত বসনে দেহের নিম্নার্দ্ধ আবৃত। দেবী ত্রিমুখী এবং ষড়ভুজ। মধ্যবর্তী মুখটি বৃহত্তম এবং বাম দিকের মুখ বরাহাকৃতি। উপরের দক্ষিণ ও বাম হস্ত ভাঙ্গিয়া গিয়াছে। দ্বিতীয় দক্ষিণ হস্তে তীর এবং তৃতীয় দক্ষিণ হস্তে অক্লুশ। দ্বিতীয় বাম হস্তটিতে চাপ (ধনুক) এবং সর্বনিম্ন হস্তে তর্জ্জনীমুদ্রা। মধ্যবর্তী মস্তকের মুকুটে ধ্যানিবুদ্ধ বৈরোচনের মূর্তি বিরাজমান। মূলদেশে মারীচীর রথবাহক শূকরশ্রেণী অঙ্কিত। মধ্যস্থ শূকরটি সম্মুখদিকে ফিরিয়া আছে, বাকী ছয়টির মধ্যে তিনটি দক্ষিণ ও তিনটি বামদিকে ধাবমান। মধ্যবর্তী শূকরে আকৃষ্ট স্থূলমূর্তিটি নিশ্চয়ই রথের সারথি। রথের অন্ত কোন চিহ্ন নাই। মূলদেশের দক্ষিণ প্রান্তে নতজানু পুরুষ ও স্ত্রীমূর্তি সম্ভবতঃ মূর্তি প্রতিষ্ঠাতা এবং তাঁহার পত্নী। মূলের অবশিষ্টাংশে একটি লিপি খোদিত ছিল, সেটি এক্ষণে লুপ্ত হইয়াছে। এই মূর্তিটির সহিত আর তিনটি মারীচীমূর্তি তুলনীয়। ইহাদিগের একটি লক্ষ্মী মিউজিয়মে এবং বাকী দুইটি কলিকাতা মিউজিয়মে রক্ষিত আছে। সারনাথের

মারীচীচী বড়ভুজা, অশ্বকয়চী অষ্টভুজা। অশ্ব, মূর্তি-
কয়চীতে মধ্যস্থ শূকরের উপরে অথবা নিম্নে একটি রাহুর
মস্তক অঙ্কিত আছে এবং প্রধান মূর্তির চতুর্দিকে চারিচী
ক্ষুদ্র মারীচী মূর্তি বিরাজিত ; কিন্তু সারনাথের মূর্তিতে
এসকল চিত্র নাই।

প্রস্তরে খোদিত বুদ্ধদেবের জীবনের নানা ঘটনার
চিত্র দক্ষিণকক্ষে প্রদর্শিত হইয়াছে। সি (এ) ২ এবং
সি (এ) ৩ সংখ্যক দুইখানি প্রস্তর ফলকে (stele)
চিত্রিত ঘটনা উল্লেখযোগ্য। রৌদ্ধদিগের মতে গোতম
বুদ্ধের জীবনে প্রধান আলৌকিক ঘটনা আটটি। তন্মধ্যে
চারিচী ঘটনা এই :—(১) কপিলাবস্ত্র নগরে জন্ম ; (২)
বুদ্ধগয়া বা মহাবোধিতে সম্যক্ সম্বোধি বা সিক্তিলাভ ;
(৩) সারনাথে ধর্মচক্র প্রবর্তন বা প্রথম ধর্মপ্রচার ;
(৪) কুশীনগরে মহাপরিনির্বাণ বা দেহত্যাগ। অপরূপ
ঘটনাবলীর মধ্যে এই কয়েকটি চিত্রিত হইয়াছে :—(১)
রাজগৃহে বুদ্ধের শত্রু এবং খল্লভাত্ত পুত্র দেবদত্ত কর্তৃক
বুদ্ধকে হত্যা করিবার জন্য প্রেরিত নালগিরি বা বত্ৰপাল
নামক উদাত্ত হস্তীর বশীকরণ ; (২) বৈশালী নগরে
মকটহুদতীরে অথবা কোশালী নগরের উপকণ্ঠবর্তী
পারিলেয়ক বনে একটি বানর কর্তৃক বুদ্ধদেবকে মধু
প্রদান ; (৩) প্রাবস্তীতে সংঘটিত আলৌকিক কীর্তি

অষ্ট মহাহানের চিত্র।

মহাপ্রাজ্ঞাহার্য বা 'Great miracle'; (৪) সাক্ষাৎ দেবাবতরণ অথবা ত্রয়স্রিংশ স্বর্গ হইতে ব্রহ্মা ও ইন্দ্র সমভিব্যাহারে অবতরণ; (৫) 'মহাভিনিক্রমণ' বা বোধি-লাভের নিমিত্ত কপিলবস্ত্র ত্যাগ। এই ঘটনাবলীর মধ্যে সাধারণতঃ আটটি শিল্পে একযোগে প্রদর্শিত হইয়া থাকে।

কথিত আছে যে ভাবীবুদ্ধ যখন তুষিত স্বর্গে বসিয়া স্থির করিলেন যে তিনি নরলোকের উদ্ধারের জন্য জন্ম গ্রহণ করিবেন তখন কপিলবস্ত্রের রাজা শুদ্ধোদনের পত্নী মায়াদেবী স্বপ্ন দেখিলেন যে একটি শ্বেতহস্তী তাঁহার গর্ভে প্রবেশ করিতেছে। সারনাথের খোদিত চিত্রে [সি (এ) ২] এই ঘটনা অঙ্কিত হইয়াছে; মায়াদেবী শয়ন করিয়া আছেন এবং তাঁহার সন্নিহিতে একটি হস্তী প্রদর্শিত হইয়াছে। এই স্বপ্নচিত্রের পার্শ্ববর্তী আর একটি চিত্রে শালবৃক্ষ অললম্বন করিয়া মায়াদেবীকে দণ্ডায়মান দেখা যায়। তাঁহার বামপার্শ্বে আর একটি দণ্ডায়মানা স্ত্রীমূর্তি। ইনি মায়াদেবীর ভগ্নী প্রজাপতি। তাঁহার দক্ষিণপার্শ্বে একজন পুরুষ একটি শিশুকে ধারণ করিতেছেন। কথিত আছে মায়াদেবী গর্ভাবস্থায় পিত্রালয়ে গমন করিতে ছিলেন, পথিমধ্যে লুপ্তিগ্রী গ্রামের উপবনে তাঁহার প্রসব বেদনা উপস্থিত হইলে তিনি এক শালবৃক্ষের তলে দাঁড়া-

ইয়া ছিলেন। সেই সময় গৌতম তাঁহার দক্ষিণ কুক্ষি ভেদ করিয়া অবতীর্ণ হইয়াছিলেন। এই সদ্যোজাত শিশুকে ব্রহ্মা বা ইন্দ্র হস্তে ধারণ করিয়াছিলেন। বুদ্ধের জন্মচিত্রে, শালবৃক্ষতলে মায়াদেবী, নবজাত বুদ্ধ এবং তৎসহ ইন্দ্র বা ব্রহ্মার মূর্তি প্রায়শঃ দেখিতে পাওয়া যায়। সি (এ) ২ সংখ্যক ফলকে মায়াদেবীর স্বপ্ন ও বুদ্ধের জন্মচিত্রের মধ্যে আর একটি চিত্র অঙ্কিত আছে। ইহা বুদ্ধদেবের জন্মের অব্যবহিত পরে প্রথম স্নানের চিত্র। একটী পদ্মের উপর শিশু বুদ্ধ দাঁড়াইয়া আছেন এবং তাঁহার দুই পার্শ্বে কৃতাজ্জলিবন্ধ দুইটী দণ্ডায়মান নাগের মূর্তি। কথিত আছে লুম্বিনী গ্রামের উপবনে নাগরাজ নন্দ ও উপনন্দ কর্তৃক রক্ষিত দুইটী প্রস্তরবনের জলে গৌতম প্রথম স্নান করিয়াছিলেন। গৌতমের জন্মসংক্রান্ত উল্লিখিত তিনটী ঘটনা এই ফলকের সর্ব্বনিম্নতম অংশে প্রদর্শিত হইয়াছে। এই ফলকের মধ্যবর্ত্তী অংশে তাঁহার গৃহত্যাগ হইতে আরম্ভ করিয়া মধু ও পায়স গ্রহণ পর্য্যন্ত সমস্ত কাহিনী উৎকীর্ণ আছে। মধ্যের অংশের বাম পার্শ্বে গৌতমের মহাভিনিক্ষমণ চিত্রিত হইয়াছে। গৌতমের অশ্বপাল ছন্দক প্রভুর রাজোচিত আভরণাদি গ্রহণ করিতেছেন। ইহার একপার্শ্বে গৌতমের স্বহস্তে কেশ কর্ত্তনের চিত্র উৎকীর্ণ হইয়াছে। কথিত আছে যে গৌতম নিজ চূড়া কর্ত্তন করিলে ইন্দ্র সেই কর্ত্তিত

কেশ স্বর্গে লইয়া গিয়া পূজা করেন। এই অংশের বাম-পার্শ্বে নাগরাজ কালিকের চিত্র বিদ্যমান আছে। এই অংশের দক্ষিণপার্শ্বে গৌতম একটি পদ্মের উপরে ধ্যানস্থ এবং তাহার সম্মুখে গ্রামণী ছুহিতা সূজাতা পায়সপাত্র হস্তে উপবিষ্ট। কথিত আছে ছয় বৎসর চুক্রচর্য্যার পর সিদ্ধার্থ সেই পথ পরিত্যাগ করিয়া সূজাতার প্রদত্ত মধু-পায়স গ্রহণ করিয়াছিলেন। চূড়া কর্ত্তন চিত্রের উপরিভাগে এই পায়স গ্রহণ চিত্র খোদিত আছে। কলকের উপরের অংশ ভাঙ্গিয়া গিয়াছে। উহা দুই ভাগে বিভক্ত। বামে ভূমিস্পর্শ মূর্ত্তায় অবস্থিত সিদ্ধার্থের বোধি বা সিদ্ধি লাভের চিত্র। বুদ্ধের জীবন-চরিত পাঠে অবগত হওয়া যায় যে তপস্যায় ক্লশকায় হইয়া গৌতম যখন বুঝিলেন যে এই ভাবে সম্বোধি লাভ করিতে পারিবেন না তখন তিনি ক্রমশঃ উরুবেলার দিকে অগ্রসর হইতে লাগিলেন। উরুবেলা বা উরুবিল্ব গ্রামে গৌতম যখন অশ্রু বৃক্ষতলে ধ্যান নিমগ্ন হইলেন তখন মার বুঝিতে পারিল যে গৌতম এইবার সম্বোধি লাভ করিবেন এবং সম্বোধি লাভ করিয়া তিনি লোকের দুঃখ বিমোচন করিবেন। তাহা হইলে জগতে মারের রাজ্য লুপ্ত হইবে। মার তখন নিজের সৈন্য সামন্ত লইয়া সিদ্ধার্থের ধ্যান ভঙ্গ করিতে চলিল, কিন্তু তাহার সকল চেষ্টা ব্যর্থ হইল। এই কলকের উদ্ধদিকে, বাম

প্রান্তে, ধনুক হস্তে দণ্ডায়মান পুরুষটী সন্তুষ্টঃ মারের মূর্তি। মারকে বিকল মনোরথ হইয়া গৃহে ফিরিতে দেখিয়া তাঁহার তিন কন্যা সিদ্ধার্থের ধ্যান ভঙ্গ করিতে চলিল। গোঁতমের মনে কামোদ্দীপনের সকল চেষ্টাই বিফল হইল। বুদ্ধের বাম দিকে দণ্ডায়মানা স্ত্রী মূর্তিটী মারের তিন কন্যার মধ্যে অগ্ৰতম। মারের কন্যারা বিকলমনোরথ হইয়া চলিয়া গেলে মার বুদ্ধকে জিজ্ঞাসা করিল, আপনি যে বোধি লাভের উপযোগী পুণ্য অজ্জম করিয়াছেন তাহার সাফলী কে ? বুদ্ধ তখন দক্ষিণ কষে ভূমি স্পর্শ করিয়া পৃথ্বীদেবীকে ডাকিলেন। পৃথ্বীদেবী গোঁতমের বাক্যের সমর্থন করিলেন। মূর্তির পাদপীঠের মধ্যস্থলে পাত্রহস্তে অঙ্কিত স্ত্রীমূর্তিটী পৃথিবীর মূর্তি।

এই অংশের অপর পার্শ্বে গোঁতম বুদ্ধের প্রথম ধর্ম প্রবর্তন সূচিত হইতেছে। গোঁতম উরুবিল্ব বা বুদ্ধগয়া হইতে বারাণসী যাত্রা করিয়া নগরের উপকণ্ঠে মুগদাবে তাঁহার পাঁচজন শিষ্যের নিকট ধর্মপ্রচার করিয়াছিলেন। গৃহত্যাগ করিলে তাঁহার পিতা শুদ্ধোদন শাক্য-বংশীয় পাঁচজন যুবাকে গোঁতমের সহচর হইবার জন্য পাঠাইয়া দেন। কিন্তু গোঁতমের দীর্ঘ তপস্যার অবস্থানে ইহারা তাঁহাকে পরিত্যাগ করিয়া কাশীতে চলিয়া আসেন।

গোতম বুদ্ধের লাভ করিয়া কাশীতে প্রথমে এই পাঁচজনের নিকট ধর্ম প্রচার করিয়াছিলেন। এই সূত্রের নাম “ধর্মচক্র প্রবর্তন”। বর্তমান চিত্রে আসনে উপবিষ্ট বুদ্ধের হস্তদ্বয় ধর্মচক্রমুদ্রায় বন্ধের সন্নিকটে বিস্তৃত রাখিয়াছে। শিষ্যপঞ্চকের মধ্যে দুইজন বিদ্যমান আছেন। মূর্তির পাদপীঠের চক্র চিহ্নটী ধর্মচক্র নামে সুপরিচিত। চক্রের উভয় পার্শ্বে উপবিষ্ট যুগদ্বয় যুগদাবের অস্তিত্ব সূচিত করিতেছে। এই ফলকের উপরের অংশ ভাজিয়া গিয়াছে, তবে সি (এ) ৩ সংখ্যক ফলকে (চিত্র ১০) আটটি ঘটনার চিত্রই সম্পূর্ণ আছে। জন্ম, সম্বোধি ও ধর্মচক্র প্রবর্তনের কথা পূর্বেই বলা হইয়াছে। এই ফলক খানিতে বানর কর্তৃক মধু প্রদান, মহাপ্রাতীহার্য্য, দেবাবতরণ, নালগিরি দমন ও মহাপরিনির্বাণের চিত্র দেখিতে পাওয়া যায়। ইহা চারিটি অংশে বিভক্ত এবং প্রত্যেক অংশে দুইটি করিয়া চিত্র আছে। নিম্নের অংশে জন্ম ও সম্বোধির চিত্র। ইহার উপরের অংশে বানর কর্তৃক মধু প্রদান ও নালগিরির চিত্র। জন্মচিত্রের উপরে বানর কর্তৃক মধু প্রদানের চিত্রটী অঙ্কিত আছে। কথিত আছে যে বৈশালী নগরের মর্কট হ্রদতীরে বুদ্ধদেবকে একটি বানর মধুপূর্ণ একটি পাত্র প্রদান করিয়াছিল। বুদ্ধদেব বানরের নিকট হইতে মধুপাত্র গ্রহণ করায় বানরটী

আনন্দে নৃত্য করিতে করিতে একটা কূপে লক্ষ প্রদান করিয়া প্রাণত্যাগ করে। মধু প্রদানের পুণ্যে এই বানর স্বর্গে দেবরূপে জন্ম গ্রহণ করিয়াছিল।

বুদ্ধের খুল্লতাতে পুত্র দেবদত্ত বুদ্ধের প্রধান প্রতিদ্বন্দী ছিলেন। তিনি হিংসাপরবশ হইয়া দুই তিনবার বুদ্ধকে হত্যা করিবার চেষ্টা করেন। বুদ্ধ একদিন রাজগৃহের একটা সঙ্কীর্ণপথ দিয়া যাইতেছিলেন, এমন সময়ে দেবদত্ত একটা মত্ত হস্তীকে সেই সঙ্কীর্ণ পথে ছাড়িয়া দিয়াছিলেন। এই হস্তীটির নাম নালগিরি বা রত্নপাল। নালগিরি উন্মত্ত হইলেও বুদ্ধকে আক্রমণ না করিয়া তাঁহার সম্মুখে অবনত হইয়াছিল। এই ঘটনার নাম নালগিরি দমন। মধ্যস্থলে বুদ্ধদেব, তাঁহার দক্ষিণপার্শ্বে উপবিষ্ট হস্তী এবং বামপার্শ্বে দেবদত্ত দাঁড়াইয়া আছেন।

তৃতীয় অংশে দেবাবতরণ ও মহাপ্রাণীহার্যের চিত্র। বুদ্ধের মাতা মায়াদেবী পুত্রের জন্মের সপ্তাহ পরে স্বর্গ গমন করিয়াছিলেন বলিয়া বুদ্ধদেব ত্রয়স্ত্রিংশ দেবগণের স্বর্গে গমন করিয়া তিনমাস কাল মাতার নিকট অভিধর্ম ব্যাখ্যা করেন। কথিত আছে বুদ্ধ যখন ত্রয়স্ত্রিংশগণের স্বর্গ হইতে অবতরণ করেন তখন স্বর্গ হইতে পৃথিবী পর্য্যন্ত সহসা তিনটা সোপান আবিভূত হয়। মধ্যের সোপানটা স্ফটিক নির্মিত; ভগবান বুদ্ধ এতদ্বারা

অবতরণ করেন। দক্ষিণের সোপানটী সুবর্ণ নির্মিত ; ব্রহ্মা বুদ্ধকে চামর ব্যঞ্জন করিতে করিতে এই সোপান পথে অবতরণ করেন। বামের সোপানটী রজত নির্মিত ; দেবরাজ ইন্দ্র বুদ্ধের মস্তকে ছত্র ধারণ করিয়া এই পথে আসেন। এই ঘটনার নাম দেবাবতরণ। বৌদ্ধ মতে সাঙ্ক্য নগরে ইন্দ্র ও ব্রহ্মা সমভিব্যাহারে বুদ্ধ-দেব ভূতলে অবতরণ করিয়াছিলেন। এই অংশের অপর চিত্রটী ‘মহাপ্রাণীহার্যের’ চিত্র। কথিত আছে ভগবান বুদ্ধ যখন রাজগৃহে করগুব্ধবনে অবস্থান করিতেছিলেন তখন পুরণ কাশ্যপ, মন্সরী গৌশালীপুত্র, সঞ্জয়ী বৈরটীপুত্র, অজিতকেশকম্বল, ককুদ কাত্যায়ন এবং নিগ্রহ জ্ঞাতিপুত্র প্রভৃতি বুদ্ধের প্রতিদ্বন্দ্বিগণ ঈর্ষাপরবশ হইয়া বুদ্ধকে অলৌকিক ঘটনা প্রদর্শন করিতে আহ্বান করিয়াছিলেন। মগধের রাজা শ্রেণিক বিশ্বিসার এই ব্যপারে মধ্যস্থ হইতে স্বীকৃত না হওয়ায় এই ছয়জন আচার্য্য কোশলদেশে গমন করিয়া রাজা প্রসেনজিতকে মধ্যস্থ হইতে অনুরোধ করেন। প্রসেনজিত স্বীকৃত হইলে বুদ্ধ কোশলদেশের রাজধানী প্রাবস্তী নগরে গিয়া প্রাণীহার্য বা অলৌকিক সৃষ্টি দেখাইয়া এই ছয়জন বিরুদ্ধবাদী আচার্য্যকে পরাস্ত করেন। একাধারে জল ও অগ্নি থাকিতে পারে ইহা প্রমাণ করিবার জন্য বুদ্ধ নিজের স্বক হইতে অগ্নি ও পদ হইতে জল বাহির করিয়াছিলেন,

এবং একই সময়ে তিনি সর্বত্র সকল দিকে বিরাজমান ইহা দেখাইবার জন্য বহু বুদ্ধ সৃষ্টি করিয়া একই সময়ে চারিদিকে প্রকটিত হইয়াছিলেন। এই ফলক খানিতে তিনজন বুদ্ধ তিনদিকে তিনটা পদ্মের উপরে বসিয়া আছেন দেখিতে পাওয়া যায়। সি (এ) ৬ সংখ্যক ফলকখানি এই ঘটনার চিত্র। এই ঘটনার নাম মহাপ্রাণীহার্য্য এবং ইহার বিস্তৃত বিবরণ দিব্যাবদান গ্রন্থে প্রাণীহার্য্য সূত্র নামক দ্বাদশাবদানে লিপিবদ্ধ আছে।^১

মল্লগণের রাজধানী পাবা নগরে এক গৃহস্থের গৃহে শাকভোজনের ফলে বুদ্ধদেব অশীতি বৎসর বয়সে আমাশয় রোগে আক্রান্ত হন। সেই অবস্থায় তিনি কুশী নগরের মল্লদিগের অপর রাজ্যে প্রবেশ করেন। এই কুশী নগরের প্রান্তে দুইটা শালবৃক্ষের মধ্যে তাঁহার মৃত্যু হয়। বৃক্ষের শেষ শিষ্য স্তম্ভ তখন ধ্যানে মগ্ন ছিলেন। অচ্যুত শিষ্যগণ শোকবিহ্বল হইয়াছিলেন। দুইটা বৃক্ষের মধ্যস্থলে শয়ান বুদ্ধদেবের মূর্তি দেখিলেই বুঝিতে হইবে যে ইহা বুদ্ধের মৃত্যু বা মহাপরিনির্বাণের চিত্র।

১। *Divyanadana* edited by E. B. Cowell & R. A. Neil, Cambridge, 1886, pp. 143-66. Monsieur A. Foucher মহাপ্রাণীহার্য্য বা শ্রাবস্তীর এই আশ্চর্য ঘটনার বিবরণের অর্থ সর্বপ্রথমে প্রকাশ করিয়াছিলেন। *Journal Asiatique, deuxieme serie, Tome XIII*, pp. 1-77, pl. 1-7. ফ্রেন্সেইয়ের *Beginnings of Buddhist Art* গ্রন্থে (pp. 147-84 and plates) মহাপ্রাণীহার্য্যের বিশদ বর্ণনা আছে।

ক্ষান্তিবাদী জাতক।

বাহিরের বারান্দায় প্রদর্শিত ডি (ডি) ১ সংখ্যক সর্দলটী (দৈর্ঘ্যে ১৬') গুপ্ত সময়ের নিদর্শন। ইহার সম্মুখভাগ ছয়টি অংশে (panel) বিভক্ত। দুই প্রান্তের দুই অংশে বৌদ্ধ বৈশ্রবণের মূর্তি অঙ্কিত। বাকী চারিটি অংশে 'জাতক' বা বুদ্ধদেবের এক অতীত জন্মের বৃত্তান্ত বিবৃত আছে। মধ্যস্থ দুইটি অংশে নর্তকীদের নৃত্যগীত দেখান হইয়াছে। ইহার দক্ষিণে নর্তকীরা এক সাধুকে ঘিরিয়া আছে এবং বামে ঘাতক সাধুর দক্ষিণে বাছ ছেদন করিতেছে। এখানে চিত্রিত জাতকের নাম 'ক্ষান্তিবাদী' জাতক। এই জাতকে কথিত হইয়াছে একদা বোধিসত্ত্ব কুণ্ডককুমার নামক ব্রাহ্মণপুত্র রূপে জন্মগ্রহণ করেন। অধ্যয়ন শেষ করিয়া গার্হস্থ্যজীবনে প্রবেশ করিবার অনতিকাল পরেই তাঁহার পিতামাতার মৃত্যু হয়। নশ্বর দেহের কথা ভাবিয়া তিনি ঐশ্বর্য্যে বিতৃষ্ণ হইলেন এবং সম্পাত্রে সমস্ত ধন বিতরণ করিয়া হিমালয়ে গিয়া তপস্শ্রায় নিমগ্ন হইলেন। দীর্ঘকাল তপঃসাধন করিয়া পুনরায় লোকালয়ে ফিরিলেন এবং বারাণসী নগরে আসিয়া রাজার উদ্যানে বাস করিতে লাগিলেন। একদিন কাশীরাজ কলাবু মদমত্ত অবস্থায় নর্তকীদল পরিবেষ্টিত হইয়া এই উদ্যানে প্রবেশ করিলেন এবং তাহাদের নৃত্যগীতে বিমুগ্ধ হইয়া অচিরে গভীর নিদ্রায় মগ্ন হইলেন। তখন নর্তকীরা রাজাকে ছাড়িয়া ইতস্ততঃ বিচরণ করিতে

করিতে বোধিসত্ত্বের নিকট আসিয়া উপস্থিত হইল এবং তাঁহাকে প্রণাম করিয়া ধর্মকথা শুনিবার বাসনা জানাইল। বোধিসত্ত্ব তাহাদিগের আগ্রহ দেখিয়া উপদেশ দিতে আরম্ভ করিলেন।

এদিকে নিম্নাভঙ্গের পর রাজা নর্তকীদের অনুপস্থিতির কারণ শুনিয়া রোষভরে বোধিসত্ত্বের নিকট আগমন করিলেন এবং তাঁহাকে কপট সন্ন্যাসী ভাবিয়া জিজ্ঞাসা করিলেন, “তুমি কি ধর্ম প্রচার করিতেছ?” বোধিসত্ত্ব বলিলেন, “আমি তিতিক্ষা ধর্ম প্রচার করিতেছি।” “তোমার তিতিক্ষা আমি পরীক্ষা করিব” বলিয়া রাজা ঘাতককে বেত্রাঘাতে বোধিসত্ত্বের সর্বদ্বন্দ্ব জর্জরিত করিতে আদেশ দিলেন। আদেশ পালিত হইলে রাজা পুনরায় তাঁহাকে জিজ্ঞাসা করিলেন, “তুমি কোন ধর্ম প্রচার কর?” বোধিসত্ত্ব অটলভাবে উত্তর দিলেন, “মহারাজ, আমি তিতিক্ষা ধর্ম প্রচার করি।” উত্তর শুনিয়া রাজা ঘাতককে আদেশ দিলেন, “এই ভণ্ড সাধুর হস্তপদ ছেদন করিয়া দাও।” তখনও রাজার প্রশ্নোত্তরে বোধিসত্ত্ব তিতিক্ষা ধর্মের মহিমা ঘোষণা করিলেন। অতঃপর রাজাজ্ঞায় তাঁহার নাসিকা ও কর্ণ ছেদন করিয়া দেওয়া হইল। রক্তধারায় প্লাবিত হইয়া বোধিসত্ত্ব পুনরায় তিতিক্ষার জয় গাহিলেন। রাজা চলিয়া

সিন্ধুদেশে মহেঞ্জোডারোতে প্রাচীনতর যুগের (অনুমান খৃঃ পূঃ ৩০০০) শিল্প নিদর্শন আবিষ্কৃত হইয়াছে। ফাগুদন সাহেব অনুমান করেন মৌর্য্যদিগের পূর্বে ভারতীয় স্থাপত্যে প্রস্তরের পরিবর্তে কাষ্ঠ অধিকতর পরিমাণে ব্যবহৃত হইত এবং এই নিমিত্তই তাহার কোন ধ্বংসাবশেষ পাওয়া যায় নাই। আর্য্যগণ কাষ্ঠের উপর নানা প্রকার কারুকার্য্য করিতেন। উপরোক্ত আবিষ্কারের ফলে এখন দেখা যাইতেছে যে এইরূপ অনুমান করিবার কোন কারণ নাই। অবশ্য মৌর্য্যযুগের পূর্বে ভারতীয় স্থাপত্যে বহুল পরিমাণে কাষ্ঠ ব্যবহৃত হইত বলিয়া মনে হয়। কারণ দারু স্থাপত্যের প্রভাব শুঙ্গ রাজত্বকাল পর্য্যন্ত প্রস্তরস্থাপত্যে সংক্রামিত দেখা যায়। কিন্তু কাষ্ঠই যে তখন নির্মাণের প্রধান উপাদান ছিল এমন মনে করিবার কারণ নাই। ইষ্টক নির্মিত গৃহাদির বহু ধ্বংসাবশেষ হরপ্পায় ও মহেঞ্জোডারোতে আবিষ্কৃত হওয়ায় এই সন্দেহ উপস্থিত হইয়াছে।

সারনাথের স্থাপত্যের ইতিহাস মৌর্য্যযুগ হইতে আরম্ভ করিতে হয়। অশোকের অনুশাসনযুক্ত একটী

মৌর্য্য শিল্প)

-
- (১) *Cambridge History of India*, প্রথম খণ্ডে সার জন মার্শেদের প্রবন্ধ দ্রষ্টব্য। ইহাতে প্রাচীন ভারত শিল্প সম্বন্ধে বহু জ্ঞাতব্য তথ্য সন্নিবেশিত হইয়াছে। এই প্রবন্ধ অবলম্বনে মৌর্য্য শিল্পের বিবরণ লিখিত হইয়াছে।

স্তম্ভ এবং সম্ভবতঃ তৎকালে নির্মিত একটী প্রস্তর-বেদিকা (railing) তদানীন্তন শিল্পের সাক্ষ্য প্রদান করিতেছে। ১৯১৫ সালের খনন কার্যে আবিষ্কৃত কতকগুলি প্রস্তরমুণ্ডেও বজ্রলেপ লক্ষিত হয়। কারুকার্য হিসাবে এই মুণ্ডগুলি কলিকাতা মিউজিয়মে পাটনা হইতে আনীত দুইটী বক্ষমূর্তি অপেক্ষা উৎকৃষ্ট বলিয়া কথিত হইতে পারে। এই প্রকার মসৃণ ও চাকচিক্যময় বজ্রলেপ (polish) এই যুগের শিল্প নিদর্শনের একটী প্রধান বিশেষত্ব। পরবর্তী যুগের শিল্পে ঠিক এই প্রকারের বজ্রলেপ দেখিতে পাওয়া যায় না। এই বজ্রলেপ উক্ত স্তম্ভে ও বেদিকায় বিদ্যমান রহিয়াছে।

অশোক স্তম্ভটী ভারতীয় শিল্প ইতিহাসে বিশিষ্ট স্থান পাইবার যোগ্য। এইরূপ স্তম্ভ আরও অসংখ্য আবিষ্কৃত হইয়াছে এবং জনসাধারণ কর্তৃক লাট নামে আখ্যাত। এই স্তম্ভগুলি বৃহদাকার এক একটী অখণ্ড (monolithic) প্রস্তর হইতে খোদিত হইয়াছে। এই স্তম্ভগুলি মূল হইতে শীর্ষদেশ পর্য্যন্ত গোলাকারে উঠিয়া শেষের দিকে ক্রমশঃ সরু ভাব ধারণ করিয়াছে। স্তম্ভের শীর্ষভাগের মূল ঘণ্টাকার (bell-shaped)। ঘণ্টাকৃতি মূলের গ্রীবাদেশে (abacus) নানা প্রকার জীব জন্তুর

মূর্তি খোদিত আছে। পাদমূল (base) হইতে শীর্ষদেশ (summit) পর্যন্ত এই স্তম্ভগুলির উচ্চতা ৪০ হইতে ৫০ ফিট। লোরিয়নন্দন গড়ে অবস্থিত স্তম্ভশীর্ষে একটা সিংহমূর্তি এবং উহার গ্রীবাদেশে (abacus) সুশোভন হংসশ্রেণী অঙ্কিত রহিয়াছে। অপর স্তম্ভগুলির চুড়ায় হস্তী কিম্বা বুঘের মূর্তি আছে। সাঁচীর ও সারনাথের স্তম্ভশীর্ষে একটা সিংহের পরিবর্তে চারিটা সিংহমূর্তি পরস্পরের পৃষ্ঠ সংলগ্ন আছে। গ্রীবাদেশ (abacus) মাঝে মাঝে তরুলতা (honey-suckle) অথবা চক্র বা জস্ত সমূহে পরিশোভিত। স্তম্ভগুলির গায়ে কোনও কারুকার্য নাই, কেবল এক প্রকার মসৃণ বজ্রলেপে মণ্ডিত; কিন্তু তাহাতেই ইহাদের সৌন্দর্য্য ফুটিয়া উঠিয়াছে। সারনাথের স্তম্ভশীর্ষ দেখিয়া স্থির প্রতীতি জন্মে যে মৌর্য্যযুগে ভারতীয় শিল্প অতি উচ্চস্তরে উপনীত হইয়াছিল। এই ভাস্কর্য্য কল্পনায় শিল্পীর কংশাশুক্রমে লব্ধ সৃষ্টিকৌশল জাজ্বল্যমান রহিয়াছে। বহুযুগব্যাপী সাধনা ভিন্ন এরূপ ভাস্কর্য্যের বিকাশ সম্ভব নহে। শীর্ষস্থ সিংহগুলির অসামান্য তেজোদৃশ্তী তাহাদের স্বীকৃত শিরানিচয়ে ও মাংশপেশীর নতোন্নত আকারে অভিযুক্ত রহিয়াছে। অন্যান্য মূর্তিসমূহেও এইরূপ জীবন্ত ভাব পরিলক্ষিত হয়। শিল্পের প্রাথমিক

অবস্থার আড়ম্বল্যের লেশ মাত্র ইহাতে নাই। জন্তুগুলির গড়ন একরূপ স্বাভাবিক হইয়াছে যেন জীবন্ত বলিয়াই মনে হয়। তাহাদের সজীব ভাব ফুটাইয়া তুলিতে ভাস্করের যে বিশেষ আগ্রহ ও যত্ন ছিল তাহাতে সন্দেহ নাই। পরন্তু চারিটি সিংহ মূর্তিতে ভাস্কর জ্ঞাতসারে ও ইচ্ছাপূর্ব্বকই স্থাপত্যের সহিত সামঞ্জস্য রাখিয়া এমন একটা ভাব ফুটাইয়া তুলিয়াছেন যে এই মূর্তিগুলি স্তম্ভের সকল অংশের সহিত বেশ সূক্ষ্মত হইয়াছে (চিত্র ৫)। স্তম্ভের গ্রীবাদেশে (abacus) উৎকীর্ণ অর্থমূর্তি নির্মাণ বিষয়েও ভাস্কর এমন একটা আদর্শ অবলম্বন করিয়াছেন যাহা প্রতীচ্য শিল্পে সুপরিচিত পদ্ধতির অন্তর্গত। স্তম্ভেরা দেখা যাইতেছে যে প্রস্তর গাত্রে খোদিত (relief) মূর্তি নির্মাণ বিষয়েও শিল্পীর সূক্ষ্মতা সমভাবেই প্রকাশ পাইয়াছে।

কোন কোন পণ্ডিত মনে করেন পারস্যীক সাম্রাজ্যের প্রাচীন রাজধানী পার্সিপলিসের ধ্বংসাবশেষের মধ্যে হখিমনীয় (একিমনীয়) নৃপতিগণের আমলের যে সকল স্তম্ভ দেখিতে পাওয়া যায় তাহার সহিত অশোকের স্তম্ভের বিশেষ সাদৃশ্য আছে এবং এই সকল স্তম্ভ নির্মাণ করিবার জন্য অশোক সম্ভবতঃ পারস্যবাসী গ্রীক শিল্পী নিয়োগ করিয়াছিলেন। আবার অনেকে মৌর্য্য শিল্পে

বৈদেশিক প্রভাব স্বীকার করিতে অসম্মত। অশোকের নিকট পারসীক বা গ্রীকগণ বিদেশী ছিলেন না। অশোক ধর্মের দ্বারা পারস্য প্রভৃতি দেশ জয় (ধর্মবিজয়) করিয়াছিলেন। সুতরাং অশোকের পক্ষে পারসীক বা গ্রীক শিল্পী বিনিয়োগ অসম্ভব নহে।

শুঙ্গ শিল্প।

মৌর্য্য শিল্পের অব্যবহিত পরবর্ত্তী শুঙ্গ শিল্পের নিদর্শন সারনাথে দুই চারিটি মাত্র আছে। ছয় নম্বর চিত্রে প্রদর্শিত স্তম্ভশীর্ষটিতে দেখা যায় হস্তী ও অশ্ব লতাপাতার মধ্যে অঙ্গাঙ্গীভাবে বিদ্যমান রহিয়াছে। এই স্তম্ভশীর্ষের একদিকে অশ্বারোহী, অপরদিকে মালত ও একজন আরোহীসহহস্তী। অশ্ব ও হস্তী উভয়েরই গতিশীলতা দেখান হইয়াছে। শুঙ্গযুগের শিল্পকে ভারতের তদানীন্তন জাতীয় শিল্প বলা যাইতে পারে। ভারত, বুদ্ধগয়া এবং সাঁচীর দ্বিতীয় স্তূপবেদিকা গাত্রে, পাটনায় এবং সারনাথে প্রাপ্ত ভগ্নাবশেষে এই শিল্পের প্রচুর উদাহরণ পাওয়া যায়। সাঁচীর দ্বিতীয় স্তূপের বেদিকার পদ্মগুলি এবং ভারত স্তূপের বেদিকার গাত্রের লতা এই জাতীয় শিল্পের উৎকৃষ্ট উদাহরণ। ভারতীয় ভাস্কর এযুগে অবিকৃতভাবে মনুষ্যমূর্ত্তি অঙ্কনে সিদ্ধহস্ত ছিলেন বলিয়া মনে হয় না। স্তম্ভ গাত্রে খোদিত মূর্ত্তিগুলি দেখিলে ইহার যথার্থ্য উপলব্ধি হয়। মূর্ত্তিগুলিতে কমনীয় ভাব নাই,

যেন প্রস্তর গাত্রে কোন মনুষ্য মূর্তির ছায়া মাত্র পতিত হইয়াছে। এই মূর্তিগুলি প্রত্যক্ষ মানবাকৃতির প্রতি-
 কৃতি নহে। যে ছায়া দর্শকের চিত্রপটে বিদ্যমান থাকিয়া
 যায় (memory picture) এই সকল মূর্তি তাহারই
 অনুরূপ। অঙ্গ প্রত্যঙ্গের মধ্যে সামঞ্জস্য নাই। স্থানে
 স্থানে মূর্তির কোনও কোনও অঙ্গে অতিশয়তা দোষ
 লক্ষিত হয়। তথাপি বহু মূর্তিবিশিষ্ট চিত্র সমূহে
 মূর্তিগুলির অঙ্গ প্রত্যঙ্গ স্বভাবসঙ্গত না হইলেও শিল্পীর
 অভিপ্রেত ভাব বেশ ফুটিয়া উঠিয়াছে। ভারত,
 বুদ্ধগয়া এবং সাঁচীর তোরণ গাত্রে খোদিত চিত্রগুলি
 দেখিলে ইহা সুন্দররূপে প্রতীয়মান হয়। ভারত
 অপেক্ষা বুদ্ধগয়ার শিল্পকলা এবং বুদ্ধগয়া অপেক্ষা সাঁচীর
 প্রথম স্তূপের তোরণের ভাস্কর্য্য উৎকৃষ্টতর। এই যুগে
 ভারতীয় শিল্পে অবাস্তব জীবজন্তু অঙ্কনের বহু উদাহরণ
 পাওয়া যায়। মনুষ্যমূর্তি চিত্রনে শিল্পী সিদ্ধহস্ত না
 হইলেও, তাহার সৌন্দর্য্য জ্ঞানের পরিচয় সর্বত্র বর্তমান।
 ফল ও ফুলগুলি খুব স্বাভাবিক ভাবেই অঙ্কিত হইয়াছে।
 ফল ফুল ও লতাপাতার মধ্যে কাল্পনিক জীব জন্তুর
 সুন্দর সমাবেশ করিয়া সাঁচীর দ্বিতীয় স্তূপের বেদিকার
 গাত্রে যে সৌন্দর্য্য সৃষ্টির চেষ্টা হইয়াছে তাহা সেই
 সময়কার অন্য দেশের শিল্পে দৃষ্টিতে পাওয়া যায় না।
 ইহা ভারতীয় শিল্পীর প্রতিভাজাত। সারনাথে

প্রাপ্ত স্তম্ভশীর্ষের অশ্বের চিত্রের (চিত্র ৬-ক) সহিত অশোক স্তম্ভের অশ্বের তুলনা করিলে বুঝা যায় শুঙ্গ শিল্পের ধারা বিভিন্ন পথে চলিয়াছিল। এই যুগের শিল্প খুব উন্নত হইলেও ইহাতে শুঙ্গশিল্পের লালিত্যের অভাব অনুভূত হয়।

মথুরার প্রাচীন শিল্প।

খৃষ্টপূর্ব দ্বিতীয় শতাব্দীর প্রারম্ভে ভারতের উত্তর-পশ্চিম দ্বারে গান্ধারাদি প্রদেশে ব্যাপ্তিয়া হইতে আগত গ্রীকগণের অধিকার কালে এক নূতন শিল্প পদ্ধতি আবির্ভূত হইয়াছিল। ইহাকে গান্ধার শিল্প পদ্ধতি বলা যাইতে পারে। ইহা তদানীন্তন গ্রীকশিল্পের দ্বারা অনু-প্রাণিত। সারনাথের সহিত এই গান্ধার শিল্পের পরোক্ষ ভাবে সম্বন্ধ বর্তমান আছে। প্রাচ্য ও মধ্য ভারতের শিল্পীরা প্রথমতঃ বুদ্ধদেবের এবং বৌদ্ধ শ্রমণের প্রতিমূর্তি প্রস্তুত করিতেন না। গান্ধারের গ্রীক শিল্পীরা গ্রীক দেবমূর্তির অনুকরণে বুদ্ধমূর্তি নিৰ্ম্মান করিতে আরম্ভ করেন। এই গান্ধার শিল্পের সর্বগ্রাসী শক্তি সমগ্র প্রাচ্য শিল্পে প্রতিফলিত হইয়াছিল। কুষাণদিগের প্রভাবে গান্ধার শিল্প সমধিক উন্নতিলাভ করে। মথুরা প্রভৃতি স্থানে এই সময়ে ভারতের জাতীয় শিল্পের ও গান্ধার শিল্পের মিলনে এক নূতন শিল্পরীতির উৎপত্তি হয়। এই নূতন রচনারীতি মথুরা শিল্পরীতি নামে বিখ্যাত।

সারনাথে কুষাণযুগের সর্বোৎকৃষ্ট শিল্প নিদর্শন
 বিরাট বোধিসত্ত্ব [বি (এ) ১] মূর্তি (চিত্র ৭)। এই
 মূর্তিটি মথুরা অঞ্চল হইতে আনীত। ইহার প্রতিষ্ঠাতা
 ভিক্ষু বল সম্ভবতঃ মথুরাবাসী ছিলেন। তজ্জন্ম বোধ
 হয় এই মূর্তিটি মথুরার পাথরে নির্মিত। খ্রীষ্টীয় প্রথম বা
 দ্বিতীয় শতাব্দীতে মথুরায় যে এক শিল্পীগোষ্ঠীর অভ্যুদয়
 হইয়াছিল, বোধ হয় এই মূর্তিটি তাঁহাদের মধ্যে কাহারও
 দ্বারা নির্মিত। ক্ষত্রপ-কুষাণযুগের ভাস্কর্য্য সাঁচী ও
 ভারতের জাতীয় শিল্পরীতির একটি শাখা মাত্র ;
 কিন্তু মথুরায় সমসাময়িক গান্ধার শিল্পের প্রভাব
 অত্যধিক পরিমাণে দেখিতে পাওয়া যায়। তজ্জন্মই
 সাঁচী, ভারত ও বুদ্ধগয়ার শিল্পে ও ভাস্কর্য্যে যে
 সজীবতা লক্ষিত হয় মথুরার কুষাণযুগের শিল্পে তাহা
 দেখা যায় না। এই সজীবতার অভাবের কারণ কি ?
 ইহার কারণ বৈদেশিক প্রভাবের আতিশয্য। মথুরার
 শিল্পে ভারতের জাতীয় শিল্পের ভারটী বৈদেশিক প্রভাবের
 দ্বারা নষ্ট হইয়াছে। বৈদেশিক প্রভাব এত অধিক যে
 জাতীয় শিল্পরীতি তাহার নিকট পরাজিত হইয়াছে।
 অপরদিকে তৎকালে বৈদেশিক ভাস্কর্য্যের প্রভাব
 এত শক্তিশালী ছিল না যে গান্ধার শিল্পের ন্যায় মথুরা
 শিল্প চিত্তাকর্ষক হইতে পারে। ইহা পাশ্চাত্য শিল্প
 প্রভাব দ্বারা সঞ্জীবিত না হইয়া নিস্তেজ ও প্রভাহীন

হইয়া পড়িয়াছিল। সারনাথের কুষাণ শিল্পের নিৰ্জীব-তার কথা পূর্বের উল্লেখ করা হইয়াছে। বিভিন্ন শিল্প পদ্ধতির অসঙ্গত মিশ্রণের ফলই ইহার কারণ বলিয়া নির্দিষ্ট হইতে পারে। সারনাথে প্রাপ্ত বোধিসত্ত্ব মূর্তি (চিত্র ৭) দেখিয়া বেশা মনে হয় ইহা প্রস্তর মাত্র, ইহাতে প্রাণ নাই। গুপ্তযুগের মূর্তি দেখিলে যেমন প্রাণে সহজে ভক্তি ভাবের উদয় হয়, কুষাণযুগের মূর্তি দেখিলে তেমন হয় না।

গুপ্ত শিল্প।

সারনাথে ধামেক স্তূপটী গুপ্তযুগের একটী মহান স্থাপত্য নিদর্শন (চিত্র ৪)। ইহার আট শত বৎসর পূর্বের ফিনিয়াসের যুগে গ্রীসদেশে এবং এক হাজার বৎসর পরে মাইকেল এঞ্জেলোর যুগে ইটালীতে ভাস্কর্যের বিশেষ উন্নতি ঘটিয়াছিল। গুপ্তযুগে ভারতবাসিগণের চিন্তাশক্তি ও প্রতিভা এরূপ বিকাশ লাভ করিয়াছিল এবং জীবনের বিভিন্ন কক্ষক্ষেত্রে তাহাদের কার্য-কুশলতা এমন উৎকর্ষ লাভ করিয়াছিল যে তেমন এ পর্য্যন্ত আর ঘটে নাই। যে সকল কারণে জাতীয় জীবনের এমন উৎকর্ষ সাধিত হয় সে কারণগুলি আমরা নিশ্চিত-রূপে অবগত নহি। গ্রীস ও ইটালীতে তদনুরূপ উৎকর্ষের কারণগুলিও আমরা বিদিত নহি। অষ্টাশ্চ সভ্য জাতির সহিত মিলন এবং ভাবের আদান প্রদান ইহার কারণ হইতে পারে। সেই সময়ে পারস্যের

সাসানীয় (Sassanid) সাম্রাজ্য এবং চীন ও রোমক সাম্রাজ্যের সহিত ভারতবর্ষের ঘনিষ্ঠ সম্বন্ধ ছিল। বৈদেশিক জাতির আক্রমণ এবং তদ্বারা দেশের উপর যে দুঃখ দুর্দশার স্রোত প্রবাহিত হইয়াছিল তাহা পরোক্ষ ভাবে এই জাতীয় উৎকর্ষের কারণ হইতে পারে। কেননা এতদপূর্বে কুষাণ, পঞ্জাব ও শকজাতীয় রাজা-দিগের অধীনতায় ভারতবর্ষকে বহুদিন পর্য্যন্ত নানা অত্যাচার সহ করিতে হইয়াছিল। কিন্তু কারণ যাহাই হউক, এই জাতীয় জাগরণের ফল বহুদূর পর্য্যন্ত বিস্তৃত হয়। ইহার ফলে রাজনৈতিক ক্ষেত্রে সাম্রাজ্য প্রতিষ্ঠার আকাঙ্ক্ষা অঙ্কুরিত হইয়া উঠে। একরূপ সাম্রাজ্য প্রতিষ্ঠার আকাঙ্ক্ষা শুদ্ধাধিকারের পর লুপ্ত হইয়া গিয়াছিল। এই রাষ্ট্রীয় জাগরণের ফলে শুণ্ড সাম্রাজ্যের প্রতিষ্ঠা। দক্ষিণে নর্মদা সীমান্ত লইয়া প্রায় সমস্ত উত্তর ভারতবর্ষই এই সাম্রাজ্যের অন্তর্ভূত ছিল। এই সাম্রাজ্যের স্থিতিকাল দুই শত বৎসর। এই দীর্ঘকালের পর শ্বেত হুণ জাতীয় আক্রমণকারীর হস্তে এই সাম্রাজ্যের পতনের সূত্রপাত হয়।

ধর্মজীবনে এই জাগরণ ব্রাহ্মণত্বের পুনঃ প্রতিষ্ঠারূপে প্রকাশ পাইয়াছিল। সংস্কৃত সাহিত্য এই সঙ্গে সঙ্গে পুনর্জীবিত হইয়া উঠিয়াছিল। এই সময়েই মহাকাব্য কালিদাস তাঁহার অমর নাটক ও কাব্যগুলি লিখিয়া-

ছিলেন। এই সময়েই পুরাণগুলি সুশৃঙ্খল ভাবে সংকলিত হইয়াছিল। গণিত শাস্ত্র ও জ্যোতির্বিদ্যা পূর্ণতা লাভ করিয়াছিল। এই যুগে রসায়ন বিদ্যার বিশেষ উন্নতি সাধিত হয়।

গুপ্তযুগে ভারতের মনঃশক্তির যে যথার্থই উন্মেষ হইয়াছিল তাহা সে সময়ের বিদ্যা ও চিন্তার নিদর্শন মাত্রেই অনুভব করা যায়। স্থাপত্য, ভাস্কর্য্য ও চিত্র-শিল্পে সর্বত্রই সমভাবে এই নূতন চিন্তাশীলতা অভিব্যক্ত। গুপ্ত স্থাপত্য ও গ্রীসীয় স্থাপত্যের অভিব্যক্তি বস্তুতঃ একইরূপে সংঘটিত হইয়াছিল, তবে গুপ্ত স্থাপত্য অপেক্ষাকৃত অধিকতর লালিত্যময়। সারনাথের ধামেক স্তূপের অলঙ্কার সুসঙ্গত অলঙ্করণের একটি উদাহরণ। ইহার উচ্চতা প্রায় ১১০ ফিট। বৃত্তাকারে যে নক্সাটি ইহাকে বেষ্টিত করিয়া আছে তাহাতে এই স্তূপ-গাত্রের সৌন্দর্য্য সুস্পষ্ট হইয়াছে। ধামেক স্তূপের খোদিত অলঙ্কারের শিল্প প্রণালী যেমন সুপরিণত তেমনি সর্বসঙ্গ সুন্দর (চিত্র ৯)। ইহার অলঙ্কার বিশ্লেষণ করিলে দেখিতে পাওয়া যায় ইহা নানা প্রকার রেখা বিহীন এবং লতা পুষ্প, এই দুই শ্রেণীর শিল্প আভরণে ভূষিত। কিন্তু এই বিভিন্ন আভরণের বৈষম্যের মধ্যে সুন্দর সামঞ্জস্য এবং ঐক্য বিদ্যমান রহিয়াছে। নক্সাগুলি অতি পরিষ্কার

ভাবে খোদিত থাকাতে উহাদিগের সৌন্দর্য্য অধিকতর চিত্তাকর্ষক হইয়াছে।

খৃষ্টীয় চতুর্থ হইতে ষষ্ঠ শতাব্দী পর্য্যন্তই গুপ্ত শিল্পের উন্নতির সময়। গুপ্ত শিল্পে যে একটা ভাবসম্পদ দেখা যায় সেই সময়ের পর হইতে তাহা হ্রাস পাইতে আরম্ভ করে। ভারতীয় শিল্পে অতিরিক্ত অলঙ্করণের প্রবল আকাঙ্ক্ষা ক্রমশঃ আধিপত্য স্থাপন করে। এই অবনতির চিহ্ন খৃষ্টীয় ষষ্ঠ শতাব্দীতে নির্মিত অজন্তার মন্দিরের স্থাপত্যে লক্ষিত হয়। স্তম্ভের শীর্ষদেশ ও ললাট প্রদেশ অলঙ্করণে এই সময়েও সুগভীর চিন্তাশীলতার এবং সুবিবেচনার পরিচয় পাওয়া যায়। কিন্তু এই অলঙ্করণে বাহ্যিক বর্তমান আছে। এই সময় হইতে শিল্পীর চক্ষু অন্তঃসারশূন্য বাহ্য সৌন্দর্য্যের মোহে অন্ধ হইয়াছিল। প্রায় খৃষ্টীয় সপ্তম শতাব্দী হইতে শিল্পে অলঙ্কারের মাত্রা এত বাড়িয়া উঠিল যে তজ্জন্ত অলঙ্কৃত বস্তুর স্বরূপ নির্ধারণ কঠিন হইয়া উঠিল। বস্তুতঃ এই সময়ে স্তম্ভ ও প্রাচীর গাত্র যেন অলঙ্করণেই সার্থকতা লাভ করিয়াছিল। সুতরাং অঙ্গ সমাবেশের সঙ্গতির প্রতি কিছু মাত্র দৃষ্টি না করিয়া শিল্পী যেখানে সেখানে চিত্রাঙ্কন দ্বারা মন্দিরগাত্র পরিশোভিত করিত।

স্থাপত্যের ক্রমোন্নতি, অন্তর্নিহিত চিন্তাশীলতা ও সুসঙ্গতি গুপ্ত স্থাপত্যের বিশেষত্ব। পরবর্ত্তী কালে ইহার

গুপ্তযুগের অধঃপতন
কালীন শিল্প।

গুপ্তসময়ের বৌদ্ধমূর্ত্তি।

অবনতির যে ক্রম নির্দিষ্ট হইয়াছে তাহা বৌদ্ধ ও ব্রাহ্মণ্য মন্দিরাদিতে তুল্যরূপে প্রযোজ্য। কিন্তু এই দুই সম্প্রদায়ের উপাস্ত্র মূর্তিসমূহে একটা বিভিন্নতা লক্ষিত হয়। প্রথমতঃ, বৌদ্ধদিগের মধ্যে দেব মূর্তি নির্মাণের প্রথা উত্তর-পশ্চিম ভারতবর্ষে খ্রীস্টীয় ত্রাবানু-প্রাণিত শিল্পকলার আরম্ভ হয় ; দ্বিতীয়তঃ, এই প্রথা ভারতবর্ষের অন্যান্য স্থানেও ব্যাপ্ত হইয়া পড়ে এবং গান্ধার শিল্পের রীতিপদ্ধতির প্রভাব অন্যান্য শিল্পকলাতে সংক্রামিত হয়। এই সকল কারণে শিল্পের কতকগুলি রীতি একরূপ ভাবে প্রচলিত হইয়া পড়িয়াছিল। যে পরবর্তী কালের শিল্পীরা কোনরূপে তাহা লঙ্ঘন করিতে পারে নাই। ইহার ফল এই দাঁড়াইল যে গুপ্ত সময়ের ভাস্করগণ সাধারণতঃ অলঙ্করণে যে সুরূচি ও স্বাভাবিকতা দেখাইত বৌদ্ধমূর্তি নির্মাণে তাহাদিগের পক্ষে সেই গুণপনা দেখান কষ্টকর হইয়া উঠিয়াছিল। পক্ষান্তরে গুপ্ত সময়ের শিল্পীদের যথেষ্ট উদ্ভাবনী শক্তি ছিল, সুতরাং তাহারা পূর্বযুগের শিল্পীগণের বিধি ব্যবস্থায় সন্তুষ্ট ছিল না। কারণ ঐ সকল মূর্তি মানসিক কিম্বা আধ্যাত্মিক আদর্শ প্রকাশ করিতে সম্পূর্ণ অক্ষম ছিল। মূর্তি নির্মাণ বিষয়ে যে সকল ব্যবস্থা লিপিবদ্ধ হইয়াছে, যে সকল বিভিন্ন মাপ নির্দিষ্ট

হইয়াছে, তাহা বজায় রাখিয়া কিরূপে বুদ্ধদেবের মূর্তিতে শাস্তির ও সমাধির ভাব প্রকাশ করা যাইতে পারে এই সমস্যা শিল্পীর মনে উদ্ভিত হইয়াছিল, এবং শিল্পী সেই সমস্যার সমাধানে কৃতকার্য হইয়াছিল গুপ্ত মূর্তির মুখমণ্ডল জ্ঞানালোকে উদ্ভাসিত। সারনাথে প্রাপ্ত বি (বি) ১৮১ সংখ্যক বুদ্ধ মূর্তিতে (চিত্র ৮-ক) শাস্তি যেন মূর্তিমান হইয়া বিরাজ করিতেছে। এই শাস্তি পার্থিব শাস্তি নহে। সসীম মানব অসীম আত্মার ধ্যানে রত থাকিলে যে মনোমুগ্ধকর শাস্তিছটা সাধকের মুখে প্রকাশ পায় সেই শাস্তি এই বুদ্ধ মূর্তিতে প্রকাশমান দেখিতে পাওয়া যায়। ইহার মধ্যে দয়ার ভাবও মিশ্রিত আছে। যদিও বৌদ্ধধর্ম ঈশ্বরের অস্তিত্ব স্বীকার করে না, তথাপি গুপ্তসময়ে শাক্যসিংহ মানবের পালন ও ত্রাণকর্তার পদে অভিষিক্ত হইয়াছিলেন। এইরূপ কল্পনাপ্রসূত বৌদ্ধমূর্তিতে দয়ার ভাব প্রকাশের চেষ্টা শিল্পীর পক্ষে স্বাভাবিক। বুদ্ধমূর্তিতে শারীরিক সৌন্দর্য্যও বিরাজমান। মুখমণ্ডলের রেখা, স্নানকোমল হাত ও অঙ্গুলিগুলির গঠন স্বাভাবিক ও সুন্দর। ভাস্কর মূর্তিটিতে শাস্ত্রীয় রীতি বজায় রাখিয়া এই সৌন্দর্য্য ফুটাইতে সমর্থ হইয়াছেন।

গুপ্তযুগের বৌদ্ধমূর্তিতে যে সকল বিশেষত্বের কথা উপরে উল্লেখ করা হইয়াছে তাহা সেই সময়কার

মধ্যযুগের শিল্প।

হিন্দুদেবমূর্তিতেও দেখা যায়। হিন্দুভাব ও বৌদ্ধভাব সেই সময়ে একই দার্শনিক তত্ত্বে অনুসৃত ছিল। গুপ্ত সময়ের হিন্দুমূর্তিগুলি বড়ই মনোহর ও চিত্তাকর্ষক। কিন্তু গুপ্তযুগের অবসানে বৌদ্ধ ও হিন্দুমূর্তি শিল্পে কেমন একটা নূতন ভাবের আবির্ভাব হইয়াছে দেখিতে পাওয়া যায়। সারনাথে প্রাপ্ত বি (এচ) ১ সংখ্যক শিবমূর্তিতে (চিত্র ৮-খ) ক্রোধাদি ভাবনিচয় প্রকাশের অধিকতর চেষ্টা হইয়াছে তাহা বেশ দৃষ্ট হয়। আশা ও শঙ্কা, জীবন ও মরণ, ভালবাসা ও ঘৃণা এই সকল ভাবের ঘাত প্রতিঘাত মধ্যযুগের হিন্দুমূর্তিগুলিতে উদ্ভাসিত হইয়া উঠিয়াছে। মধ্যযুগের শিল্পী অঙ্গপ্রত্যঙ্গে রেখাপাত দ্বারা ভাব প্রকাশ করিতে চেষ্টা করেন নাই; পরন্তু মূর্তির অস্বাভাবিক আকার, অন্ধকার গুহার ক্ষীণ আলো ও গভীর ছায়ায় স্থাপিত করিয়া ভীষণ পারিপার্শ্বিক মূর্তির সহযোগিতায় ভাবব্যঞ্জনায় কৃতকার্য হইয়াছেন। ইলোরার শিল্পে কামক্রোধাদি ভাবসম্পদের আধিপত্য স্থাপিত হইয়াছে। মধ্যযুগের স্থাপত্যে অলঙ্কারের প্রাচুর্যের কথা পূর্বেই বলা হইয়াছে। এই সময়কার হিন্দু ও বৌদ্ধমূর্তিতে তাহার অনেক দৃষ্টান্ত রহিয়াছে। এই সকল অলঙ্কারে সৌন্দর্য্য বর্দ্ধিত হয় নাই, বরঞ্চ হ্রাস প্রাপ্ত হইয়াছে। কেহ কেহ বলেন মধ্যযুগের শিল্পে আমাদিগের জাতীয় শিল্পের অতি

উৎকৃষ্ট নিদর্শন প্রাপ্ত হওয়া যায়। মধ্যযুগের শিল্পে
গুপ্তশিল্পের জ্ঞানালোক নির্ব্বাণোন্মুখ। ইহা জাতীয়
জীবনের অবনতির চিহ্ন বলিয়া পরিগণিত হইতে পারে।
জ্ঞানের অভাবে সম্যক্ দৃষ্টির অভাব ঘটে; এই সম্যক
দৃষ্টির অভাবে মূর্ত্তিগুলি প্রাণহীন হইয়াছে। এই
সকল মূর্ত্তি যেন কেবল মন্দিরের শোভাবর্দ্ধনের
জন্মই নিশ্চিত হইয়াছিল।

পরিশিষ্ট ।

রাজা কর্ণদেবের লিপি ।

পাঠ ।

পংক্তি ।

- ১ স্ত সর্ববান্ধকারব
- ২ নিরুপ পাইকগম্ভা(ঃ)
ভুবন
- ৩ পরমভটা[রকমহারাজা][f]ধরাজপরমেশ্বর
শ্রীবাম [দেব পাদামুখ্যাত-পরমভটা]
- ৪ রকমহারাজ[ধিরাজপর]মেশ্বরপরমমাহেশ্বর
তৃ(ত্রি) [কলিঙ্গাধিপতি নিজভুজো]
- ৫ পার্জিতাশ্বপতি [গজপতি ন]রপতি রাজত্রয়াধি-
পতিশ্রীমৎকর্ণ[দেবকল্যা]
- ৬ গবিজয়রাজ্যে স[স্বৎসরে ৮]১[০] আশ্বিন
শুদি ১৫ রবৌ ॥ অ[দ্যেহ শ্রীসঙ্কর্ম]
- ৭ চক্রপ্রবর্তনমহাব মহাবিহারে আৰ্য্য-
ভিক্ষুস্বজ্ঞস্ত স্ব

- ৮ পাত্রিকমনোরথগুপ্ত(প্তো) আশীর্ব্বাদপদ[৭] সমা-
দাপিত্তো মহাজা[নামুজায়]
- ৯ পরমোপাসকঃ ধনেশ্বরঃ দমনেন(ন) সঞ্জমেন
(সংযমেন) রাগাদিমলপ্রক্ষা(লনপরঃ)
- ১০ তস্মা ভার্জা(ভার্য্যা) মহাজানা-মুজায়িন পরমো-
পাসিকা মামকা যা অতি
- ১১ গুণালংকৃৎ(ত)শরীরা তয়া লিখাপিত্তাৰ্য্য . . .
তা সৰ্ব্ব-বুদ্ধজন
- ১২ অষ্টসাহস্রিকা পূজাপঠনিবন্ধনা
ত্ৰং আচন্দ্রাকর্মেদ(দি)-
- ১৩ নী যাবৎ আৰ্য্যভিক্ষুসঙ্ঘস্যসমর্পিতঃ . . .
বাধকং করে
- ১৪ [৭] স পি(বি)ষ্ঠায়াম্ কুমিত্ত্বো পিত্তি(ত্)ভিঃ
সহ প[চ্যতে]

অনুবাদ ।

পরম ভট্টারক-মহারাজাধিরাজ-পরমেশ্বর-শ্রীবামদেব-
পাদানুধ্যায়ী পরমভট্টারক মহারাজাধিরাজ পরমেশ্বর
পরমমহেশ্বরভক্ত ত্রিকলিঙ্গাধিপতি, নিজভুক্তবলে উপা-
র্জিত অশ্বপতি-গজপতি-নরপতি এই ত্রির্নাজপদবায়ুক্ত

শ্রীমান্ কর্ণদেবের কন্তাগবিজয়রাজ্যের ১৮ সংবৎসরের
আশ্বিন মাসের শুক্লপক্ষের পঞ্চদশ দিবস, রবিবার ।

অদ্য এই শ্রীসঙ্কস্মচক্রপ্রবর্তন মহাবিহারে আৰ্য্য
ভিক্ষুসংঘের স্থবির মনোরথ গুপ্তের
আশীর্ব্বাদ, মহাযানপথাবলম্বী, পরমোপাসক ধনেশ্বর,
যিনি দমন ও সংযমের দ্বারা রাগাদি দোষ প্রক্ষালনে
প্রবৃত্ত আছেন এবং তদীয় ভার্য্যা মহাযানপথাবলম্বিণী
মামকা, যিনি পরমোপাসিকা ও সর্ববিশুদ্ধা
এই উভয়ে প্রাপ্ত হইয়াছেন । উক্ত রমণী সর্ববুদ্ধজন্মের
পূজার্থে এবং আৰ্য্যা অষ্টসহাস্রিকার পূজা ও পাঠ নিবন্ধন
উহার একখানি নকল করাইয়াছেন । এতদর্থে . . .
যাবচ্চন্দ্র দিবাকর আৰ্য্য ভিক্ষুসংঘের হস্তে সমর্পিত হইল ।
যে কেহ ইহাতে বাধা উৎপাদন করিবে সে পিতৃগণের
সহিত বিষ্ঠায় কালযাপন করুক ।

কুমরদেবীর সারনাথপ্রশস্তি ।

পাঠ ।

পংক্তি

- ১ ওঁ নমো ভগবত্যৈ আৰ্য্যবসুধারায়ৈ ॥ সমবতু
বসুধারা ধর্মপীযুষধারা প্রশমিতবহুবিশো-
দামদুঃখোরুধারা । ধনকনকসমৃদ্ধিং
ভূর্ভবঃ শ্বঃ কিরন্তী তদ-
- ২ খিলজনদৈন্ত্র্যাজয়ন্তী জগন্তি ॥(১) নেত্রৈ-
রুৎকণ্ঠিতানাং ক্ষরণমুপনয়ং শ্চারুচন্দ্রোপলানা
স্মানগ্রন্থিষ্মিভিন্দন্ সহ কুমুদবনীমুদ্রয়া
মানিনীনাম্ । দধন্দধ্বেশ্বরেণা [মু]
- ৩ তনিকরকরৈর্জীবয়ন্ কামদেবং কাস্তোয়ং কোমু-
দীনাং স জয়তি জগদালোকদীপ্রপ্রদীপঃ ॥[২]
বংশে তস্ম নমস্তপোরুষজুষি প্রস্ফারকৌর্তি-
ত্বিষি জ্যাক্ শৌচেন স্ম [রাপ]-
- ৪ গামদমুষি প্রত্যর্থিলক্ষ্মীরুষি । বীরো বজ্রভ-
রাজনামবিদিতো মান্ত স ভূমীভুজাং জেতাসীৎ-
পৃথুপীঠিকাপতিরতিপ্রৌঢ়প্রতাপোদয়ঃ ॥[৩]
ছিক্কোরবংশকুমুদোদয়পূর্ণ—
- ৫ চন্দ্রঃ শ্রীদেবরক্ষিত ইতি প্রথিতঃ পৃথিব্যাম্ ।
পীঠিপতি গর্জপতেরপি রাজ্যলক্ষ্মীং লক্ষ্যা

জিগায় জগদেকমনোহরশ্রীঃ ॥[৪] তস্মাদাস
পয়োনিধেয়বিধু-

৬ জীবণ্যলক্ষ্মাবিধুর্নেত্রানন্দসমুদ্রবর্দ্ধনবিধুঃ কীর্তি-
দ্রুতি শ্রীবিধুঃ । সৌজাত্যৈকনিধিঃ সুরকুণ-
নিধির্গান্তীৰ্য্যবারান্নিধির্হস্মাদৈতনিধিঃ স চ [৩]

ম-

৭ নিধিঃ শস্ত্রৈকবিদ্যানিধিঃ ॥[৫] দীনানামভিবা-
স্থিতৈকফলদঃ প্রত্যক্ষকল্পক্রমো দৃপ্যবৈরি-
গিরীন্দ্রভেদনবিধৌ দুর্বারবজ্রশ্চ যঃ । কান্তা-
ন [১] স্মদ-

৮ নজুরোপশমনে সিদ্ধৌষধীপল্লবো বাহুর্যস্ত বভূব
ভূতলভুজামস্তশ্চমৎকারিণঃ ॥[৬] গোড়েবৈ-
ততটঃ সকাণ্ডপটিকঃ ক্ষত্রৈকচূড়ামণিঃপ্রখ্যাতো

৯ মহাগঙ্গপঃ ক্ষিতিভুজাস্মাত্তোভবন্মাতুলঃ । ত(তং)
জিত্বা যুধি দেবরক্ষিতমধাৎ শ্রীরামপালস্ত
যো লক্ষ্মীং নির্জিতবৈরিরোধনতয়া দেদীপ্য-
মানোদয়াম্ ॥[৭] কন্যা মহা-

১০ দেবস্ত তস্ত কন্তেব ভূভূতঃ । সা পীঠপতিনা
তেন তেনেবোঢ়া স্বয়ম্ভূ[ভু] বা ॥[৮] খ্যাতা
শঙ্করদেবীতি তারেব করুণাশয়া । ব্যজেষ্ট
কল্পবৃক্ষাণাং লতা দানোদ্যমেন য়া ॥ [৯] অ-

১১ জনি কুমরদেবী হস্ত দেবীব তাভ্যাং শরদমলসু-
খাঙ্গশোশ্চারুলেখেব রম্যা । দুৰিতজলধি-
মধ্যাল্লোকমুদ্রকুঁকামা স্বয়মিহ করুণার্ভা
তারিণীবাবতীর্ণা ॥[১০]

১২ যাস্থেধাঃ প্রবিধায় শিল্পরচনাচাতুর্যদৰ্পং ব্যাধা-
দ্যদ্বস্ত্রেণ জিতস্তম্বারকিরণো হ্রীণঃ স থস্থো-
ভবৎ । রাত্রারাগমাতনোতি মলিনোজাতঃ
কলঙ্কী ততস্ত

১৩ স্ত্রাঃ স্তদ(স্বন্দ)রিমা স বিস্ময়করো বাচ্যঃ
কিমস্মাদৃশৈঃ ॥[১১] চিত্রকঞ্চলদৃক্কুরঙ্গ-
মবধুবন্ধস্ফুরদ্বাগুরাম্ বিভ্রাণা তনুসম্পদম্প্র-
বিলসৎকাস্ত্যাভিকাস্ত্যশ্রিয়া ।

১৪ খেলৎক্ষীরসমুদ্রসান্দ্রলহরীলাবণ্যলক্ষ্মীমুখংমোখং
শৈলসুতামদস্ত দধতী সৌভাগ্যগর্বেণ
সা ॥[১২] ধর্মদৈবতমতিগুণাহিতরতিঃ প্রার-
ন্ধপুণ্যাচিতি-

১৫ দানোদারধৃতির্মতঙ্গজগতির্গেহ্না(ত্রা)ভিরামা-
কৃতিঃ । শাস্ত্রহস্তনতিজনোদিতনুতিঃ
কারুণ্যকেশিস্থিতিনিত্যশ্রীবসতিঃ কৃত্য-
বিহতিঃ স্ফায়দগুণাহংকু

১৬ তিঃ ॥[১৩] জগতি গহডবালে ক্ষত্রব[বং]শে
প্রসিদ্ধেজনি নরপতিচন্দ্রশচন্দ্র(মা)নামা
নরেন্দ্রঃ । যদসহনৃপাণাঙ্কামিনীবাষ্পবা
হেঃ(হৈ) শিতিতরমিদমাসীদ্যামুন(নং) তু(নু)
নমস্তঃ ॥[১৪] নৃ

১৭ পতিমদনচন্দ্রশচন্দ্রপালচুড়ামণিরজনি স তস্মা-
দ্বিদ্ভদেকাতপত্র[ম] । ধরণিতলমনল্পপ্রৌঢ়-
তেডো(জো)নলশ্রীঃশ্রিয়মপি চ মধোনঃ
স্বশ্রিয়াধো দধানঃ ॥[১৫] বারাগ-

১৮ সীং ভুবনরক্ষণদক্ষ একো দুষ্কান্তরুক্ষতটাদ
বিতুং হরেণ । উল্লেহরিশচ পুনরত্র বভূব
তস্মাদোবিন্দচন্দ্র ইতি প্রথিতাভিধানঃ ॥
[১৬] বৎসাঃ কামদুহাং কণা-

১৯ নপি পয়ঃপূরস্ত্র পাতু ন তে চিত্রং প্রাগল্ভন্ত
বাচকমনঃ সন্তোষনিত্যব্যয়াৎ । ত্যাগৈ-
র্যস্ত্র মহৌভুজঃ প্রমুদিত তদ্যাচকানাঞ্চয়ে
স্বচ্ছন্দাহিতনিত্যনির্ভরপয়ঃ-

২০ পানোৎসবৈরাসতে ॥[১৭] যদ্বিষ্মিষমহীভূজাং
পূরবরে প্রভ্রফহারাবলী ব্যাধাস্তনুগপাশবন্ধ-
মনসা গৃহুন্তি নৈব ভ্রমাৎ । ব্যাধাঃ স্রস-
স্ববর্ণকুণ্ডলমহিভ্রান্তা

- ২১ তদত্যায়েতদৈষ্টৈদ্রাগপসারয়ন্তি চ ভয়প্রোৎকম্পি
হস্তশ্রজঃ ॥[১৮] যস্তোৎসন্নবিরোধিত্বপ-
তিপুরপ্রাসাদপৃষ্ঠোপরি প্রত্যগ্রক্ষুরদুগ্র-
শঙ্গাকবলব্যালোলবাজি-
- ২২ ব্রজঃ । আদিত্যস্তভবৎস মন্থররথশচন্দ্রোপি
মন্দোভবৎ ঘাসগ্রাসবিরুদ্ধলোভহরিণ রক্ষন্
পতন্তুস্ততঃ ॥[১৯] অহহ কুমরদেবী তেন
র(১)জ্ঞা প্রসিক্কা নি(ত্রি)জগতি
- ২৩ পরিগীতা শ্রীরিবেহাচ্যুতেন । প্রবিলসদবরোধে
তস্ত রাজ্ঞোঙ্গনানাং নিয়তমমৃতরশ্মৈর্লৌখিকা
তারকাস্ত ॥[২০] বীহারো নবখণ্ডমণ্ডল-
মহীহারকৃতোয়ন্তয়া
- ২৪ তারিণ্যা বসুধারয়া ননু বপুর্বিভ্রাণয়ালংকৃতঃ
যং দৃষ্ট্বা প্রবিচিত্রশিল্পরচনাচাতুর্য্যসোমাশ্রয়ং
গীর্বাণৈঃ স্তদৃশ[কঃ] বিস্ময়মগাদ্ভাগ্বিশ্বকস্ম্যা-
পি সং ।(১)[২১] শ্রীধমচক্রজি-
- ২৫ নশাসনসন্নিবন্ধং সা জম্বুকী সকলপত্তলিবা-
গ্রভূতা । তত্তাত্রাশাসনবর(রং) প্রবিধায় তস্মৈ
দত্তা তয়া শশিরবী ভুবি যাবদাস্তাম্ ॥[২২]
ধর্ম্মাশোকনরাধিপস্ত্র সময়ে শ্রীধ-

২৬ ম(ম) চক্রে জিনো যাদৃক্ তন্নয়রক্ষিতঃ পুন-
রয়ঙ্ক্রে ততোপ্যদ্ভুতম্। বীহারঃস্ববিরস্ত
তস্ত চ তয়া যত্নাদয়ঙ্কারিত স্তম্ভিম্বেব সমপ্লি-
তশ্চ বসতাদাচন্দ্রচণ্ড্যতি ॥[২৩] তৎ-
কৌর্দ্ভিম্প-

২৭ রিপালয়িষ্যতি জনো যঃ কশ্চিচ্ছবীতলে স
তস্ত্যজিংযুগপ্রণামপরমা যুয়ং জিনাঃ সাক্ষি-
ণঃ। তস্ত্য কশ্চিদনিশ্চিতো যদি যশোব্য-
লোপকারী খলঃ তং পাপীয়সমা-

২৮ শু শাসতি পুনস্তে লোকপালাঃ ক্রুধা ॥[২৪]
একস্তীর্থিকবাদিবারণঘটাসজ্জউকণ্ঠীরবঃ
সাহিত্যো[জ্]জ্বলরত্নরোহণগিরির্ঘো হৃফ-
ভাষাকবিঃ। খ্যাতো বঙ্গমহীভুজঃ

২৯ প্রণয়ভূঃ শ্রীকুন্দনামা কৃতী তস্ত্যঃ স্তন্দরবর্ণগুণ্ফর-
চনারম্যাং প্রশস্তিং ব্যধাৎ ॥[২৫] এষা
প্রশস্তিরুৎকীর্ণা বামনেন তু শিল্পিনা। রাজা-
বর্জস্ত সাপভূন্দধানে প্রস্তুরোত্তমে ॥[২৬]

অনুবাদ

পংক্তি

১।২ ঙ্গ। ভগবতী আৰ্য্যাবস্তুধারাকে প্রণাম।

যিনি ধর্মের পীযুষধারায় বহু বিশ্বের উদ্ধাম
 দুঃখধারা প্রশমিত করেন, যিনি ত্রিলোকে
 ধনকনকসমৃদ্ধি বিকীরণ করেন, যিনি
 অখিল জনগণের দুঃখ শমিত করিয়া দেন,
 সেই বস্তুধারা দেবী জগৎকে পালন করুন।

২।৩ চন্দ্রকান্তমণিসমূহের ক্ষরণকারী, উৎকণ্ঠিত-
 গণের নেত্রাদ্রকারী, মানিণীগণের মানগ্রস্থি-
 ভিন্দনকারী, মুদ্রিত কুমুদকুলের প্রস্ফুটন-
 কারী, মহেশ্বর কর্তৃক ভগ্নীভূত কামদেবের
 অমৃতবর্ষীকরনিকরে পুনরুজ্জীবনকারী,
 জগতের আলোকবিধাতা সেই কুমুদিনী-
 কান্ত জয়যুক্ত হউন।

৩।৪ তাঁহার বংশে পৌরুষে নমস্তা, কীর্তিতে
 দীপ্তিমান, শুদ্ধিতে সুরনদীর স্পর্দাকারী,
 প্রতিপক্ষদের লক্ষীবিনম্রতা ভূপতিদের মান্য,
 বিশাল পীঠিকার অধিপতি বল্লভরাজা নামে
 এক বীর ছিলেন, যাঁহার প্রতাপ বাড়িয়াই
 চলিয়াছিল।

৪।৫ ছিকোরবংশের কুমুদোদয়কারী পূর্ণচন্দ্র
ছিলেন সেই পীঠপতি, যিনি শ্রীদেবরক্ষিত
নামে পৃথিবীতে প্রথিত। তাঁহার রাজ্য-
লক্ষ্মী গজপতির লক্ষ্মীকে অতিক্রম করিয়া-
ছিল, যাঁহার শ্রী একাই জগতের মনো-
হরণ করিত।

৫।৬ পয়োনিধি হইতে বিধুর মত তিনি সেই
(বল্লভরাজ) হইতে উৎপন্ন হইয়াছিলেন,
লাবণ্যলক্ষ্মীর কাছে যিনি বিধুই ছিলেন।
তিনি সমুদ্র হইতে উদয়কালে বিধুর মতই
নেত্রানন্দবর্দ্ধনকারী ছিলেন। কীর্ত্তীশ্রীই
সেই বিধুর ছাতি ছিল। তিনি সৌজন্তে
অতুলনীয় দীপ্তিমান গুণসমূহের নিধি
সিঙ্কুর মত গম্ভীর ছিলেন।

৭ তিনি ধর্মের একমাত্র আকর, শক্তি এবং
শাস্ত্রবিদ্যার একমাত্র আকর এবং দীনগণের
অভিবাঞ্ছিত একমাত্র ফলপ্রদাতা প্রত্যক্ষ
কল্পতরু ছিলেন। দৃপ্ত বৈরীরূপ গিরীন্দ্রগণের
ভেদনকার্য্যে তিনি দুর্ব্বার বজ্রের স্থায় ছিলেন।
তাঁহার বাহুপল্লব কান্তাগণের

৮ মদনজুরের উপশমে সিদ্ধোবধি ছিল। এবং
ভূপতিগণের অন্তর চমৎকৃত করিত। (৬)
গৌড়দেশে অদ্বিতীয় বীর

৯ শরশালি এক ক্ষত্রিয়চড়ামণি ছিলেন। তিনি
ক্ষিতিপতিগণের মাননীয় মাতুল স্বনামখ্যাত
মহণ। তিনি দেবরক্ষিতকে যুদ্ধে জয় করিয়া,
বৈরীবিরোধ নির্জিত করিয়া শ্রীরামপালের
রাজ্যলক্ষ্মীকে দেদীপ্যমান করিয়া দিয়াছিলেন।
(৭) মহণদেবের কন্যা

১০ অদ্বিকন্টার ন্যায় ছিলেন। পার্বতী যেমন
স্বয়ম্ভুর সহিত, তিনিও তেমন পৌষ্টিপতির
সহিত বিবাহিতা হন। (৮) তিনি শঙ্করদেবী
নামে প্রসিদ্ধা এবং তারার ন্যায় করুণাশয়া
ছিলেন। কল্লবৃক্ষ লতাকে দান বিষয়ে
তিনি পরাভূত করিয়াছিলেন। (৯)

১১ এই দম্পতী হইতে দেবীর মতই কুমরদেবী
সম্ভূত হন। তিনি শরৎকালের অমল
সুধাংশুর চারুলেখার ন্যায় রমণীয়া। যেন
পাপজলধির মধ্য হইতে লোকোদ্ধারের

ইচ্ছায় করুণার্ভতারিণী স্বয়ং ভূতলে অবতীর্ণা
হইয়াছেন ।(১০)

১২ যাঁহাকে সৃষ্টি করিয়া বিধাতার শিল্পরচনা-
চাতুর্য্যের দর্প হইয়াছিল । (১১) যাঁহার মুখ-
কান্তিতে পরাজিত হইয়া তুষারমালী লজ্জায়
আকাশ আশ্রয় করিয়াছেন, রাত্রিতে মাত্র
উদিত হন, মলিন হইয়া গিয়াছেন এবং
কলঙ্কিত হইয়াছেন—

১৩ তাঁহার সেই বিস্ময়কর সৌন্দর্য্য আমাদের স্থায়
লোকে কি ব্যক্ত করিবে । (৬৬) তাঁহার
বিভ্রমকর তনুসম্পদ ক্ষণিকদর্শনকারী
চঞ্চলনয়নকুরঙ্গদ্বয়ের পক্ষে বিস্তারিত বাণ্ঠ-
রার স্থায় প্রতিভাত হইত ।

১৪ তিনি ক্ষীরসমুদ্রের ক্রীড়াশীল মনোজ্ঞ লহরী-
গণের লাবণ্যালক্ষ্মী দীপ্তস্ত্রীশোভার দ্বারা
হরণ করিয়াছেন । তাঁহার সৌন্দর্য্যগরিমা
শৈলতনয়ার অহঙ্কার নষ্ট করিয়াছিল ।(১২)

১৫ ধর্ম্মে তিনি একমতি, গুণেই তাঁহার রতি, পুণ্য
সঞ্চয়ে তিনি মনোনিবেশ করিয়াছেন ।

দানে তিনি পরম তৃপ্তি লাভ করেন। তাঁহার গতি মাতঙ্গের আয়, অকৃতি নেত্রস্থখকর। জগৎপতির নিকট তিনি নত, জনগণ তাঁহার প্রশংসা করে। কারুণ্যকেলিতে তাঁহার স্থিতি, নিত্যশ্রীর তিনি আবাস ভূমি, কুৰ্ম্মকে তিনি জয় করিয়াছেন, অশেষগুণ সম্ভারই তাঁর অহঙ্কারের বস্তু। (১৩)

১৬ জগৎপ্রসিদ্ধ গহডবাল নামক ক্ষত্রিয়বংশে নরপতিগণের চন্দ্রস্বরূপ চন্দ্র নামে এক নরেন্দ্র ছিলেন। যে সকল ভূপতি তাঁহার প্রতাপ সহ্য করিতে পারেন নাই তাঁহাদের কামিনীগণের নয়ন জলধারায় যমুনা সত্যই কৃষ্ণতরা হইয়াছিলেন। (১৪)

১৭ চণ্ডভূপালগণের চূড়ামণি মদনচন্দ্র তাঁহা হইতে উৎপন্ন হন। ধরণীতল তিনি একছত্র হইয়া ধারণ পোষণ করেন। তাঁহার তেজানল প্রচণ্ড ও প্রসিদ্ধ ছিল। আত্ম-শ্রীর দ্বারা তিনি ইন্দ্রের শ্রীকে অবনত করিয়াছিলেন। (১৫)

১৮ মহাদেব হরিকে, দুর্জয় তুরুরূপী হইতে বারণসী পুরী রক্ষায় একমাত্র দক্ষ বলিয়া বর্ণনা

করিয়াছিলেন। সেই হরিই তাঁহা (মদনচন্দ্র)
হইতে জন্মগ্রহণ করেন। গোবিন্দচন্দ্র
নামে তিনি প্রসিদ্ধ হন। (১৬) কামধেনু-
গণের বৎসগণ

১৯ পূর্বের দুষ্কথারার কণাও প্রাপ্ত হইতনা, যাচক-
গণের মনস্তপ্তির জন্য তাহা নিত্যই ব্যয়িত
হইয়া যাইত। এই মহীপতির দানে যাচকগণ
প্রমুদিত হইলে তাহারা স্বেচ্ছানুযায়ী

২০ অজস্র দুষ্কপানোৎসবে অবস্থিতি করিত। (১৭)
তাঁহার বিদ্রোহী নরপতিগণের পুরসমূহে
ব্যাধগণ অস্তু হারগুলি যুগগণের পাশবন্ধ
করিবে বলিয়া গ্রহণ করে, ভ্রমক্রমে নহে,
ভূপতিত সুবর্ণকুণ্ডল সমূহকে বৃহদাকার-
বশতঃ সর্পভ্রমে

২১ ভয়ান্ত কম্পিতহস্তে দণ্ডদ্বারা দ্রুত অপসৃত
করে। (১৮)

২১-২২ যাঁহার উৎসন্ন বিরোধিরাজগণের পুর
প্রাসাদের পৃষ্ঠোপরি নবস্ফুরিত শম্পা-
কবলেলুন্ধ অশ্বগণ আদিত্যকে স্তম্ভিত

করিয়াছিল-তিনি মন্তর রথ হইয়া-
ছিলেন। চন্দ্রও তৃণলুপ্ত পতনোন্মুখ
হরিণকে ধারণ করিতে গিয়া মন্দগতি
হইয়াছিলেন।(১৯)

২২-২৩ যথার্থই কুমরদেবী সেই রাজার সহিত শ্রী
যেমন অচ্যুতের সহিত—তেমনি প্রসিদ্ধা
ও ত্রিজগতে কীর্তিতা হন। সেই রাজার
অবরোধে অঙ্গনাসমূহের মধ্যে, তারকার
মধ্যে যেমন চন্দ্রলেখা তেমনি শোভিত
হন। (২০) নবখণ্ডমণ্ডলে বিভক্ত ধরণীর
হার স্বরূপ এই বিহার তাঁহার কৃত।

২৪ ইহা যেন তারিণী বসুধারা কর্তৃক দেহশোভার্থে
অলঙ্কৃত হইয়াছে। দেবলোকের গ্রায়
সুদৃশ্য ইহার বিচিত্র শিল্পরচনাচাতুর্য্য
দেখিয়া বিশ্বকর্মা নিজেই বিস্ময়ে অভিভূত
হইয়া গিয়াছেন।(২১) শ্রীধর্ম্যচক্র জিনের


২৫ শাসন যাহাতে সম্ভব হইয়াছে সেই শ্রেষ্ঠ
তাম্রশাসন প্রস্তুত করাইয়া, পত্তলিকা
সমূহের অগ্রভূতা জম্বুকীকে, যত কাল
পর্য্যন্ত পৃথিবীতে সূর্য্যচন্দ্র থাকিবে ততদিন

পর্যন্ত প্রদত্ত হইল। (২২) ধর্ম্মাশোক
নরপতির সময়ে শ্রী

২৬ ধর্ম্মচক্রজিন যেরূপ রক্ষিত ছিল পুনরপি
সেইরূপ, এমনকি তাহা হইতে অধুততর
রূপে রক্ষিত করা হইয়াছে। সেই
শ্রবিরের জন্ম এই বিহার সময়ে নিশ্চিত
হইয়াছে। তাহাতে (সেই বিহারে)
স্থাপিত হইয়া তিনি যত দিন সূর্য চন্দ্র
থাকিবে—বাস করুন। (২৩) তাঁহার
(কুমরদেবীর) কীর্ত্তি

২৭ ভূমিতলে যে কোন লোক পরিপালন করিবে,
তাঁহার পদযুগে প্রণামপর হে জিনসকল
তোমরা সাক্ষী থাকিও। যদি কোন
খল তাঁহার (কুমর দেবীর) যশ লোপ করে
৭-২৮ তবে সেই লোকপালগণ ক্রুদ্ধ হইয়া
সেই পাপাত্মাকে আশু শাসন করিবে।
(২৪) হস্তিগোষ্ঠিরূপ তীর্থিকবাদগণের
যুদ্ধে যিনি একমাত্র সিংহ, যিনি সাক্ষিত্যে
রত্নোজ্জ্বল রোহণ গিরি, যিনি অষ্টভাষায়
কবি, বজেশ্বরের

- ২৯ প্রণয়পাত্র বলিয়া খ্যাত, ঝাঁহার নাম শ্রী কুন্দ
 তিনি তাঁহার (কুমরদেবীর) এই সুন্দর,
 বর্ণালঙ্কারে রম্যা প্রশস্তি রচনা করিয়া-
 ছেন। (২৫) এই প্রশস্তি রাজাবর্তের
 তুল্যম্পদ্বী উত্তমপ্রস্তরে শিল্পি বামনের
 দ্বারা উৎকীর্ণ হইয়াছে। (২৬)



চৌখণ্ডী স্তূপ

34

वि

843798 655650

1537 16318
TYO H27974h9992, T13.99TY 02100 1000000

2. 27-17057777

[illegible]

1-15200477:: EYDP.072-TK EY 9999. T9999

[illegible]

Yf. 177 Tm 27 Y 84 1. 171 27 0 0 1

2017-11-27 14:17:17


[illegible]

THE UNIVERSITY OF CHICAGO


2000

[illegible]



THE




ধামেক স্তূপ



অশোক স্তম্ভ শীর্ষ



শুঙ্গযুগের স্তম্ভ শীর্ষ





কণিষ্কের সময়ের বোধিসত্ত্ব মূর্তি





(ক) — বুদ্ধের ধর্মচক্র প্রবর্তক মূর্তি




(খ) — শিবমূর্তি


ধামেক স্তূপের কারিকারী





অষ্টমহাশান





21-
N 2211176

Archaeological Library,

30324

Call No. 913-05 / ~~LIB A~~ / May

Author—Majumdar, Bhbanato
Ph.

Title—Sarnathi Vivarana

Borrower No.

Date of Issue

Date of Return

A BOOK THAT IS SHUT IS OUT A BLOCK.

CENTRAL ARCHAEOLOGICAL LIBRARY
GOVT. OF INDIA
Department of Archaeology
NEW DELHI

Please help us to keep the book
clean and moving.